

Литература Дагъистан

16+

# Гьалмагъдеш

ЛИТЕРАТУРНО-ХУДОЖЕСТВЕННЫЙ И ОБЩЕСТВЕННО-ПОЛИТИЧЕСКИЙ ЖУРНАЛ

Майла 9 - Чедибдешла БархИ



3/2021

май - июнь

# 1-май





# Тъалмагъдеш



## ЛИТЕРАТУРНО-ХУДОЖЕСТВЕННЫЙ И ОБЩЕСТВЕННО-ПОЛИТИЧЕСКИЙ ЖУРНАЛ

Учредитель: Министерство информации и печати Республики Дагестан

---

**РУКОВОДИТЕЛЬ - БЕКИ РЕДАКТОР**  
Мурад МяхИяммадович ГИЯХИМАДОВ

**РЕДАКЦИЯЛА КОЛЛЕГИЯ**  
Т.СягИдов (*журналла редактор*)  
Къ. Мигърабов  
Къ. ГялисултIанов

**ЖАМИГИЯТЛА СОВЕТ**  
А. Гябдулмананова  
И. Ибрагъимов  
Х. ХIябибова  
Х. Юсупов  
И. МяхИяммадов  
М. МутIалимов  
М. БяхИяммадов

**3**  
**2021**  
май - июнь

---

КIел базили гъачам  
дурабулхъан

Выходит один раз в два месяца

1952 ибил дуслизиб  
акIахъубси саби

Журнал основан в 1952 году

Государственное бюджетное учреждение  
Республики Дагестан “Редакция республиканских литературных  
журналов “Соколенок” и “Литературный Дагестан”.



## ЖУРНАЛЛИЗИР ЛЕР:

ГияИмадхан АБУ-БАКАР. ХиядурдиклуХели ит дуги дебкес.....3

### ПОЭЗИЯ

Сайгибат ГИЯДУЛКАРИМОВА. Дила дудеш (Поэма).....18

Байгинат КЪУРБАНОВА Назмурти.....23

Аминат ХИЯПИЗОВА. Сагати назмурти.....25

### ПРОЗА

МутГалим МУТИАЛИМОВ. ДиштГати хабурти.....29

МяхИяммад КЪАРАТОВ. Ишти аргъибсиле децигур.....36

### ЖУРНАЛЛИСТЛА БЕЛКИНИ

МяхИяммад КЪУБАЕВ. РажабГиялила дукелци. ГьарХебизурси Хьулки. Пякьир рухьнала кьал...40

### ПОЭЗИЯ

Тавсултан СЯГИДОВ. АхИенрав нуша рахли духьна мага диули?.....47

Гийишат МЯХИЯММАДОВА. Назмурти.....52

Зубалжат ГИЯМАРОВА. Уркила далай.....57

Аминат ГИЯДУЛМАНАПОВА.....61

Кьурбан ИБАЦИЕВ. Унеу-хьяб.....67

### ПРОЗА

Фатима КИУЩУЛОВА. Кьисмат.....73

Гийиша КЪУРБАНОВА. Дудеш, хед ну хейгахьурав?.....78

ПатГимат МЯХИЯММАДОВА. Дукикьяна.....81

### БИБЛИОГРАФИЯ

СягИдат ГИЯДУЛЛАБЕКОВА. «Мусахьай» хабар.....84

### ФОЛЬКЛОР

Кьади ГИЯЛИСУЛТАНОВ. Халкьла далуйти.....86

### ОЧЕРК

ПатГимат ВЯХИДОВА. Дагьрилизиб кавлан.....89

РабаданХияжи ЮСУПОВ. Даршлим ца гьабза.....92

### ТАБИГИЯТ

БяхИяммад ХИЯЖИЕВ. Хиунира галга убати.....93

### ПОЭЗИЯ

МяхИяммад СЯГИДОВ. Назмурти.....95

---

Регистрационный номер: серия ПИ №ТУ05-00416  
выдан Управлением Роскомнадзора по Республике Дагестан от 22.04. 2019 г.

Типография: ООО «Издательство «Феникс-пресс»  
Адрес типографии: 367018, РД, г. Махачкала, пр. Петра I, 61

ГЪАЛМАГЪДЕШ №3 2021 г.

На даргинском языке

Выход в свет 18.06. 2021 г. Тираж 240 экз.

Заказ №887 Цена свободная.

Печать офсетная. Бумага офсетная.

Формат 70x108 <sup>1</sup>/<sub>16</sub>.

Усл. печ. л. 8,4.

Усл. изд. л. 8,7.

Редакция и издатель: Государственное бюджетное учреждение Республики Дагестан "Редакция республиканских литературных журналов "Соколенок" и "Литературный Дагестан".

Адрес редакции и издателя: 367000, РД, г. Махачкала, ул. Даниялова, д. 55.

Электронный адрес редакции:

litdag@mail.ru

Дагъиста халкъла писатель  
ГІяхІмадхан АБУ-БАКАР



### ХІЯДУРДИКІУХІЕЛИ ИТ ДУГИ ДЕБКІЕС...

*(Повестълизибад бутІа)*

*«Ражабов Гусман разведчикуначил  
чарулхъухІели душмантани алавуцибсири,  
ясирХейкес багъандан граната  
баргбердахъиб, Сосна хІеркІла дублав алхун»*

#### 1.

Иш анцібукъ гъабил дус биубсири.

Майла урчІемличиб, чедибдешла бархІил.

Ил ГІинцила шилизиб, бегІлара жагаси манзиллизиб, пахручебти адамти- ван ПабигІятра чебсаргъухІели, алавчарли вава-къар дерхъибхІели, хъарахъ- лизибад муйлира уршбира чарбухъайчи дубурлан хъунул адамтани хъулри ціубдирухІели... Востокла ранг – шалали хъанціа закла ранг дубурлантанира чеббиркІули бирар, гъанна ила мургъилагъуна шалали хІунтІена ранганира гъудурдирули сари.

ГІинцила ши – халаси ахІен ил, илар лерти веціну авра юрт сари, амма биштІаси ил шилизира дургъбазибад гъану верхІра адам чархІебухъун. Мукъ- ри хІедарибти юртани лерри, амма бялгІя хІебиубси лебси ахІенри. Дахъал шинкъяра халаси къиянра харждарес чебуркъибсири шила Советла председа- тель хІурматла Хяппу-СягІидлис дургъбазиб алхунти гІинциланти белгибарес багъандан. Сунела замана Хяппу-СягІидра хІунтІена партизан вирусире, Петровскла Ревкомли ил у белкІунси ярагъличил шабагъатлара варибсири. ХІязлис ахІенри илини итцад къиян харжбарибси – шилизи лявкъуйхІиб бируси памятникличи алхунти гІинцилантала уми делкІес гІягІниртири. Ге, ВатІайс гІягІнибикибхІели жан ахІерахІедарибти гІяхІгъубзни сегъуна ди- гара хІурматличи лайикъти саби. Дургъбази шантани илди тѣп ил памятник бируси мерличиб гъуниббалтутири ва бикІутири: «Душманра къирварили,

ара-сагъли чардухъабая!» Чарбухъес бахълис къадархЕбиуб. Къадармабиаб я ишхЕлла наслулис чула дудешунани ва узбани дяхЕяуртигъунти дургъби чедаэс, баягъи ил заманализиб итди къяркъти дусмачила гъанбикахъиб памятниклира! Илгъуна памятник барес чесибсири географияла учитель Къубайла Рабаданни, сайра ца хУли бетахъахъили дургъбазивад чарухъунси. Илгъуна памятник барахъес колхозли ва шила Советли харжани декЕардариб, илала дурад алхунтала тухум-агълулира селра ахЕрахЕбариб. Алхунтала тухум агарси цалра юрт шилизибра кахЕелун. Илцадра къарциндарибтири дургъбани шантала гЕямру. Гъариллис дигулри памятник бирнилизи сунелара пай кабихъес, географияла учитель Къубайла Рабаданнисра лебтани кумекбирулри.

Учитель виалли пагъмучевси сайли увухъун. Памятник цархЕилтачи мешули ахЕенси, гапличи лайикъси, гъарилла уркЕи гъалаксарахъуси бетаур. Памятникличи айцЕуйхЕи анцЕкъила лишан саблин цЕудара варгъи ганзухъличи чебушили саби, мар-мар къаркъала тахличир някълизиб чирагъличил дубурлан неш сипатрарили сари – ил дявила майдачир сунела уршбагЕир умцЕусигъуна сари. Авалра шайчир заки дургъули сари дирсибти къаркъала дугати бехЕани. Гъала шайчир биалли мургъила хатЕличил делкЕи сари фашизмаличи къаршиси къяркъси дергълизир жан къурбандарибти гъану верхЕралра гЕинциланна уми, удиб белкЕра леб: «ГЕяхЕгъубзни хъумхЕртути ва мурталра баркаллагичил гъанбиркахъути шантала, гъамтала, тухумла шайзибад». Ца шайчирван диштЕати хЕурпрачил делкЕи сари памятник барибси устала у, дудешла у, памятник абхъибси дус. Къубайла Рабадан иличила пикрира ухъунси ахЕенри. Ил памятник сунес гЕяхЕбизурси шила Советла председателли барахъес хъарбарибсири. «Гъарли-марси произведениела автор виэс гЕягЕиниси сай, илала дуравадра хЕу нушала шан сайри. Багъаб нушала шилизибра пагъмучебти адапти лебниличила. Ил секЕайчи пахру бирес чебиркургу!"» – викЕусири Хяппу-СягЕид.

Памятник ибхъухЕели лебилра шанти – халати ва биштЕати цалабикиб, шила дураб къаршибикибти гЕинцилантира Хяппу-СягЕидла телеграммабас музабухъун, военком – ил шилизивадси полковник ЦЕитаев бекЕличивли райцентрлизибадра гЕяхЕли бакЕиб. «Нушала игитунас памятник ибхъули саби!» – бикЕутири шанти. БахъхЕи бухъянбитЕунси ахЕенри митинг. Адамти бахъхЕи гъалаксаурси агиличиб бихЕес лайикъли хЕебирар. Сегъунти дигара гЕязабти чекасибти дубурлантанира далли дигЕян-дигЕянни нургъби ушкутири. Бурули бирар дубурлан багъадурла хЕулбазибад нургъбала кЕантЕи бирцЕлумачи кабикалли, ил илабадди ханжа арличира кабиркур или. Гъачамлис ванзаличибти душманти гъар чинабалра бушинбарили ахЕен, фашизмала хЕячми гъачамхЕели ца мерличир, гъачамхЕели цархЕил мерличир челяркъули сари, ил багъандан дарура дерубли дихЕес чебиркур. Илкъяйда викЕулри полковник. Нургъби ушкути дубурлан хъунул адамтала гъалаб Хяппу-СягЕидлира памятник гъаргъариб. Гъалаксаурти дубурланти камси заманалис шипЕбярЕиб, илдас чула дурхЕини мицЕирли хЕулбала гъала лагбизуртиван бизур. БерхЕила нуранаур игитунала мургъила хатЕли делкЕунти уми лямцЕдухъун, нешани къукъубачи бикиб – илдани памятник байбирулри, илди ил мусибатла анцЕбукъ ишбархЕи кабикибхЕеливан децЕлизи бикилри, уркЕбала дяхъурби хЕянсадердилри.

Адамти бахъхЕи калун илаб. Ил бархЕи илдани дахъал секЕалра гъандикахъиб. Илди дургъби даг диубтиван гъайбикЕулри. Адамтас дигули ахЕенри хъулрази арбукъес, цализи цали сунела децЕличила, сунела баркъудиличила

итиллизи бурес гъалаклири. ИтхІейчибад хІеркІла мякълабси ил мер лебилра шантани бамсриихъуси мерли бетаур: шантани ила галгуби удатур, галгубала удир скамейкаби дариб, биштІати хІязтабиркъахъес площадкара балкъаахъур. Адамтани се заманалра хъумхІерту чула игитунни. Илди ванзалиуб бусули ахІенну, адамтала уркІбазиб мицІирли лебал. Игитуннала гъунар – ил лебилра халкъла деза саби, ил халкъла далай саби. Халкъла далай биалли бубкІуси ахІен.

## 2.

ИтхІейчирад кІел дусалра дикили ахІен. Ва хІера хапли Гинцила шила Советла председателъ Хяппу-СягІидли солдатла хІябмузан кагъар касиб. Ил илизи СибхІят Къарчигъани бедибсири. Кагъар чинаб ва секъяйда баргибсирил бурибсири ва аррякъунсири. Илис дигхІейгахъи кагъарла бухІнаб се белкІил мягІлумбияйчи хІерли кавлес; урхІла баркъудлумачила, пикрумачила яра къасаначила балес илала сегъуналра иштхІ хІебири. УрхІла секІал – урхІласили кавлан, ила вегІра гъудурирес гІягІниси ахІен, эгер хІязатдеш биалли, чулира тиладибуру. Чили балав, илини хибси хабар разисил, белики ит хабарагарси децІличила, адамтала биса дурадикахъеси хабар биэс?

Сельсоветли някъбазиб бахъхІи батур кагъар сирбирули. Гъанна гъарилли балра хІебала илкъяйда хІябмузан кагъар бергесра. Хяппу-СягІидли хІулбачи шишала хІулбира даршиб ва сенрил сунела някъби руржули диъниличи пикри бяхІчаиб. Иличи кагъар лукІулри унраличивси пенсионер ГІяли-Къадила урши ГІусманни. ГІяли-Къади хІушанира валуси ургар, илини самолет-истребитель барахъес сунела сай вегІти арц дедибтири. Цали итхІели ГІяли-Къадици хъарбаибсири:

– МяштІдирули ахІенрив хІуни илдицад арц дедес?

ГІяли-Къадинира илис дяхІлабяхъилри:

– Ну мискин пакъир вираси, уртахъ, иш давла наб Совет хІукуматли гиб. ХІера гъанна Совет хІукуматлис къияндикили сари, нунира илди илис кумекбарес багъандан баркаллаличил дедлугула. Дила хІукуматли нура къияндешлизив валтхІелтара. Аргъирив?

ГІусманна дудеш илгъуна сай. Дудешлизиwad селизивалра декІарулхъуси ахІенри уршира. Иличила хІятта масхаралисван бурули бири, илбис акІес сягІят гъалав акІубси ургар или. Илала някъбазиб сегъуна дигара хІянчи рурхъули бири. Хяппу-СягІидли чи дигара хъумартес вири, амма цІала тІякъгъуна, серхурси, урехи агарси, гъар исбагъила неш-дудешлизи чуйнара гъанкІ агарти дугурби деркІахъибси ил жагъил илини сеналра хъумхІерту. ХІера гъаннара илини кагъарличиб илала у белчІун ва ил мицІирсиван хІулбала гъалав лагизур. Тяп илбисливан пагъмуличил чугурра бирхъули вири къалли, илкъяйда гъираличил узуси цархІил тракторист левлира гъанхІебиркур, лебилра районнизивра урибси тракторист вирусире. Ге, ге. Хяппу-СягІидра пишяхъиб, шантани гъаннара гъанбиркахъуси ца анцІбукъ сагадан гъанбикиб.

Колхозли трактор тІалаббариб, гъалаб илис шанда бугъа бикІули бири. Ил трактор кахъес шагъарлизи ГІусман вархъибсири. Илини ил гІергъила бархІи шилизи киб. Тамашала секІайчиван лебилра шанти иличи хІербикІутири, илалацад тІама-гъама шилизир гъалар се заманалра диубти ахІенри. Иличи хІерикІули, Хяппу-СягІидлира итхІели тІамадарибсири: «ХІера сегъуна буиллил шанда бугъа! Камли цалра бецІла цулби атІес илизи!» Сунела хъа

гъала каили, Гусман киибил дерхличи тяхухъунсири ва гьаргалав левалли нешлизи тмадарибсири:

– Аба! Ва аба! Дила шанда бугъа гушбиубли саби, камгъамти мура деда букахъес!

– Бусягъят, дила урши, бусягъят! – нешра гъалакли саклуб, къалабали уди карациб, бурухла удирад риубцад касили, шанда бугъала гъала мура кайхъиб, сунела гъалабси гъадатли ахенси секлал чебаили, тамашариуб ва тмадариб: «Чинабсив ишала бек! Чинабсив ишала къуйрукъ?» – илини трактор алавбариб: «Хияйвайчи къалли мешули саби, чянкли дек деклрти къадин...» – илини гъавадешла дамгъни хисабдариб ва ахирра пикрибариб: «Хебиалли, бекра ишаб бургар, мукукури ишар диубли гергъи». Радиаторличирад ахъдиубти трубаби илини мукукурази халдарили руилри. Илини мура итара кадирхулри, ишара кадирхулри, итара-ишара кадирхулри, амма шанда бугъали илди дугули ахенри.

Рачарархиси неш уршиличи чарриуб ва някъби тинтдариб:

– Хела бугъали нушала мура дугули ахен, урши. Марлира нуни вайтла дерахъабрара мура? – нешли мура сунтдариб. – Хиябцли ахен, умуси мурала тем саби.

– Юх, аба хебиалли дила бугъали мура хедуга! – дукаркълри масхарачи Гусман.

– Сен худукутив, урши? – багъес дигулри нешлисра. – Белики илис нег дигули биэс?

– Мухъи, марлира мухъи, гъагнитире къалли ишис! – кани буцили, дукаркълусири Гусман. Илини неш някъбачи ахъруциб, жургъухъун. Гусман мурталра разиси вири, сай-алавтира мурталра дукелцилизи ва разидешлизи гелабурши. Илала умуги дукелцили чила дигара децл чебарбики.

Иличи херикълри, итхели Хяппу-Сягидра валли къясирусири: «Секъяйда шилтахъ агарси, разиси хъалибарг сабил! Ну виасли нешла мякъла гъамиэс-цунра ахи, илала хулбази херизесра валли хейраси». Итхейчибад адамтани хятта делхълизи кабухъесра хядурси Гусманна тракторличила хабурти дурули бири. Гусман ил тракторличир сунес цикиури кесра хядурикълусири. «Марлира, чина бикибара ит трактор? Агъа-а, дургъбази бархъибсиригу. Илра гъахъабзаван алхи бургар», – пикрибариб сельсоветли.

Хяппу-Сягидли багълали кагъар гъаргбариб – ил илини хиябцали дус гъалаб абхъес гъагнисиригу. Ил улкъайличи гъамиуб:

«Хлечи дила саламти диаб, ази сельсовет!

Хлечи кагъар лукълуси Гусман сайра, Ражабхъа Гъали-Къадила урши. Гъалаб-гъалабси тугълизиб бурес дигулра дила мурад – хела ва хела хъалибаргларе тухум-агълулара арадеш биъни. Иш кагъар нуни, сецад хейгеси биалра, окоплизиб ахен лукълуси, госпитальлизиб лукълулра – ишав ну тхуртани сихруличил беклализивад верцахъира. Чевверхи набчивадли, ази сельсовет, эгер иш дяхъи дявила майдайчиб душма хярхъализибад касибси виаслири, селра ахенри, амма ну гъимили вицилра, хлеси бархъдеш хебурили уэс вирули ахенра, ну кавшибси, гле, гле, ну кавшибси душман ахенри, дила шан сайри, дила гъарахъси виалра тухумра сайри! Хлеси илала у бурулра. Ил Расул сайри, Азайнихъа Хиядарла урши.

Ил верша сабабли нушала авал солдатра алхун – урухиубли, къараул барахъес катурси мерличивад ил вебшибсири. Ил хярамзада сабабли ну дила



марти авалра юлдашлизивад мяхІрумидублира. Сергей Артюхин, ил Ростовли-зивадсири, Фрунзелизивадси Тугельбай Аджиев, Грозныйлизивадси Нурудин Касроев, Москвализивадси Андрей Потапов – авалра илди багдадурла жан илини дайдахъиб. Илдачил варх нура чуйнара разведкаличи вякьунсири, илди дила уркИи-дулекІла узбигъунти бирутири. Расул уцира ва военный трибуналличи ваахъес набчи хъарбарибсири. Наб дигуси ахІенри илизив виркъес, амма командирла буйрухъ – ил наб закон сабри. Дила шилизив ил-гъуна пандахъи акІнили наб дебали децІигахъулри. Гъуйчив илини ваткааба или чуйнара тиладибариб, дила къяшмала гъалав къукьмуцикили, висивииб, бусравухъун, «марлира, иш Расул саю гъари?» или нура валли уркІухъунра. Илцадра увяхІсили адам чеваибси ахІен. Ил ваткаэс набзиб ихтияр аги. Нунира сахъдеш хІебарили вииши, ил багъбиубси бугъаван набчи чевхъун, тупанг кебасиб ва набчи бяхІчаиб. Илини наб тупанг иргъу или гъанбиркуси ахІенри, ну хІякизурра. Ил дила гъалав тІашлири ва къехІбаван гъинчІяхъили набчи лишанайсулри:

– Агъ, хІябра увяхІси увухъунри къалли, хІяжар! – ира нуни. – Биха дила тупанг!

– Вебши, вебши ишавадли! – чІярбахъиб илини, чили виалра сай лугъухІе-ливан. – Гъаммайруд каршури!

– МехІурга маркъуд!

– Масхара ахІен! – Иргъисра!

Ва дила михъирлизи селирил буцІарагахъиб, сегъунарил цІакъли ну гІе-лавяхІ къужварра, тупангла къяйкІла тІамара балли хІебакъира. Тупангра лайбакІили, ил вацІализивяхІ вебшили гъанбиркур. Нуни тупангличи някъби гъадатурра, гІур селра гъанхІебиркур. ГІяхІти адамтани ну арухилри бикІули лебри. Нуни иш кагъар хІечи лукІулра, ази сельсовет, ил адам хІези вагъахъес багъандан. Селра хъумартес асухІебирар. ХІези халаси тилади саби, дила бегІтазира саламти дура.

АхІерси ази, нушаб гъанна дебали къиянни саби, душмай сегъуналра уркІецІи бирули ахІен, багъиубли сай, амма илис диркахъес нушара бурси-диублира, биркра биркахъехІе. Дила халкъличи чедуркъахъибти, цархІилти халкъанасра хибти ишцада балагъуни багъандан нушанира чеббирцІехІе.

Ца базливан дуракайэхІе или чесибсири, нура дергълизи чарухъес хъу-ликІулра. ЧІянкІли фронтлизи, гъачамлис душмайчиб дила уркІили чеббицІи-ли ахІен. Нуни дила узбас къадинра чеббирцІис. Ца минуталра ташмишикІули ахІенра, багъиубси душман вячІи, сунела пукъалав гъина-гъинаварили вирниличи.

ЧІянкІли хІези дила ца халаси тилади леб, ази сельсовет. Ну хъуливхІели трактористли узнила хІекълизибси справка бархъа набчи. Ил наб дебали хІяжатли саби, танкличи гечиэс дигулра. Нушала танкани гъанна бегІлара цІакъти сари бикІар, илдала дебадеш багъес душманра къайгънаиркъули сай. Танкист ветаэс дигулра, танкличил душманти ганзбарес дигулра! Гъимили чархлизирти хІи рурхъяхъули сари!

Кагъарличил хІу паргъатагарварниличивад чеверхи. ХІечи белкІни къу-лайли чебаибсири.

Вассалам нура хІед халаси арадеш биубли дигулра.

*Коммунист Гусман».*

– Хяппу-Сягидлис ил – ванаси берхи ухуси бархилизир гурдухунти кьукь-лямцгьуна секлал сабри. Ил селичи дигара херсири, амма илгьуна хабарла бикъниличи гьеч херси ахенри. Ге, ил хабарли – хлябцали дусличибра къанни баклибси кагъарли Сягид таманни хлякизахур, тамашавахуб. «Гъанна иш сабри дила бекличи баклес калунси...» – зигариклули, хъантла суркбариб Хаппу-Сягидли ва сагали кагъар белчун. «Агъ, хлябилра къяанси масъала гъалабихьилри къалли хлуни, урши! Ишаб се барес гягнисил, бусягят пикрибаресра хейрар...» – ил гъарли-марли пагъатагарикиб, дургъби къалли жявлли тамандиубли сари, илдала тамри балли гъаннара дубуртазир гергералгъули лерал. Кагъарлизирти дугъби илала уркиличичи цабагъали челукулри: секъяйда иргъахъусив иличила халкълизи? Италара ишалара бегтикун мицирли лебал, кагъарличила цалилра селра балули ахен. Бегти хурматла адамти саби. Иш кабар сабабли илдала ургар душмандеш аллангу. Юх, юх, ил секлал бетаахъес асухебирар. Гур се бирусив гъати? Гъайгъай, Гусманна бегти разибирар кагъар касниличичи, Гяли-Къадила халибарг биалли децлизи биркур. «Агъ, Расул, Расул, хлярамзада уилригу хлу, се сабив хлуни барибси. Хлязлис уили ахенригу хлу дургъбази укъес гягнибикибхели дубуртази вебшибси. Дудушлира гуж-гужли варгисире, шантала гъалаб гяйиббарибсири. Гямру секъяйда дехидихьалра, илкъяйда арра аркъян биклули бирар. Хлунира вайтла дехидихьилри гямру, Расул, вайтла таманра дарри. Секъяйда виубсирив хлуни...?» – Хяппу-Сягид Гяли-Къадила уршиличичи гяйибта виркулри, ил сунелара циила биалра тухумдешла тем бетаибси адам вирусире. – Сегъуна цахдешал? Илгьуна гъанбуцес бирару бухнабани? Гусманна бегтасра гъамадли хлебирар илгьуна хабарла бакъес. Се барпалли гяхиси вара? Белики, чизилра селра хейклули, лехкахъни къулайси биэс? Хлябцали дус ванзалиуб калигу, гурра калаб саби... Эгер... эгер кагъар цархиллира чили биалра белчи виалли? Сибхят къарчигъанира белчес риригу, цархилти леблира белчес рири. Эгер илини белчи риалли, ил лехкахъили херуар. Гяхил ралуси сари ил нуни...» – Хяппу-Сягид децлизи викили, кабинетлизив итара-ишара вашулри, ахирра вамсурли улкъайла гъалабси уталичи кайиб.

Хапли цархил пикрира илала беклизи дисван къизбикун. Гъалабванригу дургъбазиб алхунтас шила дублаб памятник барибси, хлябэсилрил, авэсилрил Расулла у сабри, илала бегтанира беглара дахъал харжани дарибтири. Расулла дурхнанира багъалли иш хабар? Илала дурхникун республикализиб хурматла адамти саби: ца урши инженер сай, киибил – сегунтирил гилмуртала доктор, хлябэсил рурси – дурхнала поликлиникала бек тухтур. Адамла ламусра лебсигу... «Дила ламуслира вайгъабза гевхерцу я гяхигъубзнала урgab илала у кахлевлаху. Агъ, Гусман, хлябилра гяхил биши къалли иш кагъар хлябцали дус гъалаб касибси виаслири. Белики иш секлайзиб Расулгунти вайгъубзни гяйибла бегти биэс? Декси мах чекабихьире хлуни дила хьуцрумачи, Гусман, – пикрииклури Хяппу-Сягид, илала беклизир гъар журала пикрумала рамчани гердиклури. – Адамти кагъарличичи бирхгеалли, се бирусив? гурра ну сабабтагив умцули сай или гъанбиркур, набчи гяйибта биркъес бехбирхур. Цархилти далилтира агара дила. Нуни баласра Гусманни набчи къянала кагъар хелукни, къяна лукес илис хляжатсив? Гур Расул чина викибсил, илала къисмат сегуналра белгили ахен, ил уцибсив, танбхлаварибсив? Белики сунела хатлаличи мукгурвакили, фронтлизи ча-

рухъи, игит ветаурли виэс, сунела хатІа сунела хІиличил адамтала ва ВатІа гъалаб чебахъили виэс? Или биалри къалли гІяхІсири, амма иличи вирхес хІейрар...»

«Пикриухъен, гІяхІил пикриухъен, ухъна. ГІядатласи чебла ахІен хІечи хъ-арбикибси, ил арцла я масла чебла ахІен, ил адамдешла, ламусла чебла саби." Илини сунела хала дудешла насихІят гъанбикахъиб: «ГІур биэси асарличила пикриухъен – илини гІякълу пасихІчеббирахъу» – гІе, илди пасихІти дугъби сари... Дургъбани гъаннала гІергъира адамтази чучила чуйнара гъанбикахъес. «ГІе, дила уркІи гъузгъалдибикахъири хІуни, ГІусман. Дила къайгъни итира камти ахІенгу, урши. Чевверхи набчивад, нуни хІечи сегъуналра гІяйиб би-рули ахІенра. Нушала хІукумат багъандан, нушала ВатІан багъандан хІуни жан къурбандарри. Азирна вархъсири хІу, урши, хІед суд ванзаличиб бегІлара бархъсили бирар. Амма ну пакъир ухънани се бирусил балули ахІенра къадин. Марлира , селичивад вехІирхъусирав ну..?»

– Сегъуна жагаси аргъ сабил! ХІеризи гъари гъаргала. ВяхІ, хІед се биубсив? – рикІар рухъна, ванати шинничил тІас хъули лебхули. – Хъябши житаван цІябси гІямзила дигІяникилригу. Дуравхъен, хІеризи аргъличи, тят цІикурла дяхІличи мешулигу... Агъа-гъай, дебали гъимукІибсигъунаригу, адамтала уркІбиалра мадылчад...

– Се? – сунела пикурумазивад чевсаргъиб Хяппу-СягІид.

– Адамтасра аргъ бумкъахъидну, бахъ дебали гІясили камайруд рикІулра.

– ГІе, гІе, гІяхІна, хІу рикІусира бирис.

– ХІера ишди хІед ванати шин, къяшми кадати, чарх ряхІятбирар.

– МажахІят дила рухъна, гъанна наб сели биалра ряхІятдеш гес. Дила гІямру чина дикибтилла балули ахІенра...

– Тамани уркІагариублирив? Жагъилван вашу-арашули леврину, ца бархІила ухІнав ухънакаили сай. Чуйна ирав хІези хІянчи бархъбати, пенси-яличи арукъен или. Жагъти бузаб, гІямрулис гібси хІебиэсгу ил къуллукъра, зигаръалара камдирар.

– Наб дигули ахІенра зигаръала камдиубли!

– Сен дебали вявикІусирив? Багъи, ишаб хІела хІукумат бузуси ахІен. Адамтани валхІелули виадли, нуни валусири хІу сегъунарил. ВяхІ, гІяжаиб-деш хІебиалли... – пурхуррухъун рухъна сагаси урхамван. – Се кагъар сабрив хІечи хибси? Чили бархъибсив, гъари чебаахъа, белики гІурра дигайлизи ахъили вииши, дояркаби гъанбикилив?

– ГІурра къясрирули лералрив? Агъ, дила рухъна, жагъилтас гІелахІе-рулхъад къалли хІу.

– Урези агар, хІунтІеналра хІейубри къалли. Нуни хІебалулрав хІу фер-мабази селичи вашусирил. Итар хІела къалабати хІянчи лерли далан? Нуни лерил секІал далас. Багъи, их хІела машина нуни, валлагъ-биллагъ, къадала гербалтасра... Чинаба кагъар?

– Сегъуналра кагъар аги. – Хяппу-СягІидли пишяхъили къяна буриб. – Прорабли бархъибси кагъар сабри. ЖягІял шинна провод бузесиуси саби. Нура илав виубли дигули саби.

– Аллагълизи шукру. Шилизи шин леркни гІяхІси саби, илди турбабира секъяйда кайхъилил ахтардибара. ИшбархІи дузалли, жагІял жярга-зекъли гъадаресра асубирарну. Гъарахъли шинничичи рашес рамсурлира...

– Шин агарси шинна провод секъяйда къабулбировисив, хІейги. Цудара гІяргІяни, цудара гидгари хІебиркью. Гидгури цубаби дирар...

– ХІябра варскъа хІейадли. Се сарив илди гидгурачила мез? Шиннизи кадати къяшми, цадехІ лигубачи хъарахълри, вебкІес замана баили хІебиэсгу.

– Баили бургар викІула, дила рухъна.

– Юх, хІу илкъяйда жявли арукъяхъес валтхІелтари. Ну цунрухъахъес къасу? Вебшес дигулрив? Гъарахълри убшхІебшуд. СецадхІи нуни хІед савлира бархІехъра гІаслар ванати шин дихулрав? АвцІанну урчІемра дусцадхІи, рархълри рикІули ахІенрав?

– Рархълри рикІули рургуд.

– Рархълри рикІули хІерургусну, рархълри рикІула, тят шямван рархълри рикІула. Лябкъуси дуслизиб биалли мекъ барибхІейчирад шуцІали дус диркур, урусуну бикІуливан, мургъила мекъра бирехІе...

УркІиличи вайси хІебурцуси, хІялалси рухъна гъайлизи ахъиб, Хяппу-СягІидла бекІлизир биалли мирхъила тІакъалар мирхъиван гъар журала пикруми лукъулри, дучІулри. Сунела рухъначира ил разилири. Ил хуху агарси риалри, илис ванзаличив хІериэсра дебали къиянбулхъи, хІятта илхІейчи бикайчи кавлибалра белгили ахІен. УркІи къакъабакІибхІели къакъбахъеси адам мякълав левни – ил халаси игъбаргу.

### 3.

ГІергъила бархІи Хяппу-СягІидли СибхІят Къарчигъа раргесли бариб. Ил селис раргес гІягІнисирил илини пикрира хІебариб. Гъундурани белкахъунси сунела тазикра сельсоветла азбарлабад дураиб. Ил машина сасибхІели узикъарла урши шоферли катурсири. Ва сай бурсиварахъес илизи тиладибарибсири. ХІябал базла ухІнав ил машина бикес бурсивиуб ва узикъарла урши хІянчиличивад акъуватур. Гъайгъай, узикъарла уршилисра децІагиб.

– Сен илгъуна бировисив, ази?

– ГІягІнили саби, уртахъ.

– ХІуни ахІенгу наб хІекъ лугуси, хІукуматли саби.

– ХІукумат-декІар чилав? ХІукумат – ил ну сайра, илала давла мяхІкам-барахъесра набчи хъарбарибси саби. Ил секІал хъуммартид. Жавабла къул-лукъуначи кабибти лебтанилра машинаби дикес бурсибиеэ жявилл замана баили саби. Селис хІяжатсив абзур бурхІназиб жагъти адамти-шоферти илдас хІерли азбарлизи кабалтес?

– Демагог уилригу хІу, ази.

– Се ирив?

– Демагог сайри викІула.

– Ил гъайла мягІна къалли нуни балхІебалас, амма хІу бяркълчи викахъес хІейубси хІела дудешра демагог, хІела нешра демагог сари, хІура демагог сайри...

– ХІу илгъуна виъни балуси виаслири, сеналра хІечив узес хІякъяси.

– Ну мурталра ишгъуна вирусира. Илра багъи. Набчи гъимуркІес гІягІнили ахІен, уртахъ. ХІукІун чархлара някъбалара халаси къуват лебси адамри, колхозлизир биалли илдигъунти някъби диули ахІен. ПІегІдергурли някъбира, узен, сецад дигара хІянчи дирарну.

– ХІела насихІят агарлира гІямал бирис. Бузутицун букути биалли, урчи эмхІес гІелабулхъи.

– Гъанна диур, уртахъ, колхозла председателъличи гъаввакИ. Нуни вархъибсира или бура. ХЕла пасихИти пикрумира хЕла дурхИнас мяхИкамдара, илди дагъес хИу аркъухИели, илди дагъурли ну чарухъунсири.

– Машина бикахъес бурсиварни багъандан баркалла биэс хЕла?

– НушакИун тухумтира, сен-сен биалра далкадиркехИе. ХИуни къалли ну машина бикахъес бурсиварра, хЕла дудеш виалли нуни гИямру дагъахъес бурсиварибсири. Илаб халаси барседеш лебгу, вархъли викИули ахИенрав?

– АхИенри!

– ХЕла дудешлизира саламти дура...

ИтхИейчибад Хяппу-СягИдли машина сунени бикубли вирар. Эгер сельсоветтира, поссоветтира, райсоветтира, горсоветтира...цаца адам пайдаласи хИянчилис акъубаталлири, хИябилра гИяхИил бииши къалли или пикрибарибсири. Марлира, илизибад халаси гИяхИдеш бириб. Амма машина бикес бурсивиубли гИергъи илала рухънани сунес паргъатдеш лугули ахИен: «Нуни баласри хИу машина бикес селис бурсивиубсирил. Цабагъали фермабазира дубургазира къяйцИли вашулири..!» Сабур барес чевкъули саби, сенахИенну хъуна пикри ургИеббиахъес гъамадли ахИен. Дубурла гъундури сецад делсунти, чукълумарти диубли хъалли, Хяппу-СягИдла машиналис селра биубси ахИен. Шинкъбала къадала кацИес багъандан Ширила дубуртала сирт ахъес гИягИнилири. СягИдра вирхусири СибхИят Къарчигъа сунела хъулир рургниличи. Къадалаб машина батес ва хъурали илала юртличи – музаличи ваэс хИяжатлири. Чеди ацИес къияннири. Илисра гъанбикиб, эгер машина гИяхИси секИал биалри, дубурлантани лебтаничиб жявли гъалабал ил пикрибири или. Ил ГИинизличи ваиб, илабад СибхИят Къарчигъала ютра чебиулри. Ишав ил Хасбулатличил къаршиикиб. Гъайгъай, илди цали ца балути ахИенри.

– Ассаламу гИялайкум!

– ВагИялайкум салам!

– Наб Хасбулат бикИар, Чахлукъла шилизивадсира. – Хасбулатли пахруличил илала някъ буциб. ТИабигИятли ил мискинни ватурсигъуна ахИенри.

– ГИинцила шилизивадсира, СягИд бикИар. СибхИятличи гИяхИладли укъес дигула.

– Нура иличи вакИибсири. Унзаличир мегъ даргили, чарулхъусира.

–ХЕбиалли, нура хИязлис вакИили валанра.

– Нура... Белики, ракИесгу, камси замана гъатИи кавлехИе. Аргъра гИяхИси саби, ишарти мер-мусара жагатигу. Нура тамашавирула, сен адамти чИянкИти шурмачи минабиубти вара или. Ишдигъунти гИинзурби, вацИурби лерти мераначир юртани хИедирули... ЛехИахъи гъари арцантала далуйтачи?

– Нушала хала бегИтала пикрумира декИарти дурги.

– Диэсра асубирар. Ишди алавчарти дубуртачи, мер-мусаличи хИерикИухИели, арцантала макъамтачи лехИихъухИели гИямрура гИяжаибти секИалгу ибси пикри алкИули бирар. Марлира, чи дигара хИяйранвиру къалли иш тИабигИятли, гъар секИал чула мерличирван сари, селра имцИаси секИал агарсиван саби. Мусни-зубрира мекелли халаси цИакъли акИахъубтигъунти сари. ХЕла пикри сегъунав, СягИд?

– Дила сегъуналра пикри агара. Итира камли ахИен пикридарести. Гъачамлис ванзаличирти масъулти арзес гИягИнибиркур, – СягИдлис дигули ахИенри ил адамличил лякъирлизи ихъес, сай виалли пикриухъун: «Пягъи жагъанна-

блѳзи катурсири, ишар урцул зярхІтину, дерубти дѳхая или вявикІусири!» ва Гур селисрил иб: – Селра хІебирар, анкѳанир зярхІтира ухар!

– Се ирив?

– Селра хІеира.

– ХІуни бакѳиририв СибхІятли даргибти кагѳуртачила? – хѳарбаиб Хасбулатли.

Хяппу-СягІид Хасбулатличи хІеризур: «Марлира иш адамлира балусив кагѳуртачила?». СягІидла жавабличи хІерли кахІейили, Хасбулатли сай СибхІятличи кѳаршиикниличила, илини дургѳбази бархѳибти сунела кІилизан уршбачила хабар бурес вехІихѳиб. Узидешла хІяб баргибси экскваторщикличила хабар буриб.

– Нунира СибхІятлис газета баргира, дила пикри бархѳси буилри.

– Илала уршбачила белкІунси газета хІебиэс? – Хяппу-СягІидли гѳайла Пама барсбариб, ил адамличила пикрира барсбиресбяхІиб.

– Ге, СибхІят Кѳарчигѳала уршбачила белкІунси саби. Ма, белчІен дигалли. Акбаровхѳали бархѳли буили саби, илди ХІясанра ХІусенра буилри. Ил багѳандан илдани кІел патронниси кагѳурти кайхѳилри.

ГІусманна кагѳарличила пикриикІуси Хяппу-СягІидли, се биалра сагаси багѳишагу или, газета сасиб. БелчІун. Халаси гѳигѳра бушили, газета Хасбулатлизи чарбариб:

– Ге, чила дигара ванзурбачиб бургар нушала адамти.

– ХІуни балулрив, иш газета нушала районниси башуси ахІен. Ит бархІи гІяхІли бакІили лебтири, илдани хибси бурги. СибхІят разирарес ибси кѳасличил вакІибсири, – викІар Хасбулат.

СягІидра пикриухѳун: «Нуни касибси кагѳарличила иш адамлизи буришара? Дила мерличив виалри, ишини се баришира...» Кагѳар цархІил шилизивадси адамли касниличила, ил кагѳарла мягІниличила Хасбулатлизи хабар буриб.

– Селис пикриикІусиририв? – иб Хасбулатли, кайибси мер ункѳбирули. – Адамтани бархѳдеш багѳес гІягІнили саби, азир дус дикалра – илкІун сеннира мягІлумбирар.

– Сегѳуна бархѳдешал хІуни хІебалулрив?

– Сегѳуна дигара биаб. ХІуни хѳуммартид, хІурматла СягІид, кѳянала кѳуйрукѳ кѳантІси бирар.

– ХІу вархѳли викІули ахІенри. Ну викІуси бархѳдеш багѳалли, бахѳал адамти децІлизи биркни хІебалулрив?

– Гур се биубси лебсив? Бархѳдеш мурталра разисира хІебирар, разиси хабар мурталра бархѳсили уббулхѳулира хІебирар.

– Ну викІути адамти хІурматчебти, шантани гІяхІил балути саби. Итдицад дусми ардякѳи гІергѳи сагадан илдала хѳулрази децІ хѳурабиахѳес дигули ахІенра. ИлдикІун гІяйибла бегІти ахІен.

– ХІебиалли бархѳдеш вайти адамтани багѳес гІягІнисив?

– БалхІебалас. Амма итди адамтас чула тухумла баркѳудиличила багѳес хІейгахѳи, – Хяппу-СягІидли хѳантІа суркбариб.

– Селра хІеили, лехІкахѳни гІяхІси саби викІулрив? Эгер илгѳуна хІярамзадала у памятникличира белкІи биалли, игитунала умиван илала ура бучІули биалли, илди игитунѳи селизилра хІебирар. ХІуни хІед дигуси барес вирудра – ил хІела кѳуллукѳ саби... БерхІира гІелабиркули саби. ИшбархІи хІеракІесра

асубирар. Дигалли хУу кален, ну аркъясра, – викІар учитель Хасбулат, алзули ва сунела тужурка кайсули.

– Нура аркъяс. Ихаб къадалаб, дила машина хебалси саби. Дигалли хІура шилизи виахъури.

– Баркалла. Наб хъурали вашес дигахъис.

КІелра илди дякъад удибяхІ батбихъиб. Гъуйчиб илдас ухънара рухънара къаршибикиб. Яхши-хушдариб. Илдира СибхІят Къарчигъачи аркъути буилри. СибхІят Къарчигъани солдатунала жявхІелла кагъурти даргниличила багъурли, илдани чула авалра уршиличилара се биалра хІебалулил хъарбаэс лябкъути буилри. «Ца уршилаалра кагъар лебси биалри, – рикІар рухъна, гІяйсаличира хъаркарихъи. – Нуша чиналра къалабадикІули ахІенра, СибхІят чаррухъайчи хІерли дуэхІе». – Илди чедибяхІ батбихъиб.

– Чебиулрив хІурматла СягІид, – адамти гъаннара хІерли саби чула уршбачи, илдачила хабаралра бикъниличи умут бетихъахъули ахІен. ДургъбикІун хІябцІали дус гъаларал тамандиубтири! – викІи ухъна учитель, Хяппу-СягІидлизивад декІариркули.

#### 4.

Мурад барес хІейубли, Хяппу-СягІид хъули чарухъун. Ит къаршиикибси адамлизи кагъарличила хабар бурниличира пашманиуб. Эгер гъалаб чилилра селра хІебалуси биалри, гъанна ит адамли балули сай. «ДигІяндеш бихІес бирар кІел адамли, эгер илдазивад ца цІяб хІяблизив виалли... Парторгличил маслигІятбарес чебиркур. Белики илини се биалра гІеббурес. Илала дуравадра парторг МутІалибкІун ит душмайван ГІусмай тупанг игъубси Расулла риштІалгъуна рузичи хъайчикайибсири». Ил парторгличи хъули ацІиб ва ил илав варгниличи разивиуб. Мурталра къяйда иличиб гІяхІлира лебри. ГІягІнитира гІягІнили ахІентира гъай-мезлизи ахъибти гІяхІли арбукъяйчи хІерли калес чебуркъуб. ГІяхІли гъунибатурхІели, парторгли някъби тІинтІдариб:

– ГІур се бирусив дугІкаэсра лайикъли ахІенри, багалабиэси ца гъайалра буриси биалри. «Угъу!» ибхІели, «Агъа!» или къабулиркес чевкъурли. Нкъбира гІегІдергурли, тІентІла дуклума чердирхъутачи мешутири.

– Илди селичи бакІибтирив?

– Нуни чинабад балусив? ЦацахІели гъимидулхъан. Селичи, се барес бакІибтирив?.. Сегъуна биалра къуллукъ лебли биалри, декІарсири. ХІела буреси лебни балулри, амма бареси хІебагъурра. – МутІалибли СягІидлис мякълабси ута чебаахъиб. – Эй, хабчаб, хІела кухнялизиб се сабил игулигу. – Илини балулри Хяппу-СягІидли сунела мурадличила бурес гІелайзи арбухили виъни, ил багъандан хъунуйзи дурарухъахъес тІамадариб.

– ГІяхІна, гІяхІна, нуни аргъира, аркъула. Ази СягІидла дигІянси буриси бургар. Бара лишан бараллира, мура мурад иргъули рирус, – ил пишряхъиб.

Парторгла хъунул, ит хІярамзада Расулла рузи столличирти халдуртира ардухили, хъулирад дурарухъун. КІелра барх калунхІели сельсоветли биубсиличила буриб ва МутІалиблизи кагъар бедиб. Илини иштяхІличил белчІун. Кагъар бучІухІели илала дяхІ чуйнара дехІсурдиуб. Хяппу-СягІидла гъай илцад мягІничергази халхІедарибси МутІалиб кагъар белчІи гІергъи анцІбукъ масхарала хІебиъниличи шакикиб. Сунела хІулбачи вирххІерули, парторгли кагъар чуйнара някъбазиб ласбариб, чуйнара сагадан хІербариб, чуйнара адресра белчІун. Амма ил хатІавиркули ахІенри. Гъай сунела хъуна узи Расулличила сарри.

– Се бирусив? Ишкун кахси ацбуцкь саби... – Муталибли хьябцари гьаргбариб. – Сегуна дард сабил... Иш мусибат лебтаци кьячбилкангу.

– Ге, дец камси ахен, – илала пикри геббуциб Сягидлира.

– Бухнабани ишгуна бяхъ чекасес хебирар. Хуникун баладра илди зягипли биъни...

– Расулла дурхнас-деклар гьамадли бирару, илдас гьатира децигур. Нуни балула... Ху набчи гьимуркули хейиши?

– Ахенра, ахенра. Се баралли гяхси вара или пикрикикулра.

– Нунира балули ахенра. Хечил маслигатбарес ваклибсири.

– Гур чилила балулив иш кагьарличила? – децличил хьарбаиб парторгли.

– Кам-гьамли балутира бургар, – иб Хяппу-Сягидли, ил сягатлизир парторгла беклизир лукьути пикрумачи шакикили.

– Гьм-м, – Муталибли сагадан кагьар касиб. – Гусмай кьяна лукули ахенара? Белики ит адам гяйиблизи уцес дигули виши?

– Се сабабли гяйиблавирусив илини?

– Ила бархьси саби.

– Гусман нуни ункъли валусири. Ит ламус бирцуси адам ахенри.

– Гусма беггани балулив иличила?

– Илдани селра балуси лебси ахен.

– Гяжаибси хабар хири кьалли хуни. Се бирусив гьанна? – Муталиб гьалаксаурлири, хятта алгъай ляжира балли тьрхиканбиуб.

– Дила пикри хясибли, гьала-гьала бухнабачил ихтилатбарес чебиркур. Белики се биала геббурес.

– Гьангерцу или гьанбиркулигу, бахъ декли зягипли кьадин. Лебси децличи сагаси дец хьурабарни бетарули ахену?

– Цархил бареси нуни балули ахенра, – иш гьаклизир Сягидли някъби тингдариб. – Адамтани бархъдеш багъес гягнили саби.

Кабихьес хядурбиклуги бухнаби – Хяйдарра илала хьунул Шамалара – хабарагарти гяхлас разили ташмишли гьунибаиб. Кьанни башути гяхлазибад илди мурталра урухкутири, илдигунти гяхлани гяхдешла хабар хлебихни балусири. Ил багьандан биши, хьа бегганира дурхнала уми айхули, илдала арадешличила хьарбаиб, илала герги ряхятли гьигьбушиб. Ухьна чукуьасири, назиксири, илала хулби дишунтигунтири. Вяшаталара багьлатири, херлизиб мицфирдеш лебсигуна ахенри. Рухна риалли гьачамлис сарехурсигунари. Буруливан, чидилла бек жагасив или хьарбаибхели, рухнани сунела бек гьаббаклахьиб. Иличи хериклухели илини муруйс гьалаб дунья бархьбалтничичи вирхесли ахенри. Шамайли гьариллис ца хясибли дертур ниъла хьабни дагьардиахьуб. Гяхли бахьли калун гьай дехдихьес хебирули. Гьала-гьала диркьу-далтутачила, аргьличила гьайбикли, аргьличила вахьли гьайикесра вирус ахенгу, хаслира илгуна кьанси замана! Сягид Муталибличи хериклури, Муталиб – Сягидличичи. Ухьна Хяйдарлира ил секлал хясиббариб.

– Гяхити ягьурт лер кьалли хела, Шамай, – ухьнала хер чебарбукес дигули, Сягидли лехдеш буун.

– Хушани се сабил бурес дигутиригу. Бурая, бурая урки гилдихлебиклахули. – Ухьнани сунела бухна кьальян балбариб ва мурхьли пахьбариб. – Бурая, дила гьанкра илцад паргьатси ахенри, дуги халкъсун усаэсра хейубра. – Хабар кьалли гапла ахен, хурматла Хяйдар.



– Се биублив? – уркIухъи илдачи вякъизур ХIяйдар.

МутIалибли селра эс хIейуб. Иличив сай виштIаси хIейъни балули, Хяппу-СягИид саби бакIнила мурад аргъахъес вехIихъиб. Илдала урши Расулличила буриб, илдани биалли ил дергълизив гъабзаван вебIибсилизи халирусири. ГIусма кагъарличилара чебетаахъили буриб. Илаб бегIлара кахси –хабарра агарли чебихъунси лехIдеш сабри. Рухъна хъа гIямзилар житаван къурризурли, лехIкахъилри, ил руржусигъунари. Ухъна хъанцIиуб, сунела хIял хIебагъахъес дигули, сабурбирулри. Амма сунела уркIила ари буцес илис цIакъ биули ахIенри.

– Эгер хIуша ну инжитварес дакIибти диадалли, лягIнат бакIабгу хIушачи, – цулби агар къакра вяшарбикIахъули, ил бакIибтачи вехIизур. – ХIушани буриси марбарес даари далилтира диэс гIягIнитигу. Эгер ил секIал мархIе-барадалли, Аллагъла берхIиличира, дила унабурхI ахъахъес хIедалтарая... – ухъна ХIяйдар харчизур ва чидил дигара гIяюркъя къясиэсли, кункли лацличи баршибси кIел хIярала бегI тупанг накъбази касиб. Ила хIярхIуби кайхъиб. Лацличи къакъра барили, ил унзала мякъла тIашизур. ХъехIикIесвяхIиб, илала къяшми руржулри.

– ХIу вархъли викIулри, хIурматла хIяйдар. Нушара дирхаэс хIедирули калуна. Иша дакIес гъалар гъар секIал пикридарибтири. Нуша ишкъяйда масхуртачил дакIибти хIедийни хIунира багъес чебиркур... Эгер цархIил бареси лебси биалри, иша хIякънира багъи, – Хяппу-СягИидли солдатла хIябмузан кагъар дурасиб. – ХIера иш кагъар, хIурматла ХIяйдар. ГIусмай белкIунси саби.

– Сегъуна кагъар? ГIусманкIун дергълизивад чарухъунси ахIен. Дила уршиливан илинира жан къурбандарибтири.

– Иш кагъар лерилра хIябцIалилра дус ванзала удиб кали саби.

– Гъанна набзи чебаахъес сабив хIушани иш ванзалиубад дурабитIунси? Гъанна, ца къяшличил ну хIябла дублав тIашхIели? Ну ванзалиу къужварес багъандан сабив иш ванзалиубад дурабитIунси?! – ухънала вачавархидеш багъес къиянни ахIенри. Илгъуна агиличивси ил мехIуриэсра вири.

– АхIенри, дудеш. Жагъаннаблизикабгу хIед вайдеш биубли вакIибси... – викIар МутIалиб. – НукIун хIушала бегIлара гъамси тухум сайра, набчи гIяйиб бареси мер гъанналауб биубсира ахIен.

– Кагъар нушани баргибси ахIен, Буртау-Шурмазиб СибхIят Къарчигъани баргили хибси саби, – марвиэс дигусин викIар сельсовет.

– Юх, юх, иш бархъси ахIен, наб вайдеш биубли дигутала къунби сари... – вявъиб гIямзилабад хапли черсаргъибсигъун рухънани. Илини сельсоветла гъабуцибси някълизиб кагъар чебаиб, ил хъямбариб ва цулбачил, някъбачил бутIнадбиресряхIиб, чIябарличи игъубли ганзрикIесряхIиб.

– Селра биубси лебси ахIен, дила урши верша ахIен. Дила урши гIяхI-гъабзала бекIали дергъла майдайчив алхунсири. Памятникличив илра цархIилтигъуна игит сай. ХIушани хIебалусив иличила!?

МутIалибра СягИидра хIякбизурли тIашлири. Къиянси агилизи бикиб илди. ХIйдарли тупанг убасиб, рухъначи гъамиуб ва рисуси рухъна паргъ-атриресвяхIиб.

– Селис ил баррив хIуни, дила хъунул, бархъдешкIун бутIнадбарес вируси ахIен, сецад кахси бархъдеш биалра, – ил цIали бигесра вируси ахIен, я кабушес вируси ахIен, – ухънала хIулбазирад нургъби лямцIдухъун.

– Ил бархъси ахӀен, бархъси ахӀен! – цабагъали ручӀулри рухъна.

– Къайрики, диурну. Бархъсил ахӀенал нушани пикрибирехӀе. ЛехӀкахъи. Эгер иш секӀал къяна биалли, Аллагъличира, нунира чеббирцӀис, чеббирцӀисра ибхӀели, гӀур цалилра къяна хӀебуресли! Ишди адамтани къянала хабар хили нушала паргъатдеш хӀебулъни хӀебалулрив? – симкъикӀули ухънани чӀя-барличирти кагъарла кесекуни далцӀун, СягӀидлира МутӀалиблира илис кумек-бариб. БутӀни цаладяхъили, ухънани кагъар белчӀун. Ил бусягӀят лехӀкахъиб, хъуна мякъла тахличи кайиб. Хапли Хяппу- СягӀидличи дугъаизур:

– Кагъар хӀечи белкӀунсив?

– Ге, хӀурматла ХӀяйдар. Заманаличибалра касибси виаслири. ИтхӀели чекасера гъамадли бириб. Буруливан, вайдешла къяшми духъянти дирар. Итди солдатунала кагъурти керисути вершабира гӀяйибла бегӀтигу...

– ГӀусма кагъар саби викӀуду?

– Ге.

– ГӀяли-Къадила уршила?

– Ге.

– Ге, итини къяна хӀелукӀни баласра... Юх, юх, ГӀусман нушаб душман ахӀенри. Амма селис хӀяжатсирив иш кагъар бучӀес, набчира бихес? Белики чизилра хӀебагъахъурли батес гӀяхӀси биши? Юх, юх, се сабив гъари нуни буруси, гӀягӀнилири, гӀягӀнилири... – ухънани балули ахӀенри се бурусил, се бирусил, урши гӀевуцеси сабабра аги. – Белики кагъар цархӀил шилизи бархъибси биэс, белики цархӀил шилизивра левли виэс илгъуна, белики илабра ХӀяйдарра ГӀяли-Къадира лебти биэс?..

– Гъайгъай, гӀяхӀ хабар ахӀен иш, амма...

– Таш, таш гъари... иш кагъар ГӀусма бегӀтази чебаахъирав? – някъба гъакӀикӀули хъарбаиб ухънани.

– БегӀгӀалар хӀушачи дакӀибтири. Итдази чебаахъибси ахӀен.

– ХӀебиалли итдани хӀебалули балан.

– Балули ахӀен.

– Дила урши, итцад къиян кабихъили, халаваахъибси дила Расулли ГӀяли-Къадила урши кавшес къасбарили валан... Илра ванзаличив хӀерирахъес, гӀямру дагъахъес бегӀтани айкъурсиригу. Гъанна биалли, итцад замана арбякъи гӀергъи, нуни балулра дила урши вершавиъниличила. ИличикӀун мурталра пахру бирули вираси, илала у белчӀес гъар бархӀи памятникличи вашаси... Гъанна се бирусив? хӀебиалли памятникличибси дила уршила у убкасес гӀягӀнили балан? – сунези сай гъайикӀулри ХӀяйдар.

– ВикӀмайкӀуд илкъяйда, лехӀкахъи, лехӀкахъи, – гӀурра симкърухъун Шамай, илала михъирличи бекӀ къужбирули. – нуни ил хабар чекасес хӀерирус. Ватирая паргъатли дила урши. ХӀушази тилади саби, батирая илала у!

– Юх, неш асухӀебирар. Нушала уршили нуша цахдарилра. ГӀядабси секӀалгу ил! хӀярамзадала у гӀяхӀгъубзнала умачил барх биэс хӀебирар!

– ЛехӀахъи, лехӀахъи, хӀела жайчира или майкӀуд, – сагадан зигаррухъун Шамай.

– Уршини нушаб цахдеш хиб! Цахдеш, сегъуна декӀси цахдешал! Бархъдеш сеннира мягӀлумбирар! – ХӀяйдар гӀяхӀлачи дугъаизур. – ХӀушази халаси тилади саби, гъатӀира кахси анцӀбукъ хӀебиахъес иш кагъар малугада ГӀусма бегӀтази. Дила уршила цахдеш набчил батирая. Вайдеш алкӀахъуси вайдеш хӀярибихъес чебиркур...

– Гъайгъайра, хІурматла ХІяйдар. ХІу вархъли викІулри, – иличил къабу-  
ликиб сельсовет. – ХІу викІуси бирехІе. Кагъар ишаб балтехІе.

– ГІусма бегІти хІурматла адамти саби. Илди нушачил мурталра гІяхІил  
бириб, сегъуна дигара кумекра бири. Нушала дурхІнала ургарти авара илдани  
хІедагъалли гъалаб саби.

– ГІяхІна.

– Гъанна нуша датабая нушала децІра нушара. ХІушабра дуги гІяхІбираб,  
– хабарагарси децІли ухъна дебали варсиахъуб.

– Ну каласли гІяхІси ахІенрив? – хъарбаиб МутІалибли.

– Вари, вари, урши. ХІура арукъен. Нушала децІ сен-сен биалра нушани  
чІямбирехІе. Дуги гІяхІбираб...

МутІалибра СягІдра хъулибад дурабухъун. Ши гъанкІли бертурлири,  
адамтани чула муэрти чедиулри. Чинабадрил бисуси хяла тІама чебихулри,  
уркІецІила децІ гъатІира мурхъбирахъулри. ДекІарбикес гъалаб памятникли-  
чибси улис се баралли гІяхІсилра вягІдалабиуб.

– Белики камси замана гъатІи баталли гІяхІси биэс. БухънабикІун бахъхІи  
кахІевлан... – Иб СягІидли ва бусягІят пашманиуб ил бурниличи.

– Юх, – гъанна парторгли чІумали буриб, – гъаннала гІергъи икІдани па-  
мятникличичи ца къяш кахІейцІу, – илра цабагъали илдачира пикривикІулри.  
– Белики чилра агархІели, дугели убкасиша, хІурпри сарил кадикибти дургар  
или ташмишли кавлан цархІилтира.

– Гъай-мез дехІдирхъур, лебилра хъарбикІес бехІбирхъур. Ца хІуйзив  
сукъур виалра, нушала географияла учительлира бусагІят бала, цархІилта-  
ничиб гъалаб чебиу.

– ГІур се баралли гІяхІсив гъатІи?

– Гъар секІайчила учитель Рабадайзи бурес чебиркур. Илини нушала  
пикри иргъу. Сайра дургъбазив калунсири. Сагабараб, ила белкІеси цархІил  
ура лебгу хІядурли.

– Ила белкІести гІур чихъали лебтив?

– Леб.

– Чихъали?

– Итди ГІусмай сунела кагъарлизиб гъанбушибти. Ит нажас сабабли  
алхунти... памятник сагабирухІели илини Расулла у убайсу, илала мерличичи  
итдала умира лукІа. Бурули бираргу, гІяхІгъабза гъачам убкІар, вайгъабза  
даршна убкІар или.

Ил замана къанси дугила лехІдеш хъунул адамла чІярла тІамали буун. Хури  
гъямдухъун, унза-къапурби жикъдухъун. «Ца гъатІи мусибат». Сельсовета  
парторгга хІякбизур, уркІбухъун, цаличи ца хІербизур. Камси гъалабван чули  
бархъбатурси юргличибхІ дуцІбухъун. Гъаргалар ит рухънани сунела бекІ-  
личирти гъез къябдирулри, биса-яслизи гІелабикилри лебилра ютра. Хъулив  
виалли чІикъити ухъна геркавхъири, цІуба хІеваличир хІила дамгънири...

ГІе, дургъбла тІамри гъаннара къайдикили ахІен къалли, илдани гъннара  
чучила гъанбиркахъули саби. Дургъбала дяхъурбазибад гъаннара адамти  
улхулигу. Дургъбани гъаннара адамтала уркІурбази лишанайсулигу. ГІе,  
дургъбани уркІецІи бирули ахІен, гІямрулис акІахъубти адамти гъаннара  
гербалтули лебал, тѧп дявила майдайчибван. Дургъбани уршби хІебиркъу.



## Чилра ва селра хъумартурли ахлен



Сайгибат  
ГИЯБДУЛКАРИМОВА

### ДИЛА ДУДЕШ

(Поэма)

### Цаибил бутIа

Дургъбала гIеркъал гъуни  
Ахъири, дудеш, хIуни,  
Бикъри сари орденти  
Кабуцибти михъири.

Дурхъал чебла ахъири  
ХIунира ВагIа гъалаб,  
Жан хъябла дилгъутири  
Гъарил гъазала гъалар.

Финляндияла дазу:  
КIелра шайчиб душманти.  
Илаб бехIбихъибсири  
Дявила гIеркъал гъуни.

ДахъIи хIед муэртазир  
Гъанари кахти дургъби.  
ХIярхIубала заблиур  
Дахъалри детахълуми.

Душман кахли виубцад  
Кадилзутири даргъли.  
Амма уруххIедарра  
Царугдеш агар дергъли.

ХIяжар душма цIакъани  
ИмцIалири даршнажи,  
Жагъил СССР – къалли  
ХIербирулри даршули.

Гъеч хIерли ахIенсири  
ИтхIели ил дургъбачи,  
ЧIумали къякъбяхъилри  
Сунна асил дурхIначи.

Чебашулри финнани  
ХъусбитIи чIичIлумиван,  
Мирзачил барх бургъулри  
ХIябал гъатIи хайдакълан.

Дагъиста багъадурти  
Кабурхулри гъазали,  
ГIур ахъIейэсли душман  
Ганзварес къаслизибри...

Жинабилан ГIялира,  
Санчилан Агъажанра,  
Жавгъатлан МяхIяммадра  
ГIяхIмадкентлан Мирзара.

Гяли хІялумцІан сайри,  
ХІял буъла душмантала.  
Ца сайцун урхъусири  
Разведкаличи гьаман.

Гьачам хъарбаркъличивад  
ЧархІевхъун ил гІелавяхІ,  
Хья барра юлдашуна  
Дургъес илис къадинра.

Гьар гІергъи чумал бархІи  
Окопазир калунра,  
Берк-берж агарли, гушли,  
Дагъри думкъи дамсурли.

Урегал бургъайс ца къацІ  
Лугусири итхІели.  
Миъла къат бетаурси  
БуртІусири бардали.

КъацІличила ахІенри  
Бургъантала пикруми.  
Чедибдеш гьамбирулри  
Дуги-хІери бургъули.

Цаибси орден сархиб  
Ил дявилизиб Мирзали,

Гяизиз ВатІан багъандан  
Жан дедес хІядурсили.

ГІур Ленинград, блокада,  
Халкъла биса-яс, гаши,  
Лерил дяхІяэс халкълис  
ХІедиулри цІакъани.

Гаша дягІязибадли  
БубкІулри дургъбазибад.  
Агъ, бургъантазибси яхІ –  
ВатІайчи дигила цІакъ.

Азадбатур ахирра  
ГІязабтазибси шагъар,  
Западла шайчибяхІли,  
Бархъиб Мирзала гІяскар.

Душмайс гІергъибикили,  
Бетаиб Берлинниси,  
ГІяндакІес цІудар душман  
Ибкъаиб пукъализи...

Дарбадягъинбарили,  
Къур бушкуб фашизмала,  
Чедибдешра сархили  
Чарухъун хъули Мирза...

### КІиибил бутІа

АвцІану шура. ГІебшни  
Урзар ряхІмула забли.  
Чедибдеш хибси урши  
МяхІкамварая, зубри!

Шадлири дубурланти,  
Дургъби керхурли или.  
Амма дубуртазибра  
Вайберхуни лебтири.

ВатІан багъандан бургъес  
Дургъбази хІебьякъунти,  
ВатІан цІализибхІели,  
ВацІализи бебшибти.

Илди чебашутири  
Кебасес къацІ шантала,  
Муйли дургъбазиб сабти  
Хъунрачи, бухънабачи...

Вершаби кабушесцун  
Ахъбурцу Мирзани някъ,  
Дургъба дуунти делшес  
Бузахъу зугъаси къякъ.

Къасани черяхІтири,  
Пикруми хІялалтири,  
Амма паргъатти гІямру  
Гьачамлис чехІейулри.

Убберхуртира лебри,  
Лебри къачагъунира,  
ХІялай-залай бузути  
Лебри къучакъунира.

Илдала паргъатдешлис  
Къарауйчиври Мирза.  
Вайнукъабазибадли  
Урехи агар гъабза.

МВД-ла хІянчизар  
Мирза ибкъли узулри,  
Паргъатдеш хІебалуси,  
Илавра цаибилри.

Гъачам, хІекъли вамсурли,  
ХІянчи демжур замана.  
Сунела у ахъили  
Дакъиб ца ахъти тІама.

«Мирза! Узи, ахІерси,  
Юлдаш, дила дявила...» –  
Висулри ясир ахъли  
Вахъ разивиубдешли.

Разведчик ГІяли сайри  
Ил камерализивси.  
Хасси хъарбаркъличивад  
ИтхІели чархІевхъунси.

ГІергъиси хъарбаркъличив  
Ил душмайзи викилри,  
Сен баибал, игъбарли  
Ил мицІирли калири.

Илала хабуртаци  
Бирхарули ахІенри,  
ВатІан бициб вершаван  
Туснакъла катурлири.

Тамай умут бердибси  
ГІяли вахъ хумарлири,  
Бархъдеш якъинбиахъес  
БикърумагІив умцІулри.

ГІе, итхІели дявила  
Къяркъти сарри закони,  
Бирхаэс тахІяр аги,  
Лебри бахъал вершаби.

Иличи бирххІерути  
Ил валхІелути сабри.  
ХІякъикъат марбирути  
Документунира аги.

Ишав Мирза цугикни  
ГІялила игъбарбиуб.  
Мирза- бархъдеш дигуси  
Дубурлан игит гъабза.

Дугели гъанкІ хІехъили,  
ТІалабдариб далилти,  
Диванчибала гъала  
Гъаладихъиб баянти.

Варх калунси ургъанна  
ХІялалси у берцахъиб.  
Сунела адамдешла  
У гъатІира ахъбуциб.

Илгъуна вири дудеш,  
Дубурлан асил гъабза.  
Бархъдеш чедибикахъес  
Бири халаси гъаза.

Дири гъунибаъниби  
Шимазиб бучІутачил,  
Патриот бяркъ лугули,  
Дури илдас хабурти.

ВатІан мяхІкамбарахъес  
Ил неш къяйда дигахъес.  
МахикІи ил хъяшнази  
ДурхІназиван сунела.

Дургъбала кахси сураг  
Сипатбири лебсиван.  
Жан ахІерхІедарили,  
Алхун жагъилтачила.

Цала дайлаб секьяйда  
Бургъибал душмантачил,  
Чуйна сай цугикибал  
ДяхI-дяхIли бекIаличил.

Дургъбала гIеркъал гъуни  
Сецад кахси биалра,  
ГIязиз ватIайчи диги  
ЦIакътири азирали.

Илди дигили чузи  
Сархахъулри гъунарти,  
Арбикулри гъалабяхI  
ХIебалули урехи.

Мирзани душмантачил  
Цугбурци къачагъуни.  
Илдигъунтачи гъими  
Абилкъи жагъилтазиб.

АлкIаб урши алкIалли,  
Душмантачил ургъеси.

ГIязиз жан хъябла дигъи,  
ЦIализи ухIнавхъеси.

ЧумабикIулри улка,  
АлкIулри къугъал наслу,  
ТIашдалтулри шагъурти,  
Кайсулри багъудлуми.

ГIур дургъби хIедиахъес  
Дагъри, къасли бицIибти,  
Даршудешла къиматра  
Балулри дила халкъли.

ХIябцIали дус дузахъи  
ДухIнарти къуллукъуни,  
Чум-чуйнара баркалла  
Багъахъур хIукуматли.

Бархъдеш дигни багъандан  
Ил халкълисра дигахъи.  
Хайдакълантала ургаб  
Халаси хIурмат бири.

### ХIябъибил бутIа

ЦацахIели, кайили  
ДурхIядеш гъандиркахъи.  
Амма дудешлис бекIлил  
Селрайчир гап хIейгахъи.

Нешла ляв, дудешла дяхI,  
ДагъхIедагъур дудешли.  
КIел рузира узира  
Калун, бегIти бекIили.

Айзанатра Мирзара  
Бахъ биштIали лебалри,  
Халалгъуна рузини  
БегIтала мер буцилри.

Халал рузи Рукъият  
Колхозла хIянчиличир  
Рузиб, бархIи ахъайчи.  
Хъумачир, бахчурбазир.

Халати къайгъназирри  
Абикъес узи-рузи.  
Гаши хIедагъахъурли,  
ЗягIипхIебикахъили.

Лявбирули нешливан,  
Ванаси къацIли балхи,  
Рамсурли чаррухъункъи,  
Хъяшнас хабурта ругъи.

НКВД-лизи уциб  
Мирза учIули левай,  
Бахъ халаси игъдибар  
Бихъиб иличи ВатIай.

Сунечи хъарси хIянчи  
Жавабкардешличил бири,  
Жагъил гIулухъа урши  
Илавра цаибилри.

Узи вамсни агарли,  
Гъеч паргъатдеш хЕбали.  
ВаГайс къуллукъбирес ил  
АкГубсигъуна сайри.

Гур гЯрмия. Гур дургъби.  
Гъалабра буриливан.  
Михъир ордента баршиб  
ХъанцI зак зубуртаниван.

МалхIямси ва паргъатси  
Вири ил гIямрулизив,  
Адамтачи урКIеци  
Дагъардири гъар шайчир.

Барх бузути ва тухум  
Баркалла бикIи Мирзас,  
Гъар гъарилли хIебирул  
ГIяхIдеш бирни багъандан...

Чедибси Мажалислаб  
Саби бегIси юрт бири.  
Илав хъалибаргличил  
ХIериусири Мирза.

Шел дурхIяра, хабчабра  
Сабри итхIели лебти.  
Уржибси хъалибаргри,  
ГIяламли мяштIбареси.

Гур хъалибаргра сайра  
Шилизи аркъухIели,  
Сай вегIси ил юрт балли  
Щуръа дурхIялис батур.

ЧebxIси даражала  
Касахъиб багъудлуми,  
Халалгъуна Бадирхай  
Буциб дудешла гъуни.

Сай акГубси шилизиб  
ГIашбатур сагаси юрт,  
Чула гъалабла лебси  
Унра Шамайлис батур.

Гуш дусмала замана  
БегIти агар ятимти,  
Бедлуги детдомлизи,  
Кайсахъи багъудлуми.

Даим баркалла бикIар  
Дила дудешлис илди,  
ЧеряхIти адамдешлис  
Гъар ганзлизир дагъарти.

Алав шимазив цалра  
Агу дудеш хIелуси,  
БегIта чула дурхIнази  
Бурули сунечила.





**Байгинат КЪУРБАНОВА**



### **ДАРГАНТИ**

Даргантани духъахъу  
Мурталра чула хъуми.  
Усурбазир илдала  
Камхлейрар анкИи-мухъи.

Бузерилизиб хъархъти,  
Ламус барес гъалакти,  
Дунъяличиб аклубла  
Дагъистайзиб дарганти.

Дубуртазиб балгунти,  
Илди жагадарибти,

Гяшул къаркъа бяхъили,  
Шурмазир ца билкъанти.

Гямал биру илдани  
Урхъула лутИлабра,  
Адирхъу дуцИдухъунти  
Урчас лутИи-Гябулра.

Дагъиста ванзала дай  
Жагабарибси миллат.  
Хушаван эркинбиаб  
Ванзаличиб гъар уммат.

### **ЖАЙС ГЯЗИЗСИ**

Хед дигхейгулрив, урши,  
КарцИли гъайухъес набчил?  
Хялал дигайла анкИи  
Дилкъахъес гъар дуслизир?

Къас агарав маркали  
Кегес деръуб кIунтIбачи,  
МицИрариахъубли,  
Ахъруцес гъаваличи?

Ца хIечилцун дуртIсра  
Дунъяличир варъа-къацI,  
Вававан гъалахIебла  
ХIерикIус ну, мургъи-арц.

Дигайла хIял далахъис  
Лерилра манзилтазир,  
ХIебла вавни дигадли,  
Чеваргъи чиллализив.

Дурести дахъдаили,  
УркИи къаркъа бакИили,  
РяргИлрану, гъамии,  
Ванадеш ветаурли.

Гъугу, дила гъайкари,  
ГЯзиси дила жайс  
Инсан, ветаи хIу гIямрула  
Урцахъес ахъри кертIан.

### **ХIЕРИЗИГУ ЧЕРАЭС**

ХIу умутчеввиахъес  
Ахъри баргес умцIасра,  
КIиркадиубли набзир  
АхIекIуб исбагидеш.

Жагариэс рузулра  
Далуйтазир, дезназир  
Ну мурталра рулгулра  
Чариубли вакIахъес.

Дирутиван бикъридеш  
ДучІар арцанти закир.  
ДучІаб цІуб арцла зайли  
Дила рухІ дархти ахълир.

Далай дигайла лямцІла  
ХІяланас абалкунси,  
ЗайбикІаб хул хІейхъуси  
Дунъяличи карцІси.

ХІеризигу, кацІа ганз,  
Мургъилизиб шалал къаш,  
ЧяхІ-забла халал хІеркІли  
АрхІебухахъили къуш.

БусагІят гъала ляркъяс,  
НукІун жявлил хІерлира,  
Нураназир берхІила  
Гъар буркІуси бархІила.

### ПИСКИ МЯХІЛИС

Дагъистайзив хабарла  
Поэт акІуб даргала.  
Иш пасадси дунъяла  
Бархъдеш буруси дяхІла.

Лерил тугъи сар дархъти  
ХІела гъарил назмула  
Руржахъули биркІанти  
ХІяя дицибси нясла.

ВебкІибхъал гъанбик бихІу,  
Лебил Дагъиста халкъли,  
Хъумартахъес хІебирар  
Я дунъяла макрули.

ХІуни хІед ахъбуцири  
Байрахъ ахъти бургачи,

Гъунира кабихъири  
ХІела ахъанайгачи.

Азирти дусмазив ца  
АлкІан гъабза хІугъуна,  
УруххІекІули дяхІла  
Гъай буруси гъуцъуна.

Халаси бетакъ саби  
Варгни хІу ахиратли,  
Диаллира дучІули  
Булбулти хІела гъайли.

Вавалидяхъяхъири  
ХІуни Дарга, Дагъистан,  
УркІилаб хІела агри  
ХІянсавдулицун кавлан.

### МУГІЯЛИМТАС

ГІебшнила ранганазиб  
БугІардеш бархібхІели,  
Байрам мугІялимтала  
Сабиур бегІ дурхъаси.

МугІяллимти сабурла,  
Мубаракдирулра!  
Хялал бузериличил,  
ХІушала байрамличил.

Духудешра шалара  
ПарчдикІути гІякълула,

ХІушазир чедибдешла  
Дукелци имцІадикІаб!

ЯхІла цІакъ чекасибти,  
ДурхІни гІяхІил бучІахъес  
Дирхули гІяхІдешличи  
Къияндеш хъумуртути.

ДурхІнас умутла гъуни  
Мурталра гІеббуранти,  
Иш дунъяра бузуси  
Сабину хІуша гъанни.

**Аминат ХІЯПИЗОВА**



**ДАХЪ-ДАХЪАЛ ЛЕРАЛ ХЪАРТИ...**

Тухтур ретаэс къасри,  
Адамти арабиран.  
ИшбархИи цалра зугІяйс  
ХІедургулрагу дарман.

МугІяллим ризэс къасри,  
Калунра мутягІялимли.  
Хьуланала хІял умцІес  
ХІейуб цалра гІялимли...

Къас лебри, бегІла гІяхІти  
СанигІятуни дяркъес.  
Неш-дудеш, узби-рузби  
Пахрумани биркъахъес.

Румхира журабтани,  
Рушира къалтинтани.  
ХІулбани чебаибси,  
Бираси бехІ тІулбани...

РетхІеурра ну чилра,  
Рузасра сарехурли.  
Рамсурли кариилра,  
ХІеркІла къаркъаван релки.

Амма рухІ гьуцІли сари,  
АхъІехъибти дукъбачи.  
Гьанналаур къисматли  
КахІейхъибти дурсрачи!

КарцІлира, наб шигІрули  
Гьаргбариб Дунъяличи.  
Рирхулра ну дигила  
ЧеряхІти сихІруличи.

Дахъ-дахъал лерал набчи  
Хъарти дархІедарили.  
ШигІрули гІердурибти,  
Халкълизи хІедурили!

**УРХІЛА ДАРДАНИ ДИЛГІИВ,  
ЧУЛА ГІЯМАЛ БИРУЛИ...**

Ца рикІар: «ДилгІули сар,  
Дила лерил назмурти.  
Илбагъандан хІеделкІи  
Далтулра гІяхІти ибти...»

Итил рикІар: «ЛукІулра,  
Дигай, гІямру игути.

ДигІяб чили дигара,  
Наб багалахІейубти!

ЛукІулра, дард-шишимти,  
КарцІай уркІи буцІути.  
Чили дигара дигІяб,  
Шагъилис хІедагибти...

ДигІяб чус гІягІнитани,  
ДучІаб чус дигутани.  
Набван ахІи, имцІали  
Дургарну чус гІягІнили.

Гъарил дев белкІунсину,  
АхІерси уркІилавли,  
Мардешла мургъилизи  
Алмазла кІантІван велкІи.

Машгъурдешличи гъаргъта,  
ДелтІаб лерил гъарали.  
Дарх ардухес, белики,  
Дардани кІантІ агарли!

Тикрардираб дилгІули,  
ГъархІейзурти къасани.  
АзадхІебалтал уркІи,  
Буцибси бахъ къакъали.

Чус дараб хъуланира,  
Мурадли хІедаибти.  
Духаб чина дигара  
ХІуни делчІес хІейрути.

ЛукІула, рарг бигубли,  
Чедидурхути карцІай.  
Таманбарес я ахъри  
Я къас агарси далай!

ДигІяб! Се декІардеша,  
ХІу набчил ахІенхІели?!  
Жагъти дусмазив хІуван  
Цундеш наб ахІерхІели...

ДигІяб, чус набван ахІи,  
Дургар илди гІягІнили.  
УрхІла дардани дилгІив,  
Чула гІямал бирули?!»

#### САЙРА ВИКІУЛИ ЧІАКА...

Биризла къамаличи  
Гугбибси чякала,  
ХІулбуркІес къисматличи  
Леб давла – кІел дукала.

УрхІлизиб ахІен ари  
Сунела азаддешла.

Хазна саби халаси  
Ясир хІебиъни масла.

Адам, хІури ил чяка,  
ЧІянкІли дуклума агар.  
Сайра викІули ЧІака,  
Дунъяла масла ясир...

#### ИЛ ГЪУНИ АХЪЕСРИ ХІУ ДУНЪЯЛИЧИ РАКІИБСИ...

##### *Рабияс*

ХІейрар лукІес, дигайли  
ХІекъли ясирхІевцибси,  
Я карцІайли я децІли  
УхІнавад варг хІерцІибси...

ХІу гІеркъаси гъуйчирри,  
Мурадличи аркъуси.  
Агу гъигъбатесалра  
Мугълат хІела акъуси.

Майъала кІунтІри къяйда  
АлкІули дирар тугъи,  
ЦадехІ чІярдикІар, чедир  
АрцурхІеливан къургъи.

ЦадехІли гъанбиркахъу,  
Савли аръализиб гІинтІ.  
ЦархІилта чебиахъу  
Вавалибяхъибси гІинц.

Хергъу барскъа уркъили,  
Левси хейъни ит игит.  
Пикрумазив шягирли  
Алкъахъу нарт я игит...

Хуни пикриварибси,  
Рирхаурли нартличи.  
Дурарухъири, руси,  
Чебяхъиси архъяличи.

Хед дигулри, ватанлан  
Виубли тят хугъуна:  
Марси, хъялалси, цакъси  
Аллагъла вакилгъуна!

Бирхауди – гъавлара  
Рухълара цабикъала.  
Хъулчира гъунартала,  
Далайла цара цакъра!

Ил ярагъ саби хезиб,  
Лямцла гярчумагъуна.  
Бицес, асес хейруси  
Лусентала яхъгъуна!

Ил гъуни чеббикъибси,  
Балулра черхерулкъини.  
Къисматла бяхъянаур,  
Къямаурли херулкъини!

Ху ил гъуни ахъесри,  
Дунъяличи ракъибси.  
Къяянти ва даимти  
Сар шягирла къел-херзи!

Дигай ва бирхауди,  
Ил саби хела лукъини.  
Дунъяла игъбар саби,  
Хугъуна шягир акъини...

#### ИЛ САБИ ХЕЛА ЛЕБДЕШ...

Рахли цакъла бегътани,  
Ху гъяйибла вирадли,  
Умудеш дахъ гъамадли  
Дику цудара набтли.

Гъамадли чус гъягъиниси,  
Левкури ху куцличи.  
Жаллад, хъулки, къасапчи,  
Алкъакадли такъсирчи!

Тарихлис гъанхедиркур  
Бархъдешгерти къанунти.  
Дунъяличил дарх акъуб  
Хъяяличил вачурти.

Чумла гъямру дячуна,  
Хъя гъярга хъяжарта.  
Бархъдешла, адамдешла  
Чус хъяжатдеш агарта.

Аллагълизи дугъайзи,  
Илхели ху, гъягъабза.  
Хъя ва рухъи дерцахъес  
Ахъри тиладибара...

Адамта сар лушути  
Къялкъини ва туснакъуни,

Гъазализиб улхули,  
Исули къуллукъуни.

Дунъяла базарличив  
Хейадли ху вачрукъя,  
Сайри ху талихъчевли,  
Сайри уркъини азадли!

Гъядабдикъаб мискиндеш,  
Ил саби хела лебдеш.  
Ца инсан къясхейруси,  
Чилилра кебхейсуси.

Хердара ара сагъдеш,  
Рухълара хъяялара.  
Хейуб вегъи ил давлала,  
Цалра лагъ мас хазнала.

Илди сар хекъели марти,  
Азаддеш гъямрулизир.  
Пасихъдеш мурхъдирути,  
Азадти гъилмулизир!

Рухъла адабла хъяли,  
Лебхели чихъ зубразиб.  
Викъен байрумти сари  
Гъязабти ванзаличир!

### ЧІЯНКІЛІ РУХІЛА ШАЛАЛІС...

Мірхъили уркІи берки,  
БацІбухъун вававанра,  
ШигІрулизібси сипат  
ГІямрулизіб агара.

Дигайлис сари дила  
Дезни, хІябкубти, тулкни.  
Чарх баршес хІедучира  
Мачни, кулухми, тІулкми...

ЦунхІерухъи, цундешла  
Някъ буцили рашула!  
РухІла умудешлисцун  
Нуни суждабирула.

ЛехІихъус адамгачи,  
Рирхарасра хІерирхасра.

Баркъ- бац ГІячихъдиайчи,  
Къимат гес хІерирасра.

СенкІун бегІла чебяхІти  
ХІебиркур гап-чяхІлиу.  
Къястала чябхъинтала  
Биркур чяхІ-чяхІлиу!

Илда чилалра гъалаб  
Марбиэс хъя хІебиру,  
Къияйзибтас бегІ гъалаб  
Бируцад кумекбиру.

Цалра ялгъан хІякимла  
Гъалаб бекІ ГІяшхІебурцу,  
Расли сарурчаллира  
Я гъалмагъдеш хІедирцу!



## ДИШТИАТИ ХАБУРТИ

Муталим  
МУТАЛИМОВ



### ЧИНАРА ДИЛА АБА?

Кишала дай шилизир, «Ява» мотоцикличи абара чературли, Гябдуллали Хъярбачи гъайбариб.

Шила дубла ваили, кункли УбяхИ къадала гуми ахъиб.

– Караџи, дила аба! – викџули сай Гябдулла.

Херикџар, ласяхъили, агара гџелар аба.

– Гъай аман, дила аба чинар черрикиб вара, – къакъавакџиб Гябдулла. Къалабали ласбариб мотоцикл, џџадедили хъярхъикиб аба раргес КишавяхИ. Бурямван дураикиб ил Кишала мурбази. Зарайзи хџерикили, гъуйчирад ляркъули, халаси махра сарра, илис аба џугрикиб, Гябдуллала урџила тимхъра царугкабиуб. ДяхИличиб разидеш-хџулбукџрила берхИи алкун.

### ИШ ДУНЪЯЛА БИШТИАДЕШ!

Чячян Залимхайчила тулкира бучџули, хъа бяхИ чятли балсули, Шягџбан серхурли сайри. Минут къайхџебикили, Шягџба мухИли бучџулри. Къанџили буралли ил гџяхџси гъавличиври.

– Иш дунъяла бишџадеш – дила чархла халадеш! – викџар Шягџбан, гъудурмай бяхИличи башахъули. Пегълачи Къурбанкъади, майъали чяхџикџули, устас чят гџеббаахъес гъазализи викилри.

Шягџбан хутџла гъимирти лерихИи ветаиб илди лерниличила илини хъумкартурлири. Хапли илала халча чегиб хутџла гимачи. Ахъуџиб ил, лайвакџиб чятла бадираличи. џа игъбарлисван илаб балбикџбти устнани Шягџбан уџиб. Верџахъиб ил Пџагъирли ва Къурбанкъадили.

џџубкавхъири капанван, «дунъя бишџџал, сай халал». Чукурлири, рурџулри, бара баркъџбси гежбаван. Бареси хџебалули, тџашкаџзурлири тџалван, Урџџухъи, хџяккаџзурли, деткахъилири гъайра.

– Гьу, гьай детахъилигу, «дунъяличи кахІерцан», илкъяйда хІянчи барес, хІуни вирхІейрни балас. Гьари, укьян тукейзи, кабуха яшав нушаб, сахаватли гьаргбара, гьабзаливан кисара. ХІу верцахъибти ишдас, бара гІяхІси хІур-матра, – викІулри АбутІалиб, ШягІбанна халал узи, ил зарайзи хІейкили, верциличи хІулукІибси.

### **АВТОБУС АРБУКЪЕС БИРУСИВ?**

Баку шагьарлизир чус гІягІнити чІянкІира, талхІяна-секІалра, хьули чар-бухъес автобуслис билетунира асили, мурул-хьунул шагьаркад къунзбухъи саби.

Мурул:

– Раши, автостанциялизи аркъяхІе, автобус арбукес гьанна замана биулину.

Хьунул:

– Билетуни нушазир диалли, автобус арбукъес бирусив? – къабулхІейкиби ил муруйчи.

### **НУШАЧИРА ЯРГА БИУЛИ САБИ**

– Гьанна, дила юлдаш МяхІяммадхІяжи, 30-ибти дусмала адамти уббетурхули саби. 50-ибти дусмазир акІубти нушачира гьамли ярга биули саби, – викІар АбутІалиб, бялгІяличив сунела бажа Пахрутдинничил тІашизурси МяхІяммадхІяжизи.

– Ну 50-ибти дусмала ахІенра, 1955 ибил дусла сайра, – къабулхІейкиби ил АбутІалибличил.

### **ДАШИРАЯ, РАЗИЛИ ХІЕРКАДИРЕХІЕ!**

УрчІемцІали ибти дусми. Сунела машиналичир тапанчаби лерси Избербашлизиб гаишникунас машина тІашхІеили, Мяммани, илис цІа дедиб. Шагьарла къакьурбазив илдазивад вердес пикрибариб. Амма гаишникуни гІеббаиб. Кьалмакъар демжур.

Мурталра паргьатси ГІямар, битабани бирхьути милиционертази:

– ГІяй, хІуша Аллагъли датарти, даширая, разили хІеркадирехІе!

### **РАЗ, ДВА, ТРИ ...**

Уркухъла Шурагъила хъябличиб машина бакІайчи хІерли тІашбизурти мурул-хьунуйчи ца бержибси гьамиуб.

– Гьари, дядя, – викІар ил, – делай со мной раз, два, три.

Селра хІеили, хъярбукай бержибсиличил дарх упражнениеби дирули сай. Баргбердес хІядурси цІудара къириван каризурси сунела хьунуйчира пикри бяхІчихІеили.

Цакамти зарядкара дарили, илди Шурагъила хъябличибад шалгІеббухъи саби. ИлхІели хьунуй гьанхІедуциб:

– Се мурул вирусире хІу, пандахъи! Бержибсили цархІил секІал бара ибхІели, хІуни ил бирусирив? – гьимила цІали иртес карили сари муруйчи.

Дунъяла къакъличир дахъал гІяхІтира вайтира чедаибси, Мажалислизивад шилизи бялгІяличи льякъуси урибси дяхънуша, хІунтІена партизан ГІябдулжалил, хьунул паргьатрирули:



– Хѳера, хъунул, раз, два... хѳедарибти чятлизиб гербикѳули. Бара илди Шурагѳила хъябличибад шалгѳеббухъунхѳели, бержибси цархѳилличира раз, два... дарахъес гъамиуб. Илдала къалмакъар демжур.

– Чятлизив герикѳни гѳяхѳсив, цакамти зарядкара дарили, вегѳла гъуни барни гѳяхѳсив? – пишяхъилри Гѳябдулжалил, сунела чѳим-чѳимгъунти супелти уктемли лусули.

### **ШУЦАЛИ ГЪАТѳИ ИМЦАДАРА**

– Ягъари, дила урши, хѳуни лушуси ахъси юрт дила юртличи берхѳи кабухъахъес диргалабулхъули саби, – зигаррухъун сари-регѳси юртлизир хѳеррирусѳи рухъна.

– Гѳур ахъбурцусѳи ахѳен, неш, – паргъатриулри рухъна, дицес хъулри дирусѳи давлачевли.

Баягъи ил замана ила хъулри дирусѳила юлдаш гъамиуб.

– Арц дарес дигив? – хъарбаиб илини юлдашлизи.

– Гъайгъайра, чис хѳейгахъув арц? – пишяхъиб ил юлдашла гъайличи.

– Хѳебиалли, ма ишди шуцали азир къуруш, каруша ит рухъна, – викѳар юртани диран. – Гъар бархѳи зигаррикѳули, анцѳрукъи сарину.

– Шуцали азир камли сари, илдицад гъатѳира имцадара, шайтѳан шахѳебикахъили, илала анцѳбукъ ибгисну, – пишяхъиб ил.

### **ХАЛКЪЛА ПОЭТ**

Ца поэтлизи хъарбаили саби:

– Сегъуна вирусѳи гъарли-марси халкъла поэт?

– Гъарли-марси халкъла поэт вирусѳи сай, – иб илини, – сегъуналра декѳардеш агарли халкълагъунти произведениеби лукѳан.

### **СЕ БИКАЛРА БИХЕН**

– Столличиб сегъуна-дигара беркеси балбикѳили бирар, дила урши, гъарил бикибси бихен, – рикѳар халасѳи хѳякимла хъунул, сунела мура шоферли хибти берклума дицѳибти пакетуни сайсули.

### **ХѳЯБДАРШ КЪУРУШ ЧАРДАРА, НЕШ!**

Хѳянчилавад вамсурли чарухъунси гаишникли, кисмазирад дакѳахъили, столличи арц кадихъиб. Ил замана илала неш хъули арацѳиб. Селра хѳеили, уршили хибти лерилра арц дучили, цархѳил хъули аррякъун.

Вачавархибси гаишник нешличи вакѳиб.

– Мар саби, неш, – викѳар ил, – лерилра арц хѳечи «хъу дерхъахъили» гибти сарри, илди хѳед диаб, амма зирнявван дергурли гибти хѳябдарш къуруш чардара, неш, илди набчи «хъу дерхъахъили», дергурли гибти сари.

### **ГАИШНИКЛИС ШИНИША ШАЛА ЛЕБСИ АХІЕН**

Гаишникли машина ташаиб. Водительра гаишникра бахъли саби-ургаб жалбикли калун.

– Хи хлунтена шала алкунтели, гайиубри, – виклар Гябдурашидлиз ГИИ-ла хланчизар. Ил замана машиналичиб анцибуки, Гябдурашидла халал узи Хизрира гаишникличи гамиубли сай.

Гябдурашид Хизризи:

– Иш гаишник викли сай, хлунтена шала алкунтели, машина таштели или, ну шалтевухунра или.

– Хи уни хтебалусив гаишникунас шиниша шала лебси хтебиъни, – иб Хизрили сунела виштал узизи дарган мезли.

Гаишникра дарган уили, Хизрила гайличи дукарялиб ва Гябдурашид гялалахтели, илала право чарбариб.

### **ХИЕЛА КЪЯШ БЯЧУНСИ БИАЛРИ**

Гярякыла шишара асили, уртахуни кофелизи гайиубли саби. Шиша лебси пакетла вегли, миъличив тясухи, кайкили сай.

– Дила пикрили, шиша бячи саби, – виклар кайкибси.

– Шиша хлябчи, хела къяш бячунси биалри! – виклар клибил.

### **ПАПРУСЛА ЛАГЪ АХІЕНРА**

– Бархли ахъайчи тел-хлябал такъа хтедиуси, хи уни сен-сен виубри папрус лайбаклес? – хярбаиб Абуталиблизи унрали.

– Ну папрусла лагъ ахенра или, хулир калунтира юлдашунас дутили, ил лайбактира.

– Пур, хела хлясибли, папрус битликиси ну илала лагърав, гьатли? – пурхурухун Абуталибла гай гялхтедизурси унра.

– Ил сектал гьарилли вегли кабилзахъуси саби, – виклар Абуталиб.

– Хтебиалли, держла бужуси ху илдала лагъ сайри, Абуталиб, ахену, гьатли? – разивиублири ил, Абуталибла урцаси мерличи писдатес бикниличи.

– Гъагарли, ну гъачамлис держла лагъра, – иб Абуталибли, – амма илдасра дазу кабилзахъис.

### **«ИШ НУШАЛА ГУЯВ САЙ»**

Ца бекляхъ райкомла цабил секретарьличил, нясти гайли угъули, къалмакъарли виркули сай.

– Районна центрлизив сен хи уни иш хлушаб няс гайли угъахули валтусив? – биклар илабти адамти цабил секретарьлизи.

– Иш нушала гуяв сай, гуявла биалли, хурматбирес гягнибиркур, – виклар райкомла цабил секретарь ва къалмакъарчира илаб балбикити цархилти юлдашунира столоваялизи букахъес арбукиб.

## ЦА СЯХІЛІРА АБААЛА БИРУ

Ца меусишан хъунул адам Хъярбукла шилизи бетІу дицес рякьи сари. Ил сунела гІяхІял хъунуйчир тІашризурли сари. БетІула регІла вачар бетаахъес ца сяхІ бетІула бегІлара гъалаб хъа регІли асиб. Базарличи, хъали-хъайгІи рикјули, гІяхІя бетІу дицили, ца сахІ бетІула кали саби.

– Ил сяхІра нуни исис, – рикІар гІяхІяйзи хъали-хъайгІи рашули рамсурси хъярбукан хъунул адам.

– ХІуни асибси бетІула сяхІлира абаала биру ( къагъкайрахъути хъара дархти бетІу дуили сари). – Чис-биалра цархІиллис бирцехІе, – рикІар меусишан.

## ПОЕЗДЛИЧИБТИ...

50- ибти дусмазив Хъярбукла Ждановла уличилси колхозла председатель Къулда Ражаб райкомла бюроличи живарили сай кІел хъунул кабиилри или.

– Чи сая илкъяйда викІуси, чили чебаилив илди? – къабулхІейкиб ил райкомла хІянчизартачил.

– Машиналичиб хІечил барх кІел хъунул адам чебаира или бурути леб, – викІар райкомла хІянчизар.

– Эгер ну поездличив аркъули виасли, поездличиб лебти лебилра хъунул адамти дила хъунри бирутив?! – гъатІира чІумали кайзур Къулда Ражаб.

## ВАЛЛАГЪ, ХІЯКЪЯД!

– Папрус лайбакІес дигусилис Кисловодсклизив гІяхІси тухтур тев бикІулигу, ил байтарман лайбакІес хІела пикри агарав? – викІар Каримличи шадив вакІибси юлдаш.

Карим селра эс бажардихІейкили левалли, илис хъунул ургарухъун:

– Валлагъ, хІякъяд, – рикІар ил, – дугели усухІели, някъбира дигъи гервалтари. – Папрус лайбакІес дигуси гъабзали, урхІла буйрухъуни агарлира, ил бархъбалта.

## ЦА ТІУМАЛА ХІУЛИ – ХІУШАЛА...

ВерхІцІали ибти дусми. Дехла машиналичив шагъарлизивад вакІибси ГІябдулкъадирла Шамсутдин сайри. Гъуйчиб миъ артІилри. Чиллала бугІярси бархІири. Машиналичиб Уркарахъи аркъути гІяхІцад адамтира лебри. КІишала сагаси гумиличи гъамбирухІели, машина хІусбухъун. Машинала ца хІула гумиличибад дурабетухъун. Машиналичибти адамти къалабали убяхІбухъун.

ИлхІели, машиналичив левси Шамсутдинна дудешла узикъар ГІяли-гІумарла ШапигІли, шоферличи гъамиубли, машинала хІулрумачи тІулра бяхІчаили, дукаркІули, иб:

– Ца тІумала хІули – хІушала, ца тІумала хІули – нушала.

## ДИЛА ДАБРИ АГАРА

Хайдакѡла ваѡурбазир, дучили гѡхѡцад жунаб, шилизибѡхѡ чарбухѡес замана баибѡхѡели, Рабаданхѡяжи сунна Сугѡманатлизи виѡлар:

– Нѡсдиуб дабриличил хѡу, ашна, камарируд дила машиналичи. Чердати хѡуни дабри, гѡур араѡи.

Чѡтдиубти дабрира Сугѡманатли лайдаѡиб. Хабурта бугѡули, абаиб Уркарахѡи. Кѡаѡла тукенна гѡалаб тѡашаили машина, Рабаданхѡяжи сунела хабѡаблизи виѡлар:

– Хѡули раибѡхѡели хѡед, хѡейгадли кѡаѡли руѡѡес, караѡину даари буханѡаби кадуха.

– Хѡерирус ну караѡес, дила дабри агара, – рикѡули сари Сугѡманат, дукарѡули.

– Лерригу хѡела дабри, чина дикиба? – тамаша-хѡяйранвариб хѡунуй Рабаданхѡяжи.

– Хѡу ахѡенрив виѡлуси набзи: «Чердати дабри!».

– «Чердати» нуни ира. Лайдаѡлакѡун хѡеира.

– Гѡанна бир се бирусил, нуни балхѡебалулра.

– Рукѡянну ѡай кѡяшмачил, буханѡаби кадуха, – дукарѡлар хѡунуйчив, Рабаданхѡяжи.

## ГѡАЙГѡАЙРА, МЕГѡ

Абадла абад мегѡла ваяхѡ дирусѡ хѡярбуѡайзи хѡярбаили саби:

– Хѡед мургѡи имѡѡали дигахѡиду яра мегѡу?

Хѡярбукан виѡлар:

– Гѡайгѡайра, мегѡ, вегѡра валусѡ, вегѡлира балусѡ. Се бариша наб мургѡи? Илизирад нуни хѡали ванабарес печ, арши иршес мирш, мура удес кѡялкѡя, вяхѡ берсес мутѡрус, урѡул кѡисбарес дис, хѡу баѡес дураз, вайлиу бигѡес ханѡал, дявлизи керхес тур... дарес хѡейрус.

## КѡАНРИУБЛИ РАКѡАДЛИ

Шѡолализи арѡѡути дурхѡнас палтар-кѡяш асес Рукѡятличил Гѡяли Дер-бентлизи гѡайиуб. Палтар-кѡяш, ручѡа-кѡалам, лерил гѡягѡнити асиб илдани ѡула дурхѡнас. Хѡули чарбухѡес илди хѡядурбиубѡхѡели, Рукѡят рикѡули сари:

– ѡа секѡал асес нуни хѡумртуррагу, Гѡяли! Бусягѡят, шел минутли ляр-кѡясну, хѡу тѡашизи.

Кѡалабали арѡѡусѡ хѡунуйс гѡелавад Гѡяли:

– Шел минут ну тѡашилзас, кѡанриадли – ватирхѡус.

Шел минут Гѡяли хѡерли калун Рукѡятличи, иѡцад замана калун хѡунуйчи хѡерли. Гѡурра камси замана калун ил тѡашизурли. Чархѡерухѡун Рукѡят. Гѡялини гѡанхѡедуѡиб. ѡѡадедиб машиналис, гѡайбариб шилизибѡхѡи.

– Гѡяли, хѡу чинав сайри, машина тѡашаибси мерличи ну раѡилра.

Телефѡйзивад Гѡяли:

– Мажалис бархъбатурли, ГІязизла гІинизличи левра ну гъамирули.  
– Чарухъенгу гІелавяхІ, ва дила, ГІяли! БархІехъла манзиллизир секъяйда ну шилизи чаррухъес рирусирав?  
– ХІед дигуливан раши. Дигалли такси буца яра чІакаван арци, – викІар ГІяли, Хъярбуки машина хъярхъбирули.

## ГЪЕЗ КАВДАН

Исрапил шагъарла маршруткаличи ацІибмад водительличи гъамиуб.  
– ХІела маршруткаличи кайънилис арцла мерличир иш гъез кавдан лу-гулра, – викІар ил водительлизи.  
– Ягъари, наб гъез кавдан хІяжатли ахІен къалли, дила узи, кайъи, аби-цІутас диргаламалхъадну.  
– Тамашала адам леври хІу, – викІар водидельлизи Исрапил. – ХІуни ца секІал аргъа. Иш хІяжатбиркуси саби къянкъубазир, нудбачир, лихІбачир дакІибти имцІякъти гъез кавдес, хІед биалли ил секІал аргъес дигули ахІенри.  
– ГІяй, дила узи, кайи, абицІути-кабицІутас диргаламайкІудну, хІу ил гъез кавдан хІегилира, хІед гІягІниси мерличи аркури, – викІулри водитель, Исрапил кайахъес мер чебиахъули.  
– ВяхІ, иш адамла мурдardеш, – къабулхІедикиб Исрапиллис водительла гъай, – ну хІези матъал укаба викІули ахІенрагу, ма, бусурман, хІед иш бага-лабирар, – викІар Исрапил, сунени барибси гъез кавдан водительлис арцлис къадин кабирхъули.  
Маршруткаличибад кабицІухІели, Исрапилличил рарх арацІибси хъунул адамлизи водитель:  
– Иш хІечил вархси ахІену?  
– АхІен, – рикІар мура авараличи гІясириубси Хадижат, сунесцун арцра дедили, маршруткаличирад карицІули.





**МяхІяммад КЪАРАТОВ**

### **ИШДИ АРГЪИБСИЛИС ДЕЦИГУР**

Абдал сунес чейгути хунклачи хІерхІейкІар.  
Эмхе бала лихІбачибли, беці цулбачибли, абдал дурутачивли.  
Чеваэс адам сай диру-далтутазив хІяйван сай.  
Лезмилизиб варъала вегІ сай, лезмила удив миъла вегІ.  
Хъуна уркІилизи викесличиб, вебкІни гъалаб саби.  
ТалихІли варгибсила дагъанира гидгури диркъу.  
Къаклабад канила бякъунси се биалра, илини зарал хІебиру, ил агъу  
хІебиалли.

ГІяяла базарличир арцантала ниъ терри дирцули или  
бакъира. Базарличи вякъи илдигъунти ниълигІив  
умціули калунра. Илгъуна ула дегІти кемпетуни  
чедаахъиб. Ну ниъ викІулра. Илав ну абдайзи вейгІунра.  
ВегІла кисалар арц диалли, чинабалра ваятІа хІебирар,  
хІурматра имціали бирар.  
Хъулки вилгІули тІашхІелзалли, сеннира туснакъла виркур.  
Къакъ халасилис дехра халаси бирар.  
ШайтІунти ца рангла сари бикІар, адамтиван ахІи.  
Цудара урчи сецад ицадлира, цІуббиахъес хІейрар.  
Мурул унзалавад айцІур сунела хъули, хъуна игнаба улкъайлавад  
аркъян.

Лерил гІямрулизив хІялалли узира. ЧІянкІули акІубра.  
ЧІянкІули убкІусра.  
Витибси виаллира, гъабза гъалав сай, лявварибси кІарзачив.  
ЛехІкахъили уъни гъалаб чебиис, вайси бурили, чи-биалра  
гъимукІахъниличиб.

Азгъин изусичивра вайси сай: изуси кайхъи къаціли  
хІевкар, азгъин кайхъира сай къацілира укули сай.

Америкала янкибас дигахъу чула доллар хайриласили биахъес, илдас ил  
дигахъес нушани кумек бирулра. Нушала къуруш убяхІбирули, дургІеби-  
ахъубли.

ГІяхІил валуси ца поэтла хІябличи вякьунра, умцІули хІяб хІилхІи баргира. Ил кьарли гІяргІячІай дебали берхьилри. Ила башуси кьяшла дякьра аги.

Илаб набзи пикри бакІиб: иш урибси поэтла хІябличи чилра хІешули хьумартурли виалли, ну бекІлилра хьумуртурагу ибси. Или бетарни нуни якьинни баласра.

Набзи тухтурли буриб, чакар мабукад или. МурихІедарили чяйла се-кьяйда бужуси? Зела тІем агарси беркала севан букуси? ГІявадеш агарси беркала декІар севан беркес вирусИ? ЦІуба кьацІ кьалли камли букусира, цІудара лебну. ГІур сели укусира зягІипси ну, нугьунти царавантира? ЦІудара кьацІра, цІуба декь цІудардарили, бирули саби.

ХІялалли хІериубра, мискинни калунра. Гьамтани булан абдайзи уйгІулра, гІурилтачила гьайра хІейкІасра.

Абдала мухІлилабад духуси гьай дурахІебулхьан, бикІар.

Нуни бикьули вирус, саби чули дебали духутази халбирутани, гьатІира дебали абдулти дурули или.

Жагьилтас хІяз-хІуз, разидеш, шадиб-гьундури дигахьу, бухьнабас ванаси хьулир кІантІити учебуш.

Вачрукьа, адамти биргІябиргули, гьамадли хІерирар. Хьубзар узули, кьакь балкІахьИ, хІерирар. Кьиянти чедиули.

Гьаннала замана вачрукьаби бахьал саби, хІялалли хІербирутачиб.

Давлачебти бегІтала рурсиличи хьайчикайалли, мискин бегІтала урши, хьалицІа детхІерар. Давлачебти хьубшунани мискин гуявлис мурт биаллира уркьубяхьуни дуру. Гьарилра уршили илди чехІейсу. Нуни гІяхІцад илдигьунти анцІбукьуни далас.

Нуни балас хуригьунти мурул-хьунул. Илдани гІуррара хурира адилкьули сари.

Шадив нешличил ваши, хьайчи рурсиличи кайиб.

Нуни балути кІел бухьна хьунул лебтири унраличиб, кІилалра цулби агартири. Илдани дигай дихьиб: цали дукІула чудначи, итилли чабдигуначи.

Жагьил рурсби, мадикидая гьар журала дакурбани дяхІ. ЖагьхІели итира жагати сарину!

Мадукадая дахьал муридешуни! КьутІкьути гІямру илдани мурихІедиру.

Дигай дакІудирар дуцІарти цІаван, детихьур цІала гавван.

ГІясиси муруллара, илгьуна гІясиси хьунуллара гІясити дурхІнира бетаур. Илдас магьар дихьибси малла гІясиси сайри вара?

БехІбихьуд агарли, ахир хІебирар.

– Далга диаллири, урши виркьаси, – рикІули руибси сари ца хьунул адам. Ил гамьа руибси сари.

ДурхІни баркьахьес ибси пикри агарсири илцад жявли. Амма хьунул илди баркьили уррухьун.

Дила бекІличирти гьез, дахьал сарли, дейгІес хІейрус. ХІуни хІела бекІличиртира хІейруд дейгІес, сенахІенну хІела бекІ гІяргІяла гидгариван амчІурли сабину.

Чис гІягІнихІедиркура муцІур лугІути гІягІнихьала? Илди гІягІнихІедиркур муцІурличир гьез хІедашуси кусас. Михьирличиб улкьай биубли, дуньяличир кадиркути уряхІти анцІбукьуни чедиалри, се бикІишира пакьир уркІи?

Бархьси бяркь бедибти бегІти дурхІначи кьакьахІебикІур.

Нуни ралас ца хьунул адам, дяхІличи хІеризадли, илала гьайличи лехІахьасли, алжанала агьлулизирад ракІибсигьуна сари, амма уркІи жагьанабла кьадаларад дурарухьунсилагьуна саби, берхІибси, адамтачи кьясси.

Бархьдеш дигусини бурибси бархьси секІал хІейгули саби гьанна бахьлис. Чихьалив илди? Илди саби хІярамти, кьунба бугьути, хьулкидешлизи абархИбти нясани.

Гъаннала цацабехІтани лукІути дучІухІели, гъанбиркули саби, учІес бур-  
сихІейбли калунси виасри или.

ИшхІелила цулбала цацабехІ тухтуртани, изуси- хІейзуси, кариесли бер-  
гунси хІеили, гъаларад гъалли цулби адилтІули сари. Чула цулбас чІямбареси  
кабурхар или гъанбиркули, урухІухІели илда биркъутира? Яра арцра имцІали  
сасес багъанданра дирути авара хІейалли.

Нуни аргъира, юлдаш, хІуни бурибсилизибад селра аргъес хІейъни.

– Набчила чилилра вайси бурес хІейрар, – викІар ца тухтур набзи, ца мер-  
личи кадиили дукули джули лерли.

– Гъайгъай, хІебирар хІечила илдани я гІяхІси яра вайси бурес, – ира нуни.

– Сен хІебирутив? – викІар набзи, мякълав, ца столла гІелав кайили левси  
хІябэсил.

– ХІуни хІебалулрив? ХІебаладли бурис. Ишини гъяраибти лебилра беб-  
кІили саби, бикІар.

УркІи лебниличила хІебалусилизи ил лебни ва чиди мерличиб лебсил  
балахъу дигайли.

ЦІуръаби, мискинтачи къисмат гІяхІла шайчи шурбухъи гІяхІил кабиалли,  
гъалаб илди хІебалути гъамти дакІубулхъан.

Шилизиб лебти дила юлдашуну дебали камбиуб, – викІула ца варх уз-  
усилизи.

Бахъал бебкІибу? – хъарбаиб илини.

– Ца-чумал бебкІиб. ГІурилти леб. Илди давлачеббиуб, мискинни калунси  
ну хъумкартурра.

Ца дила юлдашличи чІичІала къацІбики саби.

– Ил вебкІибу? – хъарбаиб мякълавсини.

– Сай хІебкІиб, чІичІала бебкІиб. ЧІичІайзибичиб агъу илизиб имцІали  
буили саби.

ХІушала арадешлис кайкІули ужусири ца тянишси гъар замана. ЦархІил-  
тас арадеш бедлугули, ил сай изескахІиб, дахъал джули. Сунени арадеш  
бедлугутани ил хъумкартур.

Леб саби чихъти бетаэс къайгънабиркъути адамти, цархІилтачиб саби  
духутира или вяшбикІути нушала лукІантала ургабра. Амма цацабехІтани  
хІурматла мерлаб нягІна сархули саби, саби ургабти адамтала.

ГІямрула гъунчирад дархъли дашула или гъанбиркути леб нушала ургаб.  
Амма илдазибад цацабехІти шақхІебиркули саби, хІяжардешла гъунчибад  
аркъули биъниличи.

Петр Цаибил! КацІи мегъла урчиличивад! ХІуни чехІебиулрив Россия гІур-  
рара муцІуртала бегІтани бицІили. ХІу агарли илди чили лугІяхъув? ВехІихъи  
хІела у бихуси шагъарлизивад. Нушачи Дагъистайзи саэсра хъуммартид.

\* \* \*

– Ил муцІурра хІура, хъуну мякълав калхъахъулрив? – хъарбаира ца жа-  
гъиллизи. Ил гъимукІиб набчи. Селра хІеили мякълавад арякъун. ГІяхІцадхІи  
салам хІелугули сай, гъайхІейкІули сай. Се чІинкІир вирусив, сунела дуде-  
шличивра халасилизи салам хІелугуси чІинкІир?

\* \* \*

– ВяхІили хІечил къалмагъар дарибси Халикъличил варшилрив, сегъунав  
хІела пикри икІ вайси адамличила?

– Гъанна вайси викІес хІейрус илис.

– Сен хІейрусири, гъалавван вайтІа ургъули левригу икІис.

– Эй! ХІуни хІебакъили ургуд. Гъанна ил сельсовет сайгу.



\* \* \*

Ишдусла хЕблизиб хабарагарли лебилра дунъяличи тИнтІбиуб гъалаб хЕбиубси вайси изала. Илала кЕл-хІябал у лер. Сен ил изайс хЕбихъибсив «Китайнка» – ибси у яра «Янки» – ибси? Итадли саби, бикІаргу ил тИнтІ-биубси.

Хъунул адам риадлира, мура хъунулра сарли, дурхІнала нешра риадли, урхІла мурул адамтачил дигайли риркъни халаси убяхІдешгу.

ВебкІибси адамличила вайси мабурид бикІули саби. МицІирхІели вайси, увяхІси адам, адамтани ил илгъунали валули виалли, секъяйдали валусив, гІяхІси вири викІес?

Дигай бикІути секІал, хъябличи вегІ гІяхІулали баршибси дукІгъунти сари. Хаслира дурхІни акІубли гІергъи.

\* \* \*

– Агъагъай хІябилра гІяргІни деркунри хІуни шила хъунра хЕд дихути, – викІули сай будун, шила къадизи.

– ЛехІахъи, хІейгу-дигули иличила бакъалли, лерилра шилизирти дагъни чедулхъанну набчи! – викІули сай шантала къади. Сунела кани пІякъбик.

ЦацабехІгани набзи «Эй, поэт» ирули саби. Се поэт вирусирав ну, ца-хІябал детхЕурти жуз дурадухъи или. Поэт вииши, эгер Пушкинни, Лермонтовли, Батирайли, Расулли, Писки МяхІли къяйда саркъибти назмурти лукІес ба-жарливиркуси виасри.

\* \* \*

Лер нуни ралуси ца тухтур «Изутачи уркІи изур», – рикІар сунела. Амма сари дигуси муруйчи сегъуналра уркІеці агарси сари. Муруйзи бурес дигула секъяйда биалра изесвахІили сунела хъунуйчи больницализи викахъес ва багъес сегъуна уркІеці бирул сунечи сунела хъунуй илаб.

\* \* \*

ГІярабла халкъла лебси саби ишгъуна бурала: «Асубирар адамлагъуна куцличи шурбухъи хІявбецІра, духути гъайличил гъайбухъес, саби хІявбецІ биъниличи шакхЕбикахъили».

Илдигъунабти леб къалли нушала ургабра, хІявбуцІачи мешути хІяжурти нясани.

ВахъхІи дурав кали, хъули чарухъунси муруй, сунела хъунул ребкІили хІяририхънила хабар аргъили сай. Ил шилизи ваибхІели, вархъли малла-къадичи вякъи сай.

– Дила хъунул ажланализи рикибара, ахІи жагъаннаблизе рикибара?

– Ил ажланализе рикиб, – буриб илизи.

– ХЕбиалли, ну вебкІибхІели, жагъаннаблизе викахъес къайгъи бара. Ил лерси алжанара хІейги наб, – бурили сай хъунуй гІямрулизив инжитварибси муруй.

\* \* \*

ХІябрази дякъунхІели, хІябличи ганзмайхъидая. Илди чула ахиратла мерличиб бусули саби, хІуша биалли ила дякъунти гІяхІлигъунти сарраяну.

## ➤ Журналистла белкІани ➤



**МяхІяммад КЪУБАЕВ**

### **РАЖАБГІЯЛИЛА ДУКЕЛЩИ**

– МяхІячкълализи мурт аркъусири? – хърбаиб гъачам набзи Дахадаевла районна шила хозяйствола управлениела начальник, дила пергер юлдаш, ХІяса МяхІяммадли.

– ЖягІял хІерейс, цараІел аркъусира, сен хърбианда?

– Республикала шила хозяйствола Министрла заместитель РажабГІялила кабинетлизир касес хъумкартурли кагъурти терти сари, иличи гъаввакІили, кадухагу.

Гостинничализиб дугира беркІили, савли парекмахерскаялизиб муцІурра бялГІяхъи, РажабГІялила кабинетлизи айцІулра. Гъалавра гІяхІил валуси илис саламра бедили, някъ гъабуцира. Дила някъра цІацІабарили, ил виругІев дукаркІули сай.

– Се биубли, се чебиули дукаркІусири? – викІулра илизи ну.

– Се бизса, ил хІезибад башуси гягІличи сайра ну тамашавиубси. Гъалаб хІела къаклизибад гъабзалагъуна гягІ башусири, ишбархІи...

МуцІур бялГІунхІели чахъбарибси одеколонна гягІличи тамашавиубли валан ил. Иличила нуни ХІяса МяхІяммадлизира бурира.

– Авдарш грамм цІакътала хІунира пІихІаили, ца шишара барх бухили вякъунси виадри, дукархІекІи, – викІуси ХІяса МяхІяммадли гъатІира тамашавиахъубра.

### **ГЪАРХІЕБИЗУРСИ ХЪУЛКИ**

Дила шан Шамхал-ази кулпет абикъес багъандан хІянчили хъутри дабагъ-детаахъурси адам вири. Гъар бархІи майъализи гІелайкили хІянчилизи ахъили хъалли, илала яшав къулайбикІули ахІенри. Унра биалли, хъулкнад вашули, мицІираг дилгІули, илди дирцули ва лугъули кеп-чеклизиври.

– Гъари нунира хъулкидеш дирис, – пикриухъун Шамхал-ази.

Ца бархІи алавчарла дирихъли буцибхІели, арякъи илини унра шила ургубализибси хІенкълизибад декларбарили цІерхъисигъуна унц кили, ургубализибси махъила дигІянбариб.

Хъули вакІили, чедихъили эмхІечи къабтара сайра махъилизи чарухъун ва цІябдаибхІели унцличи къабтара чебихъили шилизи ухІнавхъун: «ХІяхІ,

хІяхІ, хІела вегІлис багалабиъ!» – викІули аркъуси Шамхал-ази «ХІела эмХІела мукукури лергу» – викІуси баягъи унра хъулкила тІамали уркъухъахъун.

ЦІахкадиуб Шамхал-азила цайли-цати хъулкидеш. Ил селра аХІен. Махъилизиб батурси эмХІе ит дуги бецІли ибгиб къадин. ГІур хъулки хІебарес хъя барибсири Шамхал-азини или бурули бирар.

### ПЯКЪИР РУХЪНАЛА КЪЯЛ

Мурт сабрил, жяв заманализиб, Уркухъла ца шила къатІла адамти мякълабси биштІаси шарализир зе дарес ибси пикриличил дурабухъунти саби. ДекІарбарили буили саби хІянчилис гъуни чебиахъуси штабра, гъайгъай, илала вегІ-бекІра.

"Къумукъла мезлицун гъайдикІес гІягІнитира зе детаахъес багъандан. Даргала мезли гъинтІалра ахъадалли нушала хІянчи гъарХІебилзан, зе дет-хІерар. Чини сунела мезли гъай дурабушалра, илала унц яра къял белгъи бусягІятал беркесли». Илгъуна хІукму дурасили сай вегІбекІли. Къумукъла мез далути чула бухІнаб ихтилатбикІули, хІедалути шипІбуцили лехІкахъили, дехІдихъили сари «зе» дирнила гъалар-гъаларти хІянчи.

Къялра сарра дуки аркъуси ва илдала пишначи тамашариубси ца рухъна хъунуй «Эй, абалахъали, дубурлизир зе дарес вирути аХІен, датирая дугІла авара» рикІули руили сари.

– Нушала лерилра пикруми ва хІянчи дукъдуун икІ къарала дугъбанину, кебасили илала къял, белгъи, шунгрази башахъеная! – буйрухъбариб вегІ-бекІли. Илкъяйда барра бариб.

### УРУХВАРРА

Нушала улкаличи фашист гъармукаби чебухъи, Дагъистайчи гъамбируси манзил сабри. ВагІа хаинтани вацІурби дицІилри, халкъ лутІулри. Ил замана Уркухъла ца шилизиб 7-8 солдат лебси дявила пост бири. Илгъуна пост бири УргІерибра. Солдатунас базла напакъа Мажалислизибад уркрачиб бихусири.

Гъачам хъумала бригадир СалихІ-азини илдас напакъа хахъес Мажалислизи укъяхъес набчи хъарбариб. Бабгили уркурара нура гъуни буцира. Набчил барх ярагълабиубти кІел солдатра лебри. Чилра диргалахІевхъи нуша Мажалислизи даира ва касили гІягІнити секІултира нушара ил бархІил гІеладяхІ чардухъунра. ХІябал солдат ГІурра имцІабиуб, илди УргІари баэс гІягІнитири. ГІяхІмадкентла къадани даибХІели, уркурла хІула заябиуб. (урца хІулрумири). Хъусбяхъили уркурара ЧІяхІдикІнала шилизи баахъира. Ил дуги колхозла председатель МуртазгІяличиб беркІира. ХІяб алжанали бицІаб сунела, бахъ гІяхІна гъабзарину. Савли МуртазгІяли-азини наб мегъла хІулрумар уркура гиб. Дила уркура гІяхІбарибХІели, чула чарбарили, арбукес вакІесли вягІда-ладиубтири.

ЧІяхІдикІнала шилис гъалабси къячІикІ ахъили, хъябла даибХІели, вацІа-лизибад тІяхІ-тІяхІбухъи шуцІали къачагъли уркура ва солдатунни алавбуциб. Шишалра духъахъес мугълат хІегиб. Гъала-гъала ярагъ керасиб, палтарла белтІун (уди челгъути палтар датур), ардухиб уркурличирти лерилра секІултира. Унци ардукес къасбариб, ну урухиубра, висира виубра ургус, 14 дус сайри итХІели ну виубси. МаслигІят акІуб. Дила дудеш валуси увухъун ца мунапикъ. Илини дила унци датахъур, мицІирдацІли чардухъунра нуша.

Солдатуни шила адатала кумекличи хъарахъиб. Мегъла хІулрумачилси уркура биалли СалихІ-азис калун.

## ВЕТКАХЪИБСИ ХАЛА ДУДЕШ

Дила нешла дудешлис Арслангерей бикли. Урибси дяхънуша вири ил. Бахъал адамтас дахъал гIяхIдешуни дарибси, сунела гIямрулизиб гIяргIяла гидгарицадалра адамтас зарал хIебарибси, къяш агарси, малхIямси адам. БегIлара къачагъуни сакIубси замана Меусишала «Бутау» бикIуси мерличибси шинкъала декъ делкъес аркъула викIули архиб. «ХIела анкIи ва эмхIе керисуну, паргъаткайи», – викIуси халал узила гъайличи лехIхIехъили, бархIехъ эмхIечи чедихъили анкIира сайра арякъун.

ГIергъила бархIи чарухъес гIягIнисире ил. ЧархIевхъун. Дикиб хIябал-авал бархIи, жумягI – хала дудеш агара. ЯхIбарес хIейубли халал узи умцIер дуравхъун, лерилра шинкъби умцIур, къел-хIерзи хIедаргиб. Чарухъи ляхъухIели илис цугбикибти кIел адамли узи мицIирли левниличила ца-кIел жумягIли хъули ляхъкниличила багъахъурли ил паргъаткайIуб. Марлира, кIел жумягI дикила ил авал эмхIера авал дех декълара сайра чарухъун. Иличи тамашабиуб лебилра жамигIятра.

ГIур ашкарбиубли къяйда, къачагъуназивад цали ил дяхънуша виъниличила багъурли уили сай. Арукили шурмачивад увяхIикили, къяш бячунси къачагълис гIергъи ветатурли уилри. Ил сагъварни багъандан напакъалис дедибти бетIу дуилри илди. БусягIятал къачагъунани биалли даршани миллионти арц тIалабдирули сари.

## ХЪУЛКИЛИС – ХЪУЛКИ

1943 ибил дусла хIеб сарри. ИлхIели ну Уркухъла колхозла Огнила мякълабси хъарахълизив жура-журала хIянчурбачив узулри. Ца бархIи колхозла председателъ Зява ХIяжини ну живарира ва пайтун бабгахъили наб тянишли ахIенси ца адам колхозунала хъарахъунази ухахъес хъарбариб. Нуни КIечIухла мякъларти хъарахъунази гъуни буцира. ВКП(Б)-ла Дахадаевла райкомла цаибил секретаръ ГIямаров МяхIяррам сайли увухъун дила вархкъя. Сергокъалала районнизивадси сайри ил. Зубанчила хъарахълизиб дуги беркIили, гIергъила бархIи урхъула мякълар мерладиубти хъарахъунази гъуни буцира. ХIябъибил бархIи савли нуша Къаякентлизи даира. Ишав варгира райсоветла исполкомла председателъ ХIяса МяхIяммадра.

– ХIера, урши, – викIар МяхIяррам, – ишаб нушала совещаниеб бируси саби. Ил таманбиайчи хIу вана шин херихIи арукъен, урчази бамсриахъахъа, ма хIед арцра, вана шизиб хIунира рахIятдеш чебаа. – Тяп ил викIуси къяйда барили, тялализи дугахъес урчира датаили, нура шизи вазес арякъунра. ГIяхIдизур диэс илди, ца гIяхIцад замана калунра. Чарухъи хIерикIус – ца урчи агара. Ита-иша ухъунра, баргес хIейубра. МяхIгариубра, чарухъи вакIибхIели МяхIяррамлизи се ирусил хIебалули, бекI къухIбуцили пикрилизи ахъира. ХIерикIус – цархIил тялализир уркамтази дигъи кIел урчи. Арякъи, къицIбарили уркам, ца урчи кира. Байхъала сягIят хIедикили МяхIяррамра чарухъун. Дибгулра пайтуйзи урчи. Къяш кайцIув гъатIи къабкъинни. Мурдала урчи баланри ил. Гъарбуцалли башули саби, циила гъуни ахъили: «Пайтуйчи кайину, гъайдара урчи», – иб МяхIяррамли. Илизи нуни кабикибси анцIубкъличила бурибхIели, дукелцIилис мер баргес хIейрули кайзур. ХIу вамсрли ургуд викIули гIяхIцад гъуни сунени гъардуциб урчи. УргIерила хъарахълаб къабкъин дехла урчилис барсбарира. Хъарахъла ваибхIели МяхIяррамли ил хабар хIебурув лебтазилра. ГIур гъар хъарахълизи ваибхIели, дила юлдаш хъулки МяхIяммад вакIахъая или, жиираси, учIес гIягIнили биъниличила гъайикIи, шилизибти нешлис ва рузилис чуйнал кумекбарахъиб.

## ДАЙДУГИЛА ТІАМА

1945 ибил дусла июнь базлизир нуша дубурлизи чардулхьулри (илхІели ну мазаличив букІунас кумекчи сайри). «ГІяпрахьу» бикІуси мерличи усанк бяхьили рахІятли кадиилри. БархІехъ хинкІ берки гІергъи букІуни маза-мас лерихІи арбякъун, бригадир ХІяса МяхІяммадра нура усанклар калунра. «ХІерагу, МяхІяммад, – викІар бригадир, – нушала ябни гъарахъхІедикахъес хІеръа». Дай дуги баилри илхІели. Ну ябни гІяйдиубси мерличивяхІ аръякъунра. Даргира илди, «Ва, Къубайла МяхІяммад, леру ябни!» – тІамадариб бригадирли. «Лер, бусягІят леркулра!» – викІулра ну.

Рахли, ил замана гъарахъли ахІенси мерличирад: «Ва Къубайла МяхІяммад, гъари ну лерихІи ваши!» – ибти хъунул адамла тІама-гъама дакІухІедухъесу.

«ШайтІан бургар», – ира ХІяса МяхІяммадлизи нуни. «ШайтІунтас селис хІяжатсири хІу. Укъен чи сарил багъи», – викІар ил. Урехи бебІахъес дарх хурира дукира. ТІама лерихІи ваили, хІерикІулра – кІел уркурара лер, хІябал унцра, ца хъунул адамра. «Чи сарри хІу? Сен ишарсири?» – викІулра илизи.

«Ну, дила урши, дибгашан Салимат сарра, бахъал хІякимти балути саби нуни, хІела дудеш Къубайра вахъ гІяхІил валас, хІябцІали ибти дусмазир шила Советла исполкомла председатель рираси. – Сен ишар рииша, дубурличи мазала-маслис зе духили аркъутира. БархІехъ иша хъурабарили, дила вархкъя (У ахъибгу, хъумкартурра) дукІлизибад ца унц декІарбарили, итил азадбарайчи папруслизи ахъили, гъалабси унц гъаббухъи, илис гІергъиикили аръякѳи сай, гъаннара агара, – рикІар ил. Нуни вякъи илис хинкІира диъра хира. ШаладикибхІели унцра сайра вархкъяра чарухъун. «Гъу, папрусли къяшми дамсахъуру?» – рикІар Салимат. Гъайэс хІейуб, сенкІун илала мухІлилаб, бикІуливан, гъаяла бутІацад паррус лебри.

## УЗБИ БИКИБ

Ну шел дус виубхІели, хІябал адамли хІукму барили дудеш шилизивад дугІаибсири. Ил вецІну хІябра дус Къазахстайзив, Карагандала областълизив калун. Маза адилкъули узусири илав ил. 1946 ибил дусла гІергъи сайри хъули чарухъунси, наб нуни къацІ бургуси замана. Дубурлизиб гъава балхІебиркни багъандан 1949 ибил дуслизив ил Бакреслизи аръякъунсири. Илаб къулайлири илис. Дубуртази гечдарили гІелар калунти маза-масличи хІеруди бузахъули хІеркайрусири.

1952 ибил дуслизиб бииши викІулра, гІярмияла къяяназиб къуллукъбируси нуни нешличибад кагъар касира. Нешли белкІири: «Дудешла мекъличи укъес хІейкІулрив? Илини итар урус хъунул кариили сари...»

Гъу, гІясихІейрару, селрацад дурхІядешла гІяхІси секІал чехІебаахъибси дудешли барибсиличи!

– Наб къантІси заманалис отпуск хІелугаду? – дугъайзурра ну эскадрильяла командирличи.

– Се хІяжатдеш леба?

– Дудешла мекъличи аркъусира. Гъанна ну хІушала адам сайра. Убай неш урус сари, – викІулра, масхаралисван, илизи.

– СейкІулри, гъари, хІу, чум дус виубли дудеш?

– Бара урегцІали сай виубси, гъанналис жагъли левал.

– БелкІен рапорт, лугасну, – викІуси командирли ну разивиахъубра.

ИтхЕли Черный Рыноклизирад (бусягІятла Кочубей) Бакреслизи дашути автобусуни хЕдири. Почтала машина бири башуси, илхЕлира бархІи ургали. Ну Бакреслизи, Уркухъла колхозла центральный хъарахълизи ваира. ВягІда-ладиубливан, дай гъуйчи тІашизурли дудеш къаршиикиб. Илини ну ванзала удибси ца халаси хъайгІи (землянка) арукира. Илар хала-халати цулбала регІ урус хъунула, вецІнушура дуслагъуна гІямрула Вяса бикІуси уршира лебри. ГІур хІянчилабад чарбиуб халатигъунти уршби Николайра Сашкара. Чукурбиуб дила хІурматлис илабти уркухъантира. «ХІера, ишди бургар дила сагати тухумти», – уркІилизи пикри каберхур. Буъра буилри.

Шадиб-гъуни барили гІергъи, дудешла узикъарли чучи вакІахъес тила-дибариб. Иличи дудешра вакІиб. «Ягъари дудеш, – викІула ну, – се саби хІуни барибси? Ятимтази къяйда набзира рузизира дурхІядешра деркІахъири, нуша адикъес багъандан нешла хъуцІрумачи чебикибси къиян, хІу биалли мукърази архилри».

– Бархъли буришав хЕзи? – викІар дудеш. – Ну иша маза ветаэс вакІибси ахІенра. наб, гІямру ардякъунси адамлис, гъанна ванаси хурегра. Умути палтарра кІантІиси бурушра сари гІягІинити. Тяп ил багъандан сари ил нуни «шері кариибси». Ил чисалра диргаларулхъули ахІен. Рузули сари, бузули саби уршбира.

ГІур дила гъайэс мер кахІелун. Нешра паргъатрияхъубра. Илдачи хъура-бираси нуни дудеш вебкІили гІергъира. «ХЕла узбани хЕд саламти дархъиб, хІябилра хъярхъти тебри илди», – бикІули бири Бакреслизибад башу-сабашути. Жигалцовхъали бусягІятра бурибти адамти саби Бакреслизиб. Илди дила убай неш Дусяла уршбала уршби саби. ГъатІира бахъбааб саби. Дила уршира илдани вагъурлири.

## РУШБАТ

ИцІарила шила тукенчини адамти биргІябиргниличила бурси кагъарла къисмат ахтардибарес архІяличи дуравхъунра. ГІяхІяйчиб дуги беркІили, савли дайша дуравхъунра. Тукен гъарглири, ацІира илала ухІна нура. Ну хІерикІули чакар, конфетуні ва цархІилти секІал исути адамтазирад илини имцІали арц сасиб.

Шила Советла исполкомла председателъла кабинетлизи тІалабварахъибси илини сунечила делкІунти къянадарес хЕйуб, сенкІун нура бикърили вета-урра. Чумал адамра хъар-хъарбаили нура гІурра дай шилизи дуравхъунра. Рахли, туке ухІнав набзи някъли гъакІикІули тукенчи чехІеишав. Тукейзи ухІнахъунхЕли, илини набзи сегъунси сабрил бергараг гъабуциб. Сасили илра нура дуравхъи хІерикІула – кительти дируси чІянкІи.

– Ит къаркъаличи кайибси чи сая? – хъарбиула нуни ца хъунул адамлизи.

– Ит школала къараул ГІяшур сай, – жаваб гиб илини. Ну ГІяшурличи гъамиубли, шилизив палтар ибуси уста левал хъарбаира. Ил левли увухъун.

– Укъенну иш чІянкІилизирад хЕд кительти дарахъа, – викІула ну ГІяшурлизи.

УркІухъи набчи хІерикІуси ГІяшурли гъайэс вирули ахІен. Нуни гІурра дила гъай тикрардирула ва «Иш чІянкІила вегІ гъанна ну сайра» или че-батурра. Илди гъай тукенчилира аргъиб. ЧІянкІира сайра ГІяшур арякъун, газетализи макъала белкІес ну хъули чарухъунра.

ГІергъила дус ил тукенчи къулала фермализив бригадирли узули къар-шихІейкесу. ХІянчи къулайлири, газетализив гапварира.

## ПИСЯХІРА ГЪАНСАЙКИБ

Хайдакъантаницунра ахИи, СирхІяла, Муирила бахъал адамтанира ва дурабад бакІибти гІяхІланира Мажалислизив чягъир дируси тукейзив узуси ПисяхІла у гІяхІил бала. ХІебагъес илини бархІилис чум адамла мурад бирил? ПисяхІли белкІес-белчІес хІебали. БикІуливан «немецкИи учет» хІебузахъи. Тетрадь-къаламра хІедири. «Ва, ПисяхІ – викІула гъачам ну илизи, – гъар-мурталра адамла кисализир арц далхІедиркур, арц гІур гесли балу-бирхутас чягъир леген». ХІера, хІела тетрадь лебхІебиалли, иш бяхІлизи (туке бухІнабси) сунела у белкІахъен, хІуни биалли ца литр чягъирла бержалли – илала уличи цугли къел бирен, байхъала литр бержалли – биштІаси. ГІур дейгІи арц тІалабдирен». Къабуликиб ПисяхІ нуни бурибси хІукмуличи. ГІяхІцад адамтани бяхІлизи чула уми делкІун, дагъардиуб ПисяхІла тугъира. Сунела у белкІун Моряклира, (илкъяйда бикІусири цІедешла консерваби дируси заводла электриклис). Ил гІяхІси уста вири хъулрала бяхІяни дикесра цІубдиресра. Гъар бархІи ПисяхІличи хІяйна-авна гъавикІуси илала тугъала гІелала аги.

Ца бархІи Моряк някълизхиб сугъатла гъудурмайли бицІибси бадирара хъатІира сайра ПисяхІла тукейзи ацІили, баягъи белкІани лерси бяхІ хІяршбирули вехІихъиб. Жиндралавиубси ПисяхІ сагІун. Вяыв-чІярухъун. Моряклис биалли илди аргъес дигули ахІенри. ПисяхІ милициялизи дуцІухъи, старший лейтенант Зулпукъар киб.

– Эй, Моряк, се бирулри? – хъарбаиб илини.

– Бахъ цІударли-цІябли кабизурли туке бухІнала цІуббирулра, – викІар Моряк.

– АхІен. Иш бяхІлизир чягъир держибтала уми лерри делкІи, илдала лугІилизиб сунелара, – иб ПисяхІли.

– ХІелагІун туке духІнар чягъир держахъес нушани къадагъабарибси саби, гІякІалаварес гІягІнисири, – впикІуси Зулпукъарли гъинтІ буцахъиб ПисяхІла.

Морякли туке бухІнала цІуббариб, держибти чягъир бахълис матъал детаур. Гъайгъай, ПисяхІли бетаурси зарал бахъхІи агарли чебицІахъиб.

## ДАРМАН

1989 ибил дусла гІебшни ну МяхІячкъалала центральный больницала уркІи-михъирла излуми арадируси отделениелизи кайхъири. Набчил барх урус, кІарахъан, къумукълан ва хажакан лебри.


Ца бархІи набси урши вакІиб. ИлхІели хъулив хажакан ахІи чилра аги – дурабри. Уршили хили колбаса, диъ, гІявадеш, цІедеш лерри. Илди нуни холодильниклизи кадихъира. «ХІечи хІерикІуси тухтурлис деда», – викІули, хІябал шиша коньяклара дила къамаслизи дигІяндариб.

ГІергъила бархІи дурав бархІилиу кайили левли, набчи кІарахъан дуцІли вакІиб: «Хажакай хІела къамаслизибад касили коньякла шиша бержиб ва илала гІергъи кайхъун» или «гІяхІдеш» буриб.

– Селра хІебар, вати, – викІула ну.

Чевсаргъибси хажакан набчи гъамиуб ва гІяшли иб: «ХІела уршили илди коньяк хІечи хІеруди бузахъуси тухтурлис дедахъес хъарбариб. Ну усули ахІенри итхІели, узи МяхІяммад, тухтурлис дедибси виадри, илини хІед агъула ца къякъ имцІабири. ХІера, ма хІела уркІи-михъирлис бегІлара гІяхІти дарман», – викІули, пІялцикІ-нерхла банка гъабуциб. – Дила гІурра леб, иш хІед саби. Марлира, гІяхІти дарман сарри. Калунти шишнира хажакайс дарман детаур. Нуни къалли бужули ахІенри.

## Поэзия



Тавсулган СЯГИДОВ

### АХИЕНРАВ НУША РАХЛИ ДУХЪНА МАГА ДИУЛИ?

(Поэма)

I.

Ца бархи гумайлизиб  
Бухънаби жалбиклури:  
«Ахират гъамбиклули  
Саби» биклути лебри.

«Гъалабгъуна разидеш  
Адамгазиб агара.  
Кани белкъи биалли,  
Агара гур авара», –

Аги-къяйда дурулри  
Хякализивси цали.  
Херая се бурибал  
Илала мякълавсили:

«Адаб-хия дуљули  
Сари къалли гъамадли:  
Халалла хурмат бирес  
Дурхина ахен балули.

Бетихули сабигу  
Нушазибси уркеци!  
Се хебиру адамли,  
Хедиалли урези?

Дугила муэргъуна  
Саби къалли иш дунья!  
Хебиалли, хушани  
Ил набзи аргъахья», –

Хякала дулгълабад  
Баклахъиб сура тавра.  
Хъар арзибмад гумайкад  
Гавдухун танбакура.

Белсес дигутасра ил  
Гъаладихъес вализур,  
Дигуси ахехъибну,  
Алавчарли херизур.

Гъалакхейклули белсун  
Хала тулцад папурус.  
Бехи тулбази буцили,  
Ил клунтбачи арбухиб.

Пирхикли абалкахъи,  
Ца тиягъямли плагъбариб.  
Гур, бекра ахъбуцили,  
Вера лагдяхи датаиб.



Танбаку лерси тавра  
Дулгъализи кабихъиб.  
Папурус пагъбирули,  
Хабар бурес вехъихъиб:

– Урчѐмѐали вирулра  
Ну абани варкъила.  
Верхъѐали дус къалли иш  
Нуни пагъра бирулра.

«Заралла саби биклар».  
Нура сайра къабулли.  
Ухънаваибкъира иш  
Левалра пагъбирули.

Нуни дакѐлахъибти сар  
Мурталра пагъдирути.  
Гур чилалра хѐдургар  
Дилагъунти шамшамти.

Дургъбала дусмазира  
Танбаку камли дири.  
Бургъантас дявтазира  
Дири илди дурхъули.

«Дахъал чедаибсили,  
Дахъал дала», бикларгу,  
Амма дунъя хѐргъибти  
Гурра бахъал лебалгу.

Дахъал дусми деркѐлар,  
Хѐрбиѐс дигули саб.

Цадахъал суалти лер  
Чѐямдирули нунира.  
Бархъси деклар ахѐнри  
Нуни ахъиб гъунира.

«Дугила муѐргъуна»  
Дунъяра бигахъира,  
Амма гѐркъал сабину,  
Ахират хъумхѐртира.

Дила пергер гъалмагъ лев,  
Бекѐлил гъалакхѐйкѐлуси.

«Нуни деркѐибти диур»  
Викѐул къаршихѐйкиб наб.

Гѐямруличила нуни  
Аргъибси ишгъунари:  
Папурус абалкахъес  
Цѐализибад гантари

Тулба кайсули бирар,  
Хъатлаб тѐяхѐбикѐлахъули,  
Илизибад улкахъу,  
Цѐа тѐутѐубикѐлахъули.

Илдигъунти сар, биклар,  
Гъарил адамла гѐямру:  
Духъянти яра къантѐти  
Дигулрил хъархѐбиу.

Амма гѐямру гъалакли  
Саригу дарсдикѐули.  
Нура тамашайрулра,  
Илдачи хѐерикѐули.

Ухъваибхѐелира  
Ну суалта виѐѐилра.  
Дахъал секѐал гъаннара  
Нуни аргъес хѐейрулра», –

Шилизивра урибси  
Хѐурматла гъабза сай ил.  
Дубуртира диркъара  
Деркѐибси дурзамтачил.

2.

Вайси балагъ бакѐлар,  
Гъамадли чекайсуси.

«Гъалакмайкѐудра, – виклар, –  
Биубси агарану,  
Иш биубси хѐябалван  
Вайси биѐс бирину».

Мискинра давлачевра  
Узби биѐс хѐебирар,  
Ца нешла биаллира  
Илди ятти бетарар.

Адамгазир адамдеш  
Детихъули саригу,  
Пишалра хІебяхъили,  
Цали ца бугулигу!

БецІли бецІ кабуршули  
ХІушани чебаирав?  
Цали ца бугантира  
Адамгази буйгІулрав?

ИшбархІи адамтира  
Къукъначи саб буртІули.  
Къуллукъ бикахъес илда  
ХІи булан саб картІули.

«Командара леб дила», –  
ВикІули сай ца хІяжар.  
«Алжан лушас!» – викІар ил,  
Бихули шалкІуб мажар.

Ца-чумал дусла бухІнаб  
ЛутІа лебилра район.  
«ХІу сели виркълурли?» – эс  
Шакбикаб цалра «шайтІан».

Даг гушли авбикІути  
Илала къачагъуни  
Ца чебаа ишбархІи –  
Бугъниван бевбибикІули.

Выборти садаалли,  
Сагати къукъни алкІан.  
ГІурра хІяким ветарар,  
«Алжана лушас!» – викІан.

Коммунизмгъуна саби  
Илда лушуси алжан:  
ВерхІцІали дус бузукъи,  
ХІебиуб белши таман.

«ЖагІял, жагІял» дикІули,  
Лерил духънадаира,  
ЖагІялра сатхІебаиб,  
ГІурра хІерли лералра.

«ГъаладяхІ, гъалмагъуни!  
ХІуша бархъси гъуйчирра!» –  
Плакатлизивад Ленин  
МахикІули чейира.

МухІли бурдиб нясани  
Гъанна саби бикІули:  
«Хала дудеш Ленинни  
ЧердалкІахъи дуилра!»

«Варъа, варъа!» дикІули,  
МухІлуби дамсаллира,  
Ца лезмила бехІелра  
ХІебиубгу мурилра!

Маза дуилра нушла –  
Кусдарили дикІути.  
ХІебикиб къалли нушаб  
БукІунилра духути.

Гушли диублихъалли,  
Мурталра дургъутири,  
Се гъалабизаллира,  
Бехъесра дирутири.

БугІярси северлизир  
ХІяжланкІи «дашахъира».  
Северла хІуркІби булан  
Ласдарес далдизурра.

ТІутІила унхъри дири,  
Чягъирли чяхІдикІути,  
Ца нясла гъай хІясибли,  
Сарри агардарибти.

Дахъал сарри нушани  
ГІурра дариб мехІурти,  
МехІурдешлис маймунтас  
Гъаннара гІердаибти.

Нушайчиб тамашала  
Жан агарли дуили!  
«Дунъяличиб къакъали»  
Гъанна сарра дикІули.

ЦарХил дунъя агарли,  
Хъяйхъяй сарра буцили.  
Ургуба палакатли –  
Арцили саб бицили.

Вацализир буци сар  
Агъи или дисули:  
«Кикьяшан жаниварта  
Се бирули?» дикфули.

Сагназир агарагу  
Гьаларгъунти дурзамти.  
Кьулала фермабала  
Кьаркьуби сар калунти.

Шимазибад халкъ саби  
Шагьуртази бубшули,  
ЧатГала пукънигъунти  
Илар хьулри лушули».

Барес хЯнчи чинаба?  
Держес шинра агара,  
Чили далдуцибтира  
Ишди мехIур авара?!

Ца-чумал няс белкъахъес  
Гялам саби бузули,  
Давлачбта мискинти  
Кьуливан саб изули.

Мискинти бисахъули,  
Хьулкна чус алжан белшун.  
Гаша бубкIул пакьиртас  
Перкьал лекция белчIун:

«Пенсия дарман асес  
АхIен кьалли биули!  
Мухта баршили хьалли,  
Кани сабигу гушли...

– Дилагъуна пенсия  
Калаби хIу букули», –  
ХЯкимлизи хуху сар,  
Рисули, гьайрикIули.

Духубиэс дигули,  
ХЯжли саби башули.  
Чарбухъи, вацIурбази  
Илди саби бубшули.

«Къумбала тIакъа» саби  
ТIашагарли бучIули,  
ЦабехI шайтIунти саби  
Дуги-хIери булхъули.

Чейулра халал хЯким,  
Унрубас сай ургъули:  
«Нушара къацIли делкъи  
АхIен илдас дигули».

Узули вамсурсиван,  
Майали кIантIикIули,  
Телевизорлизивад  
Министр сай викIули:

«Арц агара нушала  
Лебтасалра даари!  
Аги кьулайван бири  
Бухънабира бузалри.

ДухънадаибХелира  
Дузули сарра кьалли.  
БекIибХелира бузаб  
БикIули хIебиалли!

Ца узанни балхути  
ВерхIел хIебузути леб.  
Марлира, дила халкълис  
БекIлил хIякьутира хIеб?

3

– Дунъяличиб нушачи  
Сабигу дукаркIули.  
Дургъби агарХелира,  
Халкъ сабигу улхули.

Гьалабцад гьанна дурхIни  
АхIен кьалли биркьули.  
Баркьибти абикьесра  
Сабигу къиянбулхъули.

Убай нешгъуна саби  
Гъанна нушала улка:  
Цала леб дурхъал яхта,  
Цала агара хІяка.

БегІла халаси или,  
Хабарлис саб бурули.  
Илала давлумала  
Ахир саби агарли.

ДиштІати улкназибра  
ХІербирули мадарли.  
Биса-яс сен даибти  
Нушаб декІар къадарли?

Муэрлизирра кеп-чек  
АхІенра чедиули.  
Яра, багъхІебагъурли,  
Саррав сукъурдиубли?

Лерилра гІямрулизир  
Дояркали калунра,  
Халаси ши бахари,  
Ний изули руира.

Колхоз хъулкна кабушиб,  
Нушара дугІаира.  
ХІякимти бикІули саб:  
«ХІушакІун азадлира!»

Агъ, нушала азадеш  
ТІимкълизиб вацасгъуна.  
Итцад жагаси улка  
Саби жагъаннабгъуна.

Унруби унрубас саб  
Душманти бетаурли.  
ГІязиз викІул судьяби  
Сабигу чарбиубли.

Узес вирусилара  
Агара гъанна хІурмат.  
Хъям-къацІикІанна саб  
БакІили гъанна къимат.

ХІябилра бархъли буриб  
Писки МяхІли ца ярга:  
«Вирулрив, аса – бица,  
ХІейрулрив – мухІли буца!»

Ца хуху итиллизи  
РикІули чераира:  
Наб лугуси пенсия  
Кепеклизи агара.

Дармунти асасли, гІур  
Кавлусира агара.  
Чяйлизи кабирхъуси  
Чакар мяхІкамбирулра.

Нуни хІядурдарибти  
Къарла чяйли ружулра.  
ГъимрукІасли, хІякимтас  
ЛягІнатуна руршулра.

ГІямалбарес ца ГІежа  
Чумал дус абилкъулра.  
Даркъибти кІелра гежба  
Базарличир дирцулра.

«Буржуй» бикІули набра  
ГІелабад хункІа биркъур.  
Бакъасра, гъимхІеруркІус:  
Буралра, гІур лехІкайхъур.

Дила Бадуни гиб ний  
Унрачилра дуртІулра.  
Цунрухъунси пакъирла  
Агарагу гІяргІялра...

ХІябра вайси замана  
Къадарбиуб хІерриэс.  
Гушти чебиухІели,  
ХІерирулра цІумрикІес.

Гъалаб къяйда гъаннара  
БерхІи саб абулхъули.  
Гъала хІеб ванза саби  
Вавалира бирхъули.

Гинизла шинра лерал  
Гьалар кьайда бизили.  
Гьаргалаб чяка саби  
Разили чИивбикIули.

Дила бухъна дагъа саб  
Ахъли гIугIубикIули.  
Абас бат, набзи бургар  
«ГIяхIял лявкъян!» бикIули.

Рухънараили рургус –  
Шалал дунъя балтIули!  
ЦархIил агарси биъни  
Риаслира балули.

Чудулис хъалта дурчис,  
Анхълизи ретацIили.  
ХIу, рухъна, дебарии,  
Лералрину мадарли...

Бульан бикIули дунъя  
БахъхIи саби биубли.  
БульхIебульан, – рикIулра. –  
Илди хабурти сари!

Уршила уршилис даг  
Урши акIубли уру!  
Гъари, ила гъаррикIус –  
Архис хъалтала чуду.

ХIу ребкIес гIямал лебу,  
Дунъя пайтли батурли!

Чили балхуси гIежа?  
Унрара кавлан гушли...

ХIуни чинаб балгада  
ХIела хабарла дагъа?  
ХIу хIерризи, чебаа,  
Севан биублил къугъа!

Мерс дакъалра бетхIейхъур  
Дахъал далуси жита,  
Пай хIегили буару  
ХIела гIежала буртла?

Агъ, хуху, сецад лерал  
ХIуни дарес гIягIинити?!  
Даг акIубис хIунигу  
Гардла далай бучIуси?»

Улкъайзибад хухучи  
Бац саби хIербикIули,  
Мякълаб Супелтар саби  
«Мурт бурт луга?» бикIули.

Хуху разирияхъес  
Къурра саби бучIули,  
Рах-рахли хухучибяхI  
Ца хIулира ибхъули.

Дугили зак чебиур  
Зубарта вахбаршили.  
Дила рухъна илдас сар  
Пишряхъили рулгули.





**ГІяйшат  
МЯХІЯММАДОВА**

### **ДИЛА ШАНТАС**

*далай*

Заклизиб шалал бацван,  
Урми ургаб алкунси,  
ХІечила саби хабар,  
Дурхъаси ТІантІала ши.

ХІушаб сар дила балгни,  
ГІяхІялдешлис сакІубти,  
ЯхІ-хІяяли дерхъибти,  
Мурталра уркІиларти.

Лебалли шалал дунъя,  
Детурхули хъулани,  
Калабая арали,  
Дурхъати дила шанти.

Ну чинар риаслира,  
УркІи саби хІушачил.  
Дерхъаба, дахъдааба,  
Хабарла дила шанти.

Хабарла гъубзназирти  
Гъабзадеш хІушазирти.  
ХІушачила саб далай,  
Дурхъати дубурлантти.

Ламус барес гъалакти,  
Дигайлис хІекъли марти,  
Даршлизи ца дулхъанти,  
Дурхъал дила тІантІанти.

### **НЕШЛИС**

Аркъулигу гІямру ахІерси нешла,  
ГІебшнила дугІярти бурхІни къяйдали,  
ТалихІ буртІухІели дурхъал Аллагъла  
БутІа баили бахъ дебали камси.

Дагъалри дунъяла лерил дубурта  
Дила ахІер нешла уркІила цІумла,  
РуржесдахІили илди, уркІецили  
Пашкадехъубли, детихъи чакарван.

Нешли ахъиб къиянти чедаалри,  
Шурдулхъи лусенти диркъ авлахъличи.  
Анцкъили буцибил чарх гъанаалри,  
Ляркъину кумеклис илди сунечи.

Биралри берхили аргъес шишимти,  
Нешли дуркѳул гъанкагар дугурбала.  
Ташбилзи ца мерлаб ил хѳакбизурли,  
Пишбирхъи, сунени нур дедлугули.

Ахѳерси неш, сецад нуни делкаасра,  
Кахѳедурхар лукѳути ил хѳечила.  
Уркѳи дуракасили кабихъасра,  
Хѳериусра у ахъес чебла сеналра.

#### ХѳЕД НУ ДЕЗАРИКѳУЛРА

Ишбархѳи хѳед ну дезарикѳулра,  
Ил хѳу талихѳчевли кали дигулра:  
Мабакѳаб пашмандеш хѳела анкъила,  
Детурхаб хъулани хѳела мурталра.

Цайналра гъабзадеш лайхѳедакѳири,  
Бархъдешла гъуйчивад хѳу чевхѳелкѳунри.  
Яхѳла ургъур урхѳлизи хѳебедири,  
Бекѳ ахъли вашули, хѳу хѳеркайубри.

Гѳяхѳгъубзнала авид жагабирули,  
Юлдашунас къану гъаргли далтули,  
Эркинни, жагали гѳямру деркѳири,  
Тухумтала ургав хѳу камхѳейубри.

Чина ганз кацѳадра хѳела гъарбилзаб.  
Хѳурмат имцѳабиаб шантала ургаб.  
Гъар бархѳи ванали хѳед берхѳи ухаб,  
Гѳяхѳялдеш дируси сайрину тѳантѳан.

Лебил тухумтала ургав тѳалгъуна,  
Хѳечила дурести кахѳерхар чула.  
Хѳял-тѳабигѳятличи хѳела мешули,  
Гъар бархѳи калаби уркѳи разили.

Хѳу гѳяхѳгъабза сайри, уркѳи чѳумаси,  
Къияндикибилис кумекбируси.  
Ахъбурцис пигъала – «Арадеш!» – или.  
Лебай шалал дунъя – «Жан датаб!» – или.

## БАРКАЛЛА РИКІУЛРА

Гјамру керхайчи кавлас хјед рулгули,  
Дила кјисматличил хју вархвашнилис.  
Буцјарси уркјила мурад аргњилис,  
Баркалла рикјулра кјаршивикнилис.

Дахјалри пикруми нуша кјилалра,  
Уркјби изахјули сари дургјути.  
Ахјира нушани гјуни гјамрула,  
Баркалла рикјулра, дигай дихјинилис.

Хјела пергер гјамру наб пешкешдарри.  
Шарабван умули дигай дихјири.  
Кјияндешуни набчи кјячхјейкахъи,  
Баркалла рикјулра, ну хју левнилис.

Гјамру деркјес диги шалал бацливан,  
Цјяб дуги ца хједцун шаларикјули,  
Хју чевхјелкјахъес ну рирус кјиблали,  
Баркалла рикјулра уркји аргњилис.

Дунъяла кјисматли цяхјнадяхъира.  
Хјела дигайли ну шаларарира.  
Заклизиб зубарван ухескаира.  
Баркалла рикјулра, хју варх левнилис...

## ДИЛА КЈИСМАТ

Цјурјадешлизир жагъдеш ардукъялра,  
Кјиянтас мутјигјли хјерхјериубра.  
Хъалибаргјис нуни уркји буртјули,  
Гјамрула гјуникад ну ратрихъилра.

Дурхјначи дигили уркји рурцјули,  
Савли шалаличил ну арилзули,  
Гјяхјгъубзни уршбира пергер рурсира  
Абикъурра нуни, лайларикјули.

Дигила гъе дурхјнас цугли дутјира.  
Талихј белшес илдас пай кабихъира.  
Назмурта лукјули, уркји бисули,  
Ардякъун гјамру тјягјямагарли.

Пикри бири дила жагъил замана:  
Гјамру деркјес шадли, уркји разили,



АхІерти дурхІнани алаврүцили,  
ДурхІнала дурхІнани разирирули.

Шахли ригубра ну, кърван дубурла –  
УркІира бисули, ну цІумрикІули,  
Къргъати пикруми дила гър-урла  
Урдухунгу сари лерил дацІтили...

### ЗАБЛИС ГІЕРГЪИ ЗУРХІЯБВАН

Савлила зубариван  
Алки даим уркІилав,  
Хъали дирул чатІаван,  
Хъуракайубри чархлав.

Хіела ванаси хІерли  
Арцанван арцахурра.

Хіела къргъати гъайли  
Ну вавнаряхъяхъира.

Наб дунъя цІяббарили,  
ХІулба хІер арбухири.  
Заблис гІергъи зурхІябван,  
ЛямцІухъи, ветяхъири.

\* \* \*

Гър бархІи берхІи ухаб,  
Дигай дихІес балугас.  
УркІби ванали калаб  
КарцІайла гІем кайсугас.

УркІилизир дяхурби  
Сари цІакъли рурцІули.  
Шараб шинна хІулбира  
Сари даим дисули.

Дила бегІла черикІла  
ХъанцІа закла зубари,  
Бахъ шалали пархбухъи,  
Леб мерлаб бетяхъири.

Дила язихъ чархлизиб  
КахІебурхар буцІар децІ,  
ХІуни дурути гъайли  
Изахулигу бахъ бекІ.

Нагагъла цунрухъасли,  
Набчи дашар пикруми,  
Цумбулхъан дила уркІи  
ДецІаназиб сагали.

Бахъ гІядабли сабгу наб  
ХІерриэс дунъяличир,  
Кърширикес диги наб  
Дила зилан рурсбачил.

Дурес диги илдази  
Лерил дила пикруми.  
Амма ну урухкІулра –  
Иргъув, гъатІи, илдани?

Хъалира цІябли саби,  
Цудар гІянжила хІябван,  
УркІира рурцІули саб,  
Зе какърси дяхъиван.

Дугели карихъасли,  
ХІебашар гъанкІ сеналра.  
Лукъули уркІилизир  
Шисим-шаха лерилра.

Дурарухъес бикалли  
УркІи дила батбулхъан,  
Чарриубли ракІасли,  
Мегъ чедихъибсин бирар.

Даим ну пикририкIус,  
Рулгули Аллагълизи,  
Иш набгъуна адамлис  
Къисмат малукIад или.

Нуни дуркIул гIямрула  
Башули ахIен тIягIям.  
Букуси беркайзибад  
Касес хIериула тIем...

Набзи дурути дугъби  
Сарри хIела мурити.  
ХIела уркIила духIнар  
Лукъулири масхурти.

Ну ил хIечи рирхули,  
Гъанаргу азадеш.  
Нуни хIела дяхIлизир  
Чедаира ламартдеш.

ХIуни дуриб бугътанги  
Сеналра хъумхIертисра.  
ХIуни берцIибси уркIи  
Бирар сагъхIебиэсра.

\* \* \*

БерхIила ванал нурли  
ДицIахъу цIуб дяхIурби.  
ГъархIедизур дигайли  
Сукъурдияхъуб хIулби.

ХIерли рирус хIяйранни,  
ХIебличи ну гъалакли,  
Наб дила талихIла пай  
Савгъатлис лебху или...

### ХАТIА

ХIела жагати дугъбас  
Ну риргIякариубра.  
ХIезирти ламартдешли  
Ну тIимкълизи руцира.

Бурибси мухIлила гъай  
ХIуни къянабаради,  
УркIила пикрумира  
Гъариллизи дуради.

ИргъхIергъу ца адамли  
Дила уркIила цIумла.  
Лерил пикруми дурес  
Агара ахъри дила...



Зубалжат ПЯМАРОВА



### УРКИЛА ДАЛАЙ

Леб уркилаб ца далай,  
Дила ахIер Дагъистан,  
БучIуцад балга къяйда  
Саби дурхъабикIули.

Дила дурхъал Дагъистан,  
Къаркъубала чIумадеш,  
ХIуркIбалара гъалакдеш,  
Гъубзналара чIумадеш.

ХIела хабар, Дагъистан  
ЛукIусири шушкначил,  
Гъанна биалли саби,  
ЛукIули къаламличил.

ЦIуръабас хIу неш сабри,  
Гушилис хIу къацI сабри.  
Милигсилис шин сабри,  
Къакъбяхъес шури сабри.

Лерти сари сунезир;  
Ахъ хIурхъала ахъдешра,  
ХъанцI урхънала мурхъдешра,  
ХIяндешла пасихIдешра.

Илди лерилра лерси,  
ХIу аралы калаби,  
Дила биштIаси улка,  
Халаси уркила бегI.

### ХIЕБИЛШУСИ ЦIА

ХIебилшул цIала удир  
Уми ухули сари,  
ЧIакнигъунти гъубзнала  
Даимлис жагъти сабти.

ХIебилшуси цIа саби,  
Алхун гъубзнала хIулби –  
ХIебилшуси цIа саби,  
Алхун гъубзнала гъунар  
ХIебилшуси цIа саби  
АлкIул насаблис хабар.

БерхIи биаб, заб диаб,  
Алки саб хIебилшули,  
ШалгIеббулхъул халкълизи  
НасихIят гъанбуршули:

ХIебилшуси цIа саби,  
ХIебилшул умут саби,  
ДецIли бяхъиб нешанас  
Урушби чарбирниличи.

ХIебилшуси цIа саби  
Алхун гъубзнала уркиби –

ХЕбилшуси ца саби  
Лябкьутас шалабиклул,  
Аркьутас гьуни бурул,  
Ил саби уркила ца.

ХЕбилшул цала гьалаб  
Ташли саби кьараул,  
Мицирти хербахьес  
Жан кьурбандариб гьубзнас.

#### АВАЛ ТУГЪЛА

Тавусла музурбани  
Жагабариб кьянани  
Дугули сари хамли  
Мургъи анкила кьукьри.

\* \* \*

Амма, тикрарбирнили  
Балга заяхебиру,  
Тикрарбирухели ил  
Гуррара дурхьабиклар.

\* \* \*

Кьянала жагадешли  
Жагабарибси зурхьяб,

Бахъинагарли билшан  
Бархехъла цябдешлизиб.

\* \* \*

Хатлабазибад хуни,  
Вари, баки мабирид,  
Сунна декдешла удив  
Шандан кьяйда, улкладну.

\* \* \*

Дунья-варъала кьям саб,  
Амма хьуммартид хуни,  
Эгер халабиалли,  
Агьуличи шурбулхъни.

#### ПИСКИИ МЯХИЛИС

Дахь мурхьтигу хьябкубти  
Пискии Мяхили делкунти,  
Децили бяхьибси уркии  
Чуни паргьатбирути.

Гьарахьси тухумличир  
Сари гьамли дирути,  
Хела марси юлдашван,  
Хед хаинхедирути.

Гурра гяхи саб чяхи-чяхи,  
Шишимулти архуси,  
Сунна рамчла цякьдешли  
Уркила цум кьяигуси.

Хера илгьуна сабри  
Пискии Мяхила пагьмура,  
Рамчли гяндхьебиклуси,  
Халкьлира хьумхертуси.

Бугал дисван дугати,  
Няс хьякимти балтути,  
Хьубзара ахьвирути  
Илдигьунти хьябкубтас

Халкьла баркала биаб,  
Дубурга икрам бараб  
Хела марси пагьмулис  
Даршдусмазив Писки.

## ГЪУНИ

Бархъси гІямрула гъуйчив  
ВехІихъадли къардикІес,  
Жагасира бархъсира  
Нядешличил дархдиркур,  
ГІур хІед кумекхІебирар,  
УркІилабад лябкъуси  
ГІядлу-зегъала закон,  
Амма хІегиб адамлис  
Къадарлис буйрухъикІес,

Гъамбирни балаллири,  
Сунна гІямрула къаякъ  
Балагъла дубаначи,  
Къасбиригу илини  
Ила гачхІебикахъес.  
ВиргІявиргулри адам  
ЛямцІли, бархІехъ бархІила  
Сайра сунни аркуси  
Ил балагъла дубличи.

## ЗАМАНА

Заманали гъятІу  
Ахъ кІялгІнира шурмира,  
Жагаси жагадешра,  
Дахъ кегІерти жагъдешра.

ХІу дарманра бетаруд,  
ХІу дяхъира бетаруд,  
Ардукъяллира дусми,  
Зимбухъи хъумхІертести.

ЦабехІтас децІ бихуси,  
ЦабехІтас цІакъ лугуси,  
ЦабехІтас яхІ лугуси,  
Агъ, замана, замана.

ХІярхІубара хІела дуцІ,  
Нешани хІянбируси,  
Уршби цІуръабируси,  
Жагъдешла ранг архуси.

Хъярхъ айгъирла дуцІ къяйда,  
Сунна хъярхъил гъуцІличил,  
ЦабехІтас убай нешван  
Бетаруси бахъ къяркъси.

Амма сен-биаллира,  
ХІули липІла замана,  
Чусра бикІули гІямру  
БегІлара бархъси саби!

Сен илцад гъалаксири,  
Дузаблизиб айгъирван,  
Дай гъуйчир къябиули  
ГІямрула хъулла гими.

Арали сайра или  
ГІямруличи мерхудра,  
БакІалли хІечи бекІа  
Сабаб гІягІнихІебиркур.

## ЦІА

ЦІами дирар декІарти:  
Бирар дигайла алкун цІа,  
Гъимила ружерла цІа,  
Душмайчи абалкунси.  
Улхни чули балукъи,  
Жан ахІерхІедируси.  
ХІебла дугира саб – цІа,  
ЦІикрумасра билкъа – цІа,  
Бирар гъаман руржули

Нешла уркІилабра цІа:  
Дигила малхІямдешла  
ХІулбазирадра дулхъан,  
ДуцІарти цІаван нургъби  
Халал балагъ бакІили,  
ГІянд гъакабикибХІели.  
Илди лерилра цІама  
Бихули саб чІумали  
Дубурта абикъурти  
ГІяхІ гъубзни дубурланти.

## ЗАМАНА

Сецад хъярхъикадлира,  
Заманалис гIевхIейуд,  
Сецад тIашизадлира,  
Саби хIед тIашхIебилзан.

Арху хIела жагъдешра,  
Лерху, жагати хIяндеш,  
ЖагъилхIели агарти  
ГIямрула духудешра.

Гьалар пикрихIейрути,  
Някъ гьакIбалли далтути,  
Гьанна хIисабдирахъу  
ТIабигIятла рангани:

Вавнала жагадешра,  
БерхIила ванадешра,

ХIера, кадиркули сар  
Кагъарла кIапIиличи  
Цудара къаламла къел,  
Чиларил гIямрула къел.

Авлахъла жагал вава,  
Ва дила цIуръа вава,  
Сен илцад пашмансирив?  
БиштIаси хIу батурли,  
ХIелара неш ребкIибу?

Адамла гIямрулизир  
Бархъдешра ва къянара  
Ца гъуйчирад хIедашар,  
Рахлицун гъар-гIердирар.

БегIлара декIси саби:  
Юлдаш хаин виалли,

БархIила бухъяндешра,  
Дай дугила лехIдешра.

Ил лебилра жагадеш  
Нушаб гIелаб калахъес  
ГIямру къурбандарибтас  
Ванзала икрам биаб.

Телефонна гьамдешра  
Вирудра хIисабдарес.  
ГIур къанни хIебиахъес  
ХIисаббара тIабигIят.

Тулби-ургар гъум къяйда,  
Аркъуси манзил буцес  
Кайсен някълизи ца жуз,  
УчIан, дила жагъилси.

\* \* \*

Белики, илди дурги  
Алхунти гIяхIгъубзнала,  
Диэсра асубирар  
Бариб вершала ламарт.

\* \* \*

Занзбар къадала вава,  
Сен илцадра хамсирив?  
Къянала разидешра  
Бархъдешла къудкъудешра  
ХIуни дарх къяраирив?

\* \* \*

УркIилизиб сунни мер  
Баргили буцибхIели.

Амъур шин нясдалири,  
УмцIес чебиркухIели,  
Дамкъур шинна рамчлизиб  
Баргес сунела бархъдеш.

Дагъиста халкъла шагӀир  
Аминат ГІЯБДУЛМАНАПОВА



### УРХІЛАРИ

УрхІла сайри гъанна,  
Нуни балура,  
Гъалавриван набчи  
ХІерикІадлира.

Ну хІела ретхІерус,  
Набчи гъиммаркІуд,  
УрхІ детаурлира,  
Набчил гъаймайкІуд.

Хъуланала баки  
ТІутІули саби,  
Аръала мачниван  
Дигай кІундацІиб:

Дигайлари субхІян  
Балгни каргъурси,  
Рулгира, Аллагъли  
ХІедариб къабул.

Малаикра гъанна  
Сайну акили,  
Уэн набчивадли  
ХІура гъарахъли.

Дигайла къар дакІиб  
Нушала диркъар,  
Аргъили хІялани  
Нуша кІилалра.

Къисматла къудкъудеш  
Дубша буцили,  
Агъула пигъала  
ХупІра бирули.

Руулра гъанна ну  
ГІядатлис марли,  
Уэн хІура дила  
Дякъ хІебуцили.

Тикрардарес дусми  
ХІейуб чилилра,  
Бурямли ардухиб  
ЦІакъти дигайра.

Дуги шалабарес  
ХІебирар шямли,  
Ухули цІализиб  
Каберхаллира.

КарцІайла хІеранас  
ХІулби сар шявли,  
Дигайла макъамтас  
ЛихІби сар гІянцІли.

\* \* \*

ИлхІейчирад сари  
Къарлизир вавни,  
Дунъяла дяхІ дагъес  
ДакІудиубти.

Карцайла заб дариб  
Дубурла хъари,  
Даили хабурти  
Цакъти карцайла.

Илхейчирад сари  
Даклудиубти.  
Закир верхел рангла  
Жагал зурхябти.

\* \* \*

Ит дигайла манзиллис  
Гъаннара рулгулира,  
Садирхъули субхянти  
Бакилизир дигайла.

Чумра мачи каргъурра,  
Бирули гъарийс балга.  
Гъанра аги ил баки  
Тутубиэс бирнира.

### ДУДЕШЛИС

Ахъри лебсив адамла  
Гъанбуцес иш гяламат,  
Дудешунани уршби  
Хярибирхъуси гядат?

Гязабтазибад гялам  
Берцахъири чуйнара,  
Гязабтазивад чархла  
Ху уцахъан левсира?

Иш дунъяла дарданас  
Хуни дарман бургади,  
Дунъяцад хела дардлис  
Бургусивара чили?

Урхлис гяхидеш булгули,  
Аллагълизи улгади,  
Хед гяламли далгунти  
Хергъибтив чевяхисили?

ПасихI лезмила гъайли  
Бяхъибти сагъбиради,  
Хела уркИла дяхъи  
Сагъбиру вара сели?

Балагъ бакИб мерличи  
ЛямцИван даклуулхъади,  
Гъанагарси балагъли  
Хура севан варгадив?

Хела сихрула някъба  
Сагъдарри чумра дяхъи,  
Чили сагъбиру вара  
Хела даимси дяхъи?

Шантала шишимъули  
Хуни шинван дужади,  
Хела шишимти держес  
Биэсара гяламли?

\* \* \*

Бяхяэс кахси балагъ  
Ахъри габгу Аллагъли.  
КъухИмабизахъабгу чарх  
Гязабтала битлакИли.

Даргазир дарула къар  
Дашаб хлебра янира,  
Хела дардла дяхъила  
Кахелесли хяналра.

\* \* \*

ЧеункъдикIабгу гямру,  
ДурхИнас дурхИни алкИли,  
ГяхИгъабзала къам берхъаб,  
Дусми геркъадикИли.

Дагъиста багъа ахъли  
Хуниван ахъбурцули,  
Ахъбиаб хела къушум  
Хабарван гяйбирули.



### ДИЛА ГІЯХІТИ ГЪАЛМАГЪУНИ

РухІлизиб умуги, гІяхІги адамги  
Чугурла гимиван уржибти гъаман,  
Иш ванзала давла хІуша саррая,  
ХІушаб дезарикІес хІерумсус нура.

Бурхлиур чатІниван далгунтихІели  
Къугъаси къушумра саби хІушала,  
ХІуша уржибхІели биршур дунъяра  
ХІушаб дезарикІес хІерумсус нура.

ГІяхІдешуна диркъес даим гъалакти,  
Дезнала субхІяйзи каргъули балгни,  
УркІила умуси далай бучІулла,  
ДихІяба Аллагъли, адамги дила.

Дунъяла давлуми, марли, хІушара,  
ХІушачилхІели ну паргъатли сарра,  
УзбачилхІеливан гІяйкариулла,  
Дерхъабая, дила ГІяхІги адамги.

### ДИЛА АБА

Кери барес хІяжлизи гъалакли саб адамги,  
Дила хІяж, дила балга, хІу сарри, дила аба.  
ХІечи раес нура гъалакли сарра.  
ДуцІрумла ванал берхІи хІерлизиб саби хІела.

Ил хІерли кІундицІахъу анцІкъира шишимтира.  
Аба ахІерси дила, дарман сар хІела лявра.  
ХІела малхІямти гъайли диршахъули сар хІебра.  
ГъайлизирхІели хІела аятуни къуръанна.

Булбул чатІала тІама гъаргалаб иргъулира.  
Дунъяла дурхъал давла шала саб хІела хІерла,  
Илини бузахъуси саби дила дунъяра.  
Рулгулла хІерриаби ну мицІирли лерцадхІи,

ГІязиси аба дила, хІури дурхъаси балга,  
Дила гІямрула архІя игъбарличи аркуси.  
Дила хІяж, дила мижит хІела юрт саби, аба.

## РАСУЛ ХІЯМЗАТОВЛИС

Хіела гІядатла гІямру  
Дагъистайс хабар аур,  
Хіела чевяхІдеш бурес  
Чум-чумилра хьулбиуб.

Тарихли ласбирули  
Дунья чина баалра,  
Хіела у кавлан даим  
УркІбазиб адамтала.

Хіела пагъмулис кьимат  
Кабатур гІялимтара,  
Хіела кьадри ва кьимат  
Буру дубурганира.

Хіела у бурибихІир  
Ну пахрули рирцІулра,  
Хабарлари, хабарла  
ХІу лебил гІяламлара.

## БЯЛИХЪЧИ

ХьанцІа урхьула гІела  
Ардякьун гамурбира,  
КуртІдикІути ругерта  
Дуахьун чула кьелра.

Ругерта, хьяб буцили,  
Ахьрурцулра хІуниван.

Хіечи хІерли гІуррара  
Ташлира урхьу дублар,

Датурли ургуд марли  
Урхьназир набчи дигай,  
Байдилкан чайкабира  
МалхІямли набчи хІуван.

## МЯХІКАМБАРАЯ, АДАМТИ, ДЕРГЪЛА БУТІАКЪЯНЧИБИ

Гьар аркъуси бархІили  
КъантІкадирули дусми,  
Кабурхули саб гьанна  
Дергъла бутІакъянчиби.

Ва дуньяла адамти  
МяхІкамбарая илди  
Ахьри агу илдала  
ГІурра гьандуцес дургъби.

Ва дуньяла адамти,  
МяхІкамбарая илди,  
ХІушала ахІер жанван  
Дергъла бутІакъянчиби.

Келекла бурямтани  
ВацІа цІурьабарили,  
Бяхьибти бургъантиван  
Галгуби геркайули.

Кадиркути зубарта  
Зак урцІабирахьули,  
Дугила шихъла бацла  
Саб шала камбикІули.

Ва дуньяла адамти  
Дургъби гьарахьдарая,  
Дергъла бутІакъянчиби  
Паргъатли батирая.

БекІличир бацла шала  
Нушаб чули бихути,  
КамбикІули саб гьанна  
Дергъла бутІакъянчиби.

ДецІлизир сарра нуша  
КамкабикІули илди  
Кьакъадешлизир сарра,  
Азихьван кабурхули.

Илдачиб тIашли саби  
Сагал дунъя нушала,  
Илдани бехIкабихъиб,  
Хъулчи сагал гIямрула.

Сагал дунъяла дазу  
Илдани бехIкабихъиб,  
Илди саб чIумал бару  
Иш дурхъаси ВатIанна.

Чедибдеш ибси пахру  
Хъурабариб нушази,  
ХIиличил белкIун ил дев  
Лусенна уркIилизи.

Адамти, тIашаая  
Иш дунъяличир дявти,  
Бамсурли саби гъанна  
Дявгас ахир баргибти!

Ва дунъяла адамти  
МяхIкамбарая гъанна

Михъирти ордентазир,  
Чурхри кахти хIянбазир,  
ЯхI чIумати хIял хъярхъти,  
Бархъдешла ца хIулбазиб.

Чедибдешла гъунарти  
Сархес гушли калунти,  
ДяхIила кIиликIмазир  
Чумра яни деркIибти.

Дяхъурбас дарман агар  
Дунъяличир калунти,

Рирхусири хъяшаван  
Ну хIела хъямачира,  
Къянала диъниличи  
ХIебирки наб гъаналра.

АхIенригу гIядатла  
Нушала манзилтира,  
Мурити муэртиван  
Дурхъати хIяланира.

Дяхъи-хъаслабиубли  
Иш дунъя берцахъибти.

ЧехIебиулрав дунъя  
Багъаагарбиубли,  
Нушала игъбар пахру  
Пархбухъи, кабурхули.

Неш рирар къайгъичерли  
Дуклавси дурхIяличи,  
ДакIударая къайгъни  
Дергъла чулакъуначи.

Глебшила галгубала  
КIапIри кадурхуливан,  
Кадурхули къяяни  
Сари дудешунала.

Эй, адамти, хIушази  
БусраврикIулра гъаман,  
Калахъес дудешуни  
ГIямайгIир умцIеная.

\* \* \*

Душмайчилси дергълизир  
ХIила забли дазибти.

Цала хIерли душманти  
ХIялагарбиахъубти,  
ХIярхIяливан урухли  
Гъайили буахъубти.

Дергъла бутIакъянчиби,  
ХIялагар майрудая,  
ЗугIлумас ва излумас  
МукIурмадикIудая.

\* \* \*

Ит дигайла манзиллис  
Рулгулира гъаннара,  
Дигайла субхIяйзирти  
Садирхъули мачнира.

Гъанбикуназив дила  
Калунри мукIурлира,  
ХIялалвалтулри хIура  
Гъанбиркули ит дунъя.

Дегъдешла дубуртачир  
Парчдухъун урунжуни,  
ХІуни набзи дигайла  
Гъаргдарила хІялани.

Чукурдиуб къаркъара  
Ташдатурли лусенти,  
ХІуни набзи карцайла  
Дурили аятуни.

Аркъулирив арукъян,  
Набир мерс хІедакъахъи,  
Калес дигулрив, кален,  
Дигайла ца ухахъен.

Чили пикрибариба  
Дурадилтес мягІдунти,  
ИлдикІун дигай сари  
Нуни дигІандарибти.

Шарабли бицІибси  
Арцла гажинван,  
ХІечи хІяланани  
БицІибси уркіи,  
Бахъ кункли бячунри,  
Игъубли гъуйчи,  
БутІа-бутІақайуб  
Уркіла бутІни,  
ХІуни уркіаила  
Дурчутив чили?  
Дяхънуша агара,  
Дарман агара.

\* \* \*

Мурт саррил детахъибти  
Дила дигайла мачни,  
Урхънала лутІилизир  
Сар жавгъар духуриби.

Сари урхІли дургули,  
Дила карцайла шараб,  
Парчдухъунти итхІели,  
Чегемла шурмала барг  
Баргаили чяхІдухъун,  
ЧяхІ-чяхІибачи шурдухъун.

\* \* \*

Аркъулирив, арукъен,  
Дигайла хІеб армахид,  
Кавлулирив, варх кален,  
Карцай тІутІумаирахъид.

\* \* \*

ХутІла ца дакІударес  
ХІуркІби тІашкайули сар,  
Дила карцайла цала  
Къуват биъни хІебагъур.

\* \* \*

Гела чарухъири,  
ЦумикІен гъанна.

СелигІирал умцІулра нуша,  
Ишди дусмазир нура,  
Нушала дигай ахъес  
Дусми адиутира?

Се баргес дакІибтира  
Иш дунъяличи нуша,  
Карцайла дяхІцІи бишес  
Дунъя абиусира.



**Къурбан ИБАЦЦИЕВ**



**УНЕУ-ХЪЯБ**

*(поема)*

**І бекІ**

Дусмала духемли мяхІкамбарибси,  
Гъаб-убла ца хабар нуни аргъибси  
Бурисну хІушази саби лебсиван,  
Къабулбарая иш дурхъал аятван  
.

Дубуртазир хІебли някъиш лукІулри,  
Заклизиб берхІира хІязтабиркъулри,  
Алавчар тІабигІят мицІирбирули,  
Шинишдеш хІулкІули чебсаргъулири.

Маза-мас, хІяйванти гІяйдикІулири,  
ХъанцІешлизир закла чатІни дучІулри,  
Хъярбукла тІабигІят вавнабяхъилри,  
Исбагъи рурсиван кегІебли сабри.

Ши-алав къадуби паргъатли сарри,  
Къярдлабси хІеркІлира бамсриихъулри,  
Чедирти шурмира нартван тІашлири,  
Шиниша вацІара гІяшли бучІулри.

Гъарил секІал далги низамлизирри,  
Ванзара закраван далайдикІулри.  
Дубурла тІабигІят Агъ, жагалири,  
УркІира хІебугъес хІези хІебири.

## 2 бекI

Аллагъла дурхъаси жумягI бархIри,  
Шила дублаб рурсби чебиулири .  
Чехъерти паргъатли лякърбикIулри,  
Мурхъти пикрумани ясирбуцилри.

УркIилис бахъ гъамти юлдаш рурсбази,  
ГIяшурани гIяшли уркIи бурулри,  
ХIясайчи дихъибти цIакъ дигайлизи,  
УркIи игахъули гIеларикилри.

«Агъ рурсби, марлира ну къакъалира ,  
КарцIайла ламили ну къяриула,  
ХIясан чезс гIинзи шичи рашула,

Шин леркъи къянари бацIкабирула,  
Сагали гIинизла дураулухъула.  
Дила сартан ХIясан хIулба чехIеас  
БитIи чархла гъунар хIялагарлира.

Марлира, сецадхIи ну калишара,  
УркIила цIализи лагърирахъули,  
Шаласи талихIли ну раргишара,  
Шахли вава къяйда, цIухраришара?»

Шишимтала биса чузир гъудурти,  
ГIяшурани хIулби ахъдуциб пашмай,  
Шиниш майдунтачи вавна дерхъибти  
ХIерризур рурси хIябилра хIяйрай.

## 3 бекI

Ахъриуб ГIяшура, лерси мерличир,  
Уркухъла ши бетахъ хIерризур гъуйчи.  
– Рурсби, хIердизирая, хIуша ит шайчи,  
Ит гъамсабикIуси хIуребаличи.

Харчбизур рурсби вавниван жагъти.  
ГIяшурани някъли лишанбируйхIи,  
ХIербизур илдира хъипIли буцибти.  
«Душман», – иб цахIнабли, руржулрину хIи.

БерхIила ванаси нурла лямцIлиуб  
Чебиу хIуреба валкIа Тимурла,  
Шушкни сари дигъи дямли вайлиу,  
Ургни сар хIядурли някълар гъарилла.

Къалханти чехъили сари чурхачир,  
БехІ бугати мегъла къапІни бургачир.  
ВеГІбекІуниван саб, ахъси дубурла,  
Чузисиван къисмат дубурла халкъла.

ЗузбитІи, чІикъбитІи душма хІуреба,  
Хъярбукла шилизи гъамбикІули саб,  
Мижитлизибри гъубзни, балулри рурсба,  
Се барес гІягІнилив – гъигъла манзийчиб.

ГІяшурани хІеръиб юдаш рурсбачи,  
Ласряхъиб сагали, хІеръиб душмайчи.  
Гъигъла манзил баиб пикрирухъесра,  
Жапаси хІякъикъат бархъли аргъесра.

«Душманна хІуреба нуни гІашиис,  
Кумек сабаайчи гІямал балбурцис».  
Хъябруцбикун рурсби ва декІарбикиб:  
ГІяшура лесличи, рурсби шилизибяхІ .

#### 4 бекІ

ГІяшурани баргиб дигІянаси мер  
Шилизи башуси гъунила чедиб,  
Ахъси лесла чедиб къаркъубала мер.  
Душманти чебиур ил лесла удиб.

Игит рурси сари дигІянкили,  
Хъябагъри шурмани алаврарили.  
ХІулбала хІер атІи саби бугали,  
Душма бургъантала балкІа чІичІайчи.

ХІуребала тугъ саб гъамсабикІули,  
ГІяшура дигІянти шурмала уди.  
Гъубзнала кумекра саб къанкабирули,  
Биалра вьвдешла хабар баили.

Гъанбикиб рурсилис бухъна неш-дудеш  
Жайчивра ахІерси вишІгІаси узи.  
ГІур хІулбала гъала лагдизур жагъдеш,  
Гъансаур ХІясанна сипат шаласи.

ГІяскарла гъалабти лесла удибри,  
Илдала бургачи хІер алгІахъули,  
Лебил цІакъ рурсили цалабяхъили,  
Гердатур къаркъуби, шурмала уди.

Ташбизур бургъанти: се анцбукъ саби,  
Къаркъуби закирад хейэс каркули?  
Гяскарла халалла буйрухъ ца саби:  
Гердаииярая наб, кайзес низамли.

Илхели Гяшура ретухъи лесла  
Ташризул бехличи чеди душманна.  
Батбухъун Тамара жагъси рурсила,  
Гебагъур далайван симкъра илала:

«Лягинат баклаб хечи, душман увяхси,  
Гянддушес дубурти къасли вицибси,  
Гъаргъешли, гъарали иша ваибси,  
Варгаби беклали хябра агарси!

Арцур лесла шурми душмайчидяхли,  
Цархилтира чучил дарх гериули.  
Рурсила назикти диштла някъбани  
Бекла саби душмайс кахси бихули.

Чедиб лес бучули, кахси Тамари,  
Къаркъуби ва шурми сарри арцурли.  
Удиб саб душманти тахъли ва хякли,  
Гъанагар жагъаннаб къадарбиубли.

#### 5 бекI

Душмантала вегI бекI вявикIар ахъли:  
«Чи сая лесличив икI хамли тIашси,  
Бургъантаци шурми геркадирули,  
Дунъяла пачачил дяви бируси!?

Хуша дила хури дякъи уца,  
Дугати шушкначил бутIнадварая!  
Рахли икI мицирли калахъадалли,  
Лер мерличир хуша хябладирхъура!»

Тимурла бургъанти баиб лесличи,  
Алаврариб рурси тIашси шурличир.  
ЛямцIбикIуси шушка бяхъиб иличи,  
Исбагъи карикиб шурла хъинжличи.

Бургъанти бакIили багъахъурхели,  
Чула вегIбекIлизи рурсиличила,  
УркIухъи хякизул, вирхес хейрули,  
Тамашабилзули гъунар рурсила...



6 бекI

ЖумягIла дехIбала тамандарили,  
Шила гъубзни саби хIекъли гъалакли,  
Душмайчил дяхI-дяхIли кабухъес дергъли,  
ГIяшурала гъунар даимбирули.

Къукъяла гъалаб саб палда ранг айгъир,  
Арцла гили-къабта лямцIардикIуси,  
Илала къакъличив ХIясанра чейгъур  
Къуватси някълизиб шушка рурхIуси.

ХIера дубурланти кабухъун дергъли,  
Цудара душмайчи гъими бургъули.  
ЦIала дайлизив сай ХIясан ургъули,  
Турличил душманти бутIнадбирули.

Тимурла гIяскарла халал вявикIар:  
«Урухмайрудая, душмайс бяхъя! –  
Руржули, гIясили ил буйрухъикIар, –  
Чи урухиалра кадуршурая!»

Дубурла сарганта уркIецIи балав!?  
Шушкнала бяхъяна мицIирли валтав !?  
Урухиубсини гъабзадеш далав –  
ВегибекIлира айгъир агъ, ласхIебалтав!?

Хъярбукла гIяхIгъубзна гIергъибикили,  
Ханжулта ва шушна сабри бирхъули,  
Душманти кабушиб ца хIебатурли,  
Исбагъи ГIяшура черяхIрирули.

7 бекI

Къирбариб душманти багъадургани,  
Шилизи чарбиуб къукъя уржибси.  
ЧевяхIяхъиб ХIясан лесла бехIличи,  
ХIеризур ил гъариб риганайличи.

Шурла хъинжличир ил сарри паргъатли,  
Дяхъурба рицIибси исбагъи рурси.  
Чури хIебемхурти гъезра тIинтIлири,  
Тумазир дургъути хIира дяргIилри.

Къукъубачи кайкиб жагъил багъадур,  
Шалати дяхIличи урши хIеризур.  
Игитла бекIара сабри жагаси ,  
МицIирсиван, марли, рурси каризур.

ГІяшиуб иличи гъез хІяршдирули,  
Андаличи кІунтІби байдилкахъули.  
ХІулби къяпІкадариб хърхъа цІударти,  
Ахъруциб някъбачи душман вячІунти.

#### А Х И Р

Унеу-хъяб бихъиб ил мерлис ура,  
Хърбукла шантани итхІейчибадли,  
ГІяшурала гъунар гъанбиркахъули,  
Памятник саб Лесличиб тІашли  
Гъанна тикрарбири халкъли даим азадти  
.

Тимурла хІурбуни шалгІердухъунна  
Дарсдиуб чумдехІра янира хІебра.  
Эркинбиуб халкъла мискин яшавра,  
Дарсдариб дубурта чуйна вавнира.

Нунира исбагъи черяхІрирули,  
БелкІунси иш хабар къабулбарая.



# Проза

Фатима КЪУРБАНОВА

## КЪИСМАТ

*Хабар*

Фатима Г'Ябдулкадировна К'уц'улова – Дагъиста пачалихъла университетла управлениела факультетлизир преподавательли рузули сари. 18 дус х'Янчи барили сари илини университетлизиб. Кубачилан сари. Илини мургъи-арцла бурибти устнала ши саблин машгъурси Кубачила халкъла г'Ядатуни ункъли дала. Ил имц'аливан урус мезли сари лук'усира. Иш яргалис буч'антас илала «Къисмат» бик'уси хабар белч'ахъес гъалабирхъулра.

## КЪИСМАТ

Берх'ила нур закла гъагултазирад мер-мерличир дурадиркулри ва шилизибси бахъх'ила юртла гъаргала шалабирулри.

– Пат'имат, сегъуна тамашала аргъ сабил х'ерризур, – Маръянни рузилизи жииб, – гъагулти сари-ургар дирх'усигъуна тях'яр саби.

– Мех'урга маругъуд, – Нинани илала пикри уббяхъиб. – Заклизир гъагулти сари, г'Яшли биалли, ванзаличи кабихъи, дирихъ саби. х'уни балулрив, ишбарх'и нушала исбагъи Пат'имат шери аркъули сари!

– Гъу, диурну х'ушаб, рузби. Маръян, х'уни гъанбикахъагу, се рик'ил нушала хала неш «Лебилра рурсби, 17 дус биубх'ели жагати бетарути саби» х'ерик'ив?

– Ге, ге, – дукаррях'иб Нина, – набра гъанбиркули саби, секъяйда х'ерли рирасил 17 дус риайчи.

Юртлизир савлиличирад мекълис далкъарахъути хурегунала т'емани сарри...

– Сецад г'ях'или бак'ибал! – разити т'ама дурадушиб рузбазирад ца Лейлани.

– Бахъал г'ях'или бак'ини г'ях'иси саби, – имц'абариб рурсбачи дуравхъунси илдала дудеш Х'Яжинира. Ил шилизив х'урматла адам сай. Илини сарри рурси шери редлугуси. Бахъал г'ях'или лебни мекъличиб кубачилантани г'ях'иси г'Ядатлизи халбируси саби.

« Се сабри гъат'и дила Манабас сегъунти пергер рурсби сабил сунела чебаэс бикибси биалри», – пикриик'улри Х'Яжи. Рурсбала неш жагъли лералли сукъурриубсири. Итх'ели илала рурсби бишт'али лебалри.

Хъалибарг Дербентлизиб х'ербирулри, дуц'румла замана биалли, лебилра г'ярбук'антаниван, илдалара хъалибарг шилизи гечбирусири. Х'Яжис сунела хъунул дебали ригахъи. Илис жагати палтар т'алабдирух'ели, адамти тамашабирутири ва г'Яшли ца итиллизи шуп'урбик'утири. Х'Яжи биалли, хъуна някъра буцили сайра, Дербентла базарличив разили къунзик'усири. Гъайгъай, илдачи къяскабирутира къаршибиркулри.

– Сегъуна ахІмакъ адам саял! Ихгъуна мурул адамла хъунул сукъур сари, – чуйнара сунес гІеларад илдигъунти гъай аргъибтири ХІяжини. «Сегъунти ахмахуни сабил ишди адамти, – пикриикІусири ХІяжи, – дила Манабачир пергер хъунул адам чинар лера? Илгъуна чинаралра хІерургар»

Илала пикруми ахъли дяхъибти музыкали – дамла ва дядла тІамрани къябаиб.

«Гелешмешла гъамти юртлизи абицѳули саби, илдас гъуниваэс гІягІни-биркур», – пикриухъун ХІяжи.

– ПатІимат, балликъянабас гъунираи! – тІамадариб зизи ГІяйшани. Рурсбани дигиличил цІкуруи кІапІрурцулри, чула ригуси пергер ралликъяна.

Илдазирад ца Зайнаб цІкуруиличи имцІали гъамриуб ва гІяшли иб:

– Агъ, ПатІимат, сегъуна ахІмакъ гелешмеш саял хІела, жагаси, хІуни илала дудеш чеирив? Ил тамай хІяна сай, гъезра, нудбира. ХІулби булан. Марлирагу, шайтІангъуна сай. БикІули бирар: илдигъунти дурхІни баркъили гІергъи, гІур се барес вирусив?

ПатІиматла дяхІ дамкъур.

– Секъяйда «илдигъунти дурхІни» – уркІрухъи кахриуб ил.

– Ге, ге, – рикІар Зайнаб, – илдигъунтала лишанти дурхІнала дурхІнасра гІердашути сари.

– Се бетаурлив? Се биублив хІед? ВайтІа мага сабив? – рикІар Нина, рузила дяхІ илцад цІубдиубли хІясибдали.

– Юх, юх, селра биубли ахІен, гъар секІал гІяхІил сари, – рикІар ПатІимат, Зайнабли дурибти дугъби илала бекІлизи хала къякъла бяхъван алтІулри.

Гъанна илис гІянцІли гъанбиркулри, шила дайлабси майдайчи савлиличи бикайчи булхъес жагъилти батбихъили. Ил разити адамтала къукъяли архуливан бизур. Савли биалли, ил илдани хъулира чаррариб ил гъаргала дубхъир тІашризулри, дубуртала гІелабад абулхъуси берхІиличи хІеррикІулри. Мекъла кІиибил бархІи сабаилри. Гелешмешла гъамти ил цІкурула хъули аррукес бакІес гІягІниртири. Илдани муруйчи аркусири мурталралис.

«ГІур се сабив бетаурси? Наб иличила багъес дигула! Гъандуцес рирули ахІенрагу», – пикриухъун ПатІимат. Ил нургъба гІяндруршулри. Илис чІярбяхъес дигулри:

– Юх, юх, наб илгъуна къисмат дигули ахІенра. Я дила дурхІнас, ну урукІулра, се саби «гІур биэс бируси»?!

Хъа бухІнабад нешла тІама аргъиб:

– Дила рурси, хъаррихъен камси бамсриахъес.

– Ге, гъанкІахъес чебиркур, – ПатІимат хъули къалабарикиб.

Илис бекІлизи бакІиб, селилра ил Мурадлис шери рукъяхъес хІебирар или. Мурталра илала илдигъунти дурхІни хІебирар или.

– Иличила бегІтази секъяйда бурусив, мекъла цаибил бархІи арбякъи биалли!? – руржуси тІамаличил шипІирбариб ПатІиматли.

Илини хъулибти гІяхІлази салам бедиб ва нешла хъули арацІиб, илала гъалар къукъмусрикиб ва рисикарииб:

– Дила ахІерси неш. Ну Мурадлис шери рукъес хІерирус, я ил хІебирис!

Рурсилис се бетаурлил нешли багъес, я аргъес рирули ахІенри, илкІун гъаларван шери рукъес къабурликибсири, итхІели илала тІама булан разиси сабри.

ПатІимат нургъба гІяндруршулри, Зайнабли сунези дурибти кахти дугъби тикрардирулри.

Илала бисаличи хъули дудешра ухІнаухъун. Селра хІейІули, ил рурсили дурутаци лехІихъулри. ХІяжи пикриикІулри:

– Се бирусив гъатІи? Сен ПатІимат ил рурсили дурибти гъайличи рирхаурсив? Ил барес къасбарили риалли, илизи цархІил барахъес хІейрар, ил сунела гъайличирад черрухъес къабулхІериркур. Рарскъа сари! белики, илдигъунти дурхІни акІесра бирули биэс! «Илини вайти пикруми сунечирад гъадирхъулри. «Мекъличил се бирусив? ГІяхІлази се бурусив? Уршила гІелабтази сейкІусив?» Илала бекІлизир пикруми лямцІла къялубиван лукъулри. ГІур сецад декІли бирар биалра, илини балулри, гужли рурси шери редес бетхІерни. ХІяжини сунела гІямрулизир дахъал секІал чедаибтири, амма рурсбала бисалигъуна асар иличи селилра барибси ахІенри.

– Гъанна нуни Мустапа илдачи хъули урхъис ва мекъ бетхІерар или бурхъис. Амма хІу марисуд, дила рурси, дила исбагъи...

ПатІиматла узи Мустапа уршила бегІтаци хІякъяс или кайзур.

– Илдази нуни се буриша? ПатІимат, сен хІуни нушала хъалибарг цахбирулри? – гІясили иб илини рузизи.

Саби жаланази бархилри. ГІядат хІясибли, рурсилис хибти масли бицІибси къаниличил гелешмешла гІелабти азбарлизи бухІнабулхъулри. ПатІимат харчризур ва юртглизисси бегІлара гІямзилабси хъули дигІянрикиб. Сунес гІеларад унзара чІумали гІекІиб. РиштІаси Лейлани ил лерси хъа унзализи къутІдяхибхІели, ПатІиматлис кІел сягІяталра шалгІердухъи дургар или гъанбикиб.

– Абхъа унза, ПатІимат, илди арбъкъи саби!

\* \* \*

ГІяхІцад замана шалгІеббухъун. Шилизис Мурадлара ПатІиматлара мекълис бетаурсиличила халкълизирти гъай-мез дебкІиб. Амма бетаурсила асарлиурси ПатІимат урузкІули лералри.

– СецадхІи хъулир дебариубли рууда, хІуни хІу туснакърарили? – рургъулри илис рузи Нина. – Раши къакъализи, майдайчир жагати вавни дакІили сари, илабси гъава бизиси саби. раши, дурадулхъехІену!

ПатІиматли рурсили бихуси кІаз чебуциб – иличир дирбубти жагати някъишра лерри. Жагаси хІева чегъур ва рузичил рарх майдайчи дурарухъун. Ванаси берхІилизибад ва вавнала тІеманазибад илала бекІ жургъбикІескабиб. Хапли илала гъалав сегъуна-сайрил гІулухъа вагъариуб. Илалара ПатІиматлара хъуцІруми ца итилличи къячдикиб, ва рурсили гІимрукІили иличи хІулби ахъдуциб илала гъалав, сунечи хІерикІули, мурул адам тІашлири. Илала хІерлизирад ПатІимат урухриуб, амма илизисси гІими кІунбацІиб.

– Ит чи сайри?

– Ит ГІябдулла сай – цІакъси ва серхурси жагъил адам сай. Амма ил дебали мискин сай. ЦІикурлис маслис кадихъес илала мургъи агара. Илди дучесра вирули ахІен, – иб юлдаш рурсбани.

ПатІимат хъулир русес карихъунхІели, илала сипат гІурра хІулбала гъала лагбизур.

– ГІябдулла, – гІяшли иб рурсили. – Секъяйдали жагаси у сабил, сегъунти жагати хІулби сарил...

Савли къацІли руки гІергъи, ПатІимат нешличи гъамриуб, илала някъби байдариб ва багълали илизи хъарбаиб:

– Неш, се сарив дигай? Илди сегъунти дирутив?

– ХІу чичи-биалра дигай дихъес ралкъаурли хІерииши? – тамашариубли хъараиб нешли.

– АхІенра, се рикІулри гъари хІу? Наб тамашабизурхІели, хъарбуси саби.

– Рурси, хІу хІерриси хІела дудеш набчи секъяйда хІерикІулил – хІера илхІели балад хІуни се сартил дигай, – гІяшли иб нешли.

Рурсилара нешлара ургаб илгъуна ихтилат бетаурхІейчибад баз бикилри, амма ПатІиматли гъар бархІи бархІехъ сунела улкъайлиув ГІябдулла чейулри.

Гъачамра рузби гІяхІли къабулбируси хъулирад дашути тІама-гъамали чебаргъахъиб. Илди лехІихъескабииб. Илдани багъур, хъули чи-саял чус тyaniшли ахІенси мурал адам вакІилри. Ил ГІябдуллала дудешла узи уилри. Ил рурсбала дудешличил гъайикІулри, ил сунела узила уршилис ПатІимат шери редахъес дигули вакІибси уилри.

ПатІиматла уркІи разибиуб, ил разибиубли пІякъбиркур или урухІулри. Илис гъайбикІутала гъала дураурхъес булан хІяздулхъулри. Илцадра разили сарри ил ГІябдуллас рукъес.

– Ну къабулли сарра, къабуллира! – ахъли эс дигулри ПатІиматлис. Амма ил лехІли сарри, дудеш сари лерси хъули ацІайчи хІерли сарри, илини се бурул.

Дудеш вачавархилри, иличи ухІнавхъунхІели:

– ПатІимат, хІуни Маммаев ГІябдулла валаду? Илала адала узи леври ишбархІи набчи хІу ураркъес вакІили, – хъарикІулри ил.

– Валас, валра хІелас, – жаваб бедиб ПатІиматли, амма хІуни ну къабулли сари или бура, дудеш.

Рузби гъаргти мухІлубира сабира тІашкабизурлири. ГІур илдани барх хъарбаиб:

– Ил ит нушала улкъайла удив вируси жагъил хІейэс?

ПатІимат гъарли-марли талихІчерли сарри! Илини ГІябдулла улкъайлиув чейусири, амма иличи хІерризурси гъачамцун сарри. ИлхІелира ит майдайчив бегІ гъалав чеибхІеливан сунечи хІерикІуси. ИтхІели багъур илини дигай сегъунти дирутил...

БархІехъ ПатІиматличи ил мубаракрарес рурсби бакІиб. Илдачил Зайнабра лерри. Дудешлис гъаланачи ил хъули арацІахъес дигули ахІенри, амма ГІур жагъил рурси гъимрукІахъес ГІелумизур ва селра хІеиб. Рурсбани ураркъиб-сила тІулека хІербирулри.

– Секъяйдали жагаси сабил! – яргали тамашабирулри илди. ЧІянкІли Зайнабли иб:

– Ил асес багъандан илини бегІлара гІергъити арц булан дедиб ургар. Ну-никІун балуси саби, рурсилис хес илала мургъи агарли диъниличила.

Илди гъай ПатІиматла нешла рузбанира аргъиб ва гІяшли саби-ургаб шутІурбикІескабииб.

– Сен агартив илала мургъи? Ил илцадра мискин саю гъатИ? Чис шери аркъулри хІу, ПатІимат?!

– Илди дугІла гъай сари, – къяркъли жаваб бедиб ПатІиматли. – Чебиидая хІушани, илини наб сегъуна мас лебхул!

Сеңрил ца бархІи бархІехъ рузби Нинани ва Марьянни ПатІиматли дудеш сунечил хъули айцІахъули чеиб. Илини ГІур унзара духІнарад къяпІдариб,

«Се дигЯндешуни сарира илдала?» – дурабикиб рузи Нинала, амма селра имцІаси барес ралхІеризур.

БархІехъ ГЯбдулла вакІиб. ПатІиматли суненицун ил гъунивватес къасбариб.

Мекъла бархІи сабаиб. Лебилра разили сабри, тІама-гъамали биркъулри. ГЯхІлира бакІиб. Балликъяна рурсби музабухъун. Дамла ва дядла тІамри зайдухъун. Цикурлис мас хили гелешмешла гІелабтира бакІиб. ГЯдат хІясибли, хъули биринжли бицІибси халаси шанг бухІнасиб. Илаб дигЯнбарили биэс гІягІнисири мургъи дигЯндарисби бергарагра. Цикурла гІелабтази ил бергараг чебаахъес уршила гъамси мурул адамли цалабикибтала гъалаб гъаргбарес гІягІнисири.

Адавзи ГЯли цалабикибтани алавуцилри. Илаб ПатІиматла нешла рузбира лебри. Цалабикибтала ургар Зайнабра лерри. Ил хІядурриублири цикурлис хибти чедаибхІели дукарряхІес. ХІера, мурул адамли шанглизирти биринжлизибад мургъи дергурси халаси бергараг дурасиб. Илизир лерти мургъила матяхІ цалабикибтази чедаахъиб. Илди дурхъати мургъи-арцлизирад дарибти гІянтІикІа матяхІ сарри. Якъутуначилра изумрудуначилра жагадарилри кулухмира тІулукІмира, цархІилти ваяхІра. Нина тамашариубли сунела дудешичи хІерризур: чедиахъути мургъи-арцла ваяхІкІун дудешли дурала улкнази дурадеркІибти архІябачирад хибти сарри! Дудеш мякълав паргъатли тІашизурлири. Нинани аргъиб, илди даг гъуниввалтухІели ГЯбдуллази ПатІиматли дедили риъни...

\* \* \*

ХІушази нуни бурибси хабарлизиб селра имцІабарисби агара. ЧІянкІли гъанна мицІирли агарти дила пергер тухумтас ну баркалара рикІулра...

Ардякъун гІурра гІяхІцад дусми, ГЯбдуллара ПатІиматра барх хІербирулри. Илдас шел урши-рурси акІуб. Илдала дурхІначирад акІубти нушара лерра вецІнушура. Дургъбала дусмазив хала дудеш ГЯбдулла Каспийсклизисби оборонала заводлизив узусири. Илис «Бузерила асилдешла» орен булан бедисири. Гъанбиркур, хала неш ПатІиматлира бурусири: «Орден набра гес гІягІнисири, сенкІун ГЯбдуллала мазутли дясунти палтар мурталра ицуси ва умудируси ну саррину».

Ит Мурадлира сунела замана мекъ бариб. Амма ил Зайнабличи аХІенри хъайчикайибси. Илис къалли дигусири Мурадлис шери рукъес. Мурадла ца рурсицун сарри акІубси, хІулби биалли илала шинкъяван цІударابي сарри.





**Г. Г. КУРБАНОВА**

### **ДУДЕШ, ХІЕД НУ ХІЕЙГАХЪУЛРАВ?**

*(Хабар)*

Зайнаб, чили-биалра гьиррарибхІеливан, гьала ритІакІиб, разили хьатрикІесрииб: дудеш улхъулри. ВахъхІи чехІеибси, муэртазир сунес дахъал савгъатуни дихуси, итцада чез сари хьулрикІуси дудеш...

Рурсила харидешла ахир аги: ахъ-ахъси, дягІути хьуцІрумар, белсунси цІудара къамала вегІ дудеш дурабад бакІибти-ургав бегІлара жагасири. Ил чисрил пиширхъулри, алавтази гІяхІил хьатбикІахъес буйрухъикІулри.

Дудешла жагати делхъличи Зайнаб хІясратриублири. Иличи дуцІрухъес, илала хъяб-алав някъби делсахъес рурсила хІяздулхъулри. Мьвализив улхъуси дудешлизи сари чераахъес дигусиван, рурси гьаларяхІ ритІикІулри. Сенрил сунела шайчивяхІ дудеш хІерхІелзухІели, рурси къакъарикІулри.

Сунечи гІяжаибли хІербилзути унрубани урузриахъубли, ил уди къяшмау хІеррикІескарииб. Сунела хІяйранти пикрумазирси рурси делхъла агурби тІашдизниличи шаkra хІерикиб: ил хьатрикІули лералри. Булхъути биалли, агурби дяхъибтас икрамра барили, гьарахъбиркулри.

– «Дудеш, хІу чина аркъулри? ТІашизи ну ракІайчи!» – къакъабакІиб рурсила уркІи. Амма дудешлис гІергъи дуцІрухъес рурси хІериуб, мурул адамтачи гьамируси илизи жиэсра урузриуб. «Дудешли ну чехІераира. Черасри, илини ну гьалар къяйда кІапІрурцира. Ге, ну илини чехІераира. Рахли чераибси риасри, ил сай-саял гьамири...»

Рурси гІурра мьвала дайла ритІакІиб. Мурул адамтала къушум-ургав чехІейухІели, ил дудешлигІир умцІесрииб.

Хапли чинавадрил вагъариубси хьярчили Зайнаб уркІрухъахъун: гавлагла тІярхъубазирад хьярчила хІулби гІясили хІердикІулри, удибси гьярбиклизибад илала бухъяна лезми гьаббакІилри, гавлагличи дирбубти варгъила мукукури гьар шайчи лапІдикІулри, хьярчила някъбазир низбала къадуби сари. ХьатхІейкІуси адамла, делхъла мьва бульусила дяхІличи, някъбачи хьярчили низби суркдирулри, цацабехІтас, шьавхъдикІахъули, илди дирхъулри. Амма хьярчичи сенрил чилра гьимуркІули ахІенри. Иличил уюнта биркъули, лебилра дукаркІулри.



Хъярчи гъамирули чеибхІели, Зайнаб дягІли гъабяхъибси кІапІиван ребшиб, чидирил рухънала дукла пяхърикиб. Рурси чабалиурад дигІяй хІеррикІесрииб: хъярчи гІелавяхІ чариубли, къулдумегІикІулри. Зайнаб паргъатриуб, аризур. Хъярчичи тахъли хІерра рилзули, ил дудешлигІир умцІесрииб. Рурсила дудеш биалли селичиларил разили мякълабтачил ихтилатикІулри.

Делхъла агурби сагадиуб. Булхъути барсбикІесбииб. Мекъла бегІтала хъулирад далайла тІама-гъама чедихесдииб. Азбарлабти цалис ца пишбирхъули, дукаркІесбииб.

«Сен ну халаси ахІенрара? – хІяйранни алав хІерризур Зайнаб. – Халаси риаслири, гъанна ну делхъла мурчІличил дудешличичи гъамрираси. Набчи, сунела халакараибси рурсиличи, ил тамашаири. РиштІахІеливан сунела халаси хъатлизи дила биштІаси бачІи кабирхъахъи, «Хашкелди!» ири, – къакъабакІилри рурсила уркІи. – Мекъличиб биалли халатицун саби булхъути. Дила дудеш чини-биалра делхълизи живаралри...»

Зайнабла уркІила жи аргъибсиван, унра исбагъини илала дудеш гІурра мявалези живариб. Идрис улхъхІелхъули, лебилра сунези тиладибикІахъули, гІелавяхІ витІикІулри, чина-биалра гъалаксиван, арукъес вализурлири. Зайнаб дудеш архІявкъяхъес дигули, битІакІибси гиван дямризурлири, гъалаксаурлири.

Ахирра Идрис делхълизи дуравхъун. Зайнаб хІулрукІиб ва хъатрикІескарииб. Булхъутачи хІясратси ил, хъярчначилара хъумартурли, гъала ритІакІиб.

Рурсилис гъачам дудешла хІулби сунечи хІердизуртиван бизур. Улхъуси илала някъби гІяжаибли гІяшкадиуб, ил тІашванизур.

«Чераира! Дудешли ну чераира! – харириуб рурси. – Дудеш, набригу хІу пишяхъибси? Набри къалли, дудеш? – гъалакли тимхъбикІесбииб рурсила уркІи. – Гъанна хІу набчи гъамирудгу, дудеш...»

Амма Идрис сенрил ласяхъиб, сунечил рулхъусилис баркаллара или, мявалезивад дуравхъун.

– Вамсурра. УркІира тамашали изусигъуна саби. Наб къадин ишди дила лачинти булхъанну, хІуни набчи гІяйибмабирид... – жагали бегІбарибти биштІати чебиахъули, Идрисли бекІ гъакІбариб.

Унра исбагъини биштІати абизахъур, гумлачи гугрииб, сари илдас хъатрикІесрииб. НикІаби делхълизи кабухъун, хъяшни саби-ургаб абзбикиб.

– ХІера гъари ца! Идрисли сунела Гъарунра Гъуризатра сен-сен делхъличичи бурсибарилил! ХІуша даргмадерд! Дахъ жагати делхъгу ишдала, – гъинчІ-билзулри алав чукурбикибти адамти.

Зайнабла къаркъала зимбярГІиб: «Идрисли... Гъарунра Гъуризатра... хІебиалли итди дудешла дурхІнив? Ну чила сарра гъатІи? ИдрискІун дила дудешлис бикІуси саби. Ит улхъусира дила дудеш сайри. ИлиникІун ну чераира. Сен илини ну кІапІхІеруцира? Сен!?» – кІантІиракІиб рурси.

– Дудеш! – сенрил Зайнабла гъигъ барцбикиб. Ил симкърикІули, хъулиряхІ ребшиб.

Идрис тярхІухъун. Се-биалра игусиличи, хІеркІли архусиличи гъалаксиван хъярхъли гъарахърикуси рурсилис гІергъи хІяйранни хІеризур.

Биса дарцдиркули, явлухъла дубли нургъби ушкули, Зайнаб хъули чарриуб. Жузазир саремцІурли халтІрикІесрииб. «Артиллеристла урши» бикІуси жузлизибад дудешла сурат дурасиб, хІеррикІесрииб: «Ишар дудешла супелти агара. Рахли «Гъаруннара Гъуризатлара» виэс ит дудеш, дила хІейэс?...

Сай! Сай! Ит дила сай дудеш! «Мекъличи вакІили хІела дудеш тев» бикІулригу нушала унруби... Чилилра чехІеахъаллира, дила дудеш нуни вагъурра. Гъанна супелти тер диалра, ит мекъличивси дила дудеш сай! Дудеш виалли, сен гъатІи набчи хъябруцІейкиба? ХІейгулрав ну илис? Рахли ну илини хІерагъурли рииша? ХІерагъуррара? Юх, ну илис хІейгахъулра. Ге. Сен хІейгахъулрав, дудеш, ну хІед? – суратлизивси дудешла хІулбази хІерризур рурси. – Нешра хІед дигуси ахІенри. КепиубхІели, хІу илис пяхъикІусри».

Зайнаблис дудешла суратлизирти жагати дяхІ пишдирхъутиван бизур: «ХІу пиширхъулри. Биалра хІу вайсири, дудеш. Сен хІуни итхІели нешла хъуцІарличиб графин бячунри? Нешла гъаннара хІяна лебал... Дудеш, сен хІуни узи вебІахъири? Неш мурталра рикІар: «Дила канилизи ил ванцІхІевхъунси виалри, урши мицІирли кавли. Агъ, душман, душман!» Ге, неш хІед или рикІар».

Зайнаблис суратлизивси дудешла дяхІ дамкъуртиван бизур, илис дудешла тІамаара гъанаур: «Ил бугътан саби, вари хІу рирхмаруд». Рурсила дяхІ дамкъур, илини, суратличи гІяхІил хІерризахъес диргалладулхъути, нургъби душкуб: «Ил къяна сабив, дудеш? ХІебІахъиригу хІуни узи...»

Суратлизивад къабулиркусиван дудеш хІеризур.

«Нешли альбомлизирад хІела лерил суратуни урасиб, цІали дигуб. Иш сурат нуни дигІянбарира. Чебаалли, нешли ишра цІали игу».

Рурсилис дудеш пишяхъибсиван бизур: «ХІу гІяхІси рурсири». Зайнаблис гъайла тІама гъанаур. Илини хъярхъли жузи-урга сурат дигІянбариб. ЛехІризур: къакъакад аркъутала гъайла тІамри деткахъиб.

Рурсили гІурра дудешла сурат бакІахъиб: «Нешлис ванцІухъни гІядаббилзули, хІуни вебІес къасбарибсиригу, дудеш, гъанбиркуру?» – нешличил рахъеслилизирад чаррухъунси бархІи гъанбикили, рурсила къаркъала гІяжаибли бяргІиб. Ит бархІи – Зайнабла уркІи кахъиахъубси, сари чІяррикІесаибси, муэрлизибван гъанаруси бархІи гъанбикиб. ЦІубкавхъунси, хъяб някълизивад хІили вашуси дудеш дивайчи чІикъитІири. Урунжлизирадван чяхІдикІути хІили дива гъалаб шара бетаахъурлири.

«Неш итхІели къагъсаурли, бируси хъумартурли, дай хъулир жургърикІусири. ГІур някълиу бикибси полотенце дяхъиличи гІинибирули, жулгъала гІяндличил дудешла някълизирад дашути хІи тІашаибсири, къисдарибти хІила туми дигъунтири.

Дудеш, хІела някълизиб хІяна лебалу? – рурси суратличи сагали хІерризур. Илис дудешла хІулби кІи-кІел шалати дамкъаличил лямцІдухъунтиван бизур. – Нуша, дудеш, хІечирад ардякъи гІергъи, урхІла хъулир хІердирули калунра. Хъа регІ сунела дурхІнала начурби дигІунри или наб рургъи. Нуни илди кахІесира, дудеш. Амма хъа регІла дурхІни наб мурталра хъулки бикІи. ХІуни, дудеш, илдас мурт-биалра чеббицІа?

Дудеш, ну хІед дигусиригу. АхІенрив гъатІи? ХІуни, хІянчиличивад чарухъунхІели, ну ахъруцили бурхани ариахъусири. Гъанбиркуру? – рурсила хІулбала хІер гІурра бумкъесбиб, сари-сарил гердикІути нургъби ляжубачи дуцІаригесдиб. – Гъанна ну хІед дигули ахІенра. ХІуни Гъарунра Гъуризатра делхълизи жибарахъири. Набчи гъамра хІейубри. ХІу вайсири! Вайсири! Вайсири! – гъярбариб Зайнабли сурат. ГІур уркІкарухъун: «Иш ахІи сурат агарагу дудешла... се баррав нуни?» – Зайнабли симкъ-симкърухъи, нургъби душкиб. КлейлигІир умцІеррухъун.

---

**ПагИмат  
МЯХИЯММАДОВА**



## **ДУКИКЪЯНА**

### *Хабар*

Дарсличи кайили, улкълайлавад дура хЪерикЪули левли, дила пикруми гъарахъли детаиб. Историяла учительница, Маржанат ГЪялиевна дила гъала тЪашризурли, набчи дугъаризурлири:

– Гъари ГЪябдулла, ишбархЪила дарс селичила сабри нушала? Бура!

ИлхЪелири ну дила пикрумазивад чеваргъили класслав вагъариубси.

Маржанат ГЪялиевна дебали гЪяхЪси, малхЪямси учительница сарри.

Дарс селичиларил гъанбикахъес дигули хъалли, бурес хЪейубра.

ГЪуррара серил хъарбаили, тамай чеваргъахъира ну ГЪялиевнани.

– ЖагЪял дудеш школализи вакЪахъа! – буриб учительницани ва дарс даимбариб. Набзи биалли гЪур секЪал хъархЪебаиб, амма нуни калунси дарсра хЪебакъира. «Се или школализи вакЪахъес буреси дудешлизи?» – пикрумазиври ну.

Унзала гЪелав тЪашизурси наб, учительницалара дудешлара гЪергъиси ихтилатла иргъулири

– СайкЪун дебали балуси урши сай, амма гЪергъиси баз селичила пикри-икЪусил, секЪал иргъули ахЪен. ХЪушала ца базла бухЪнаб селра бетаурси анЪбукъ биубу? – хъаррикЪулири учительница дудешлизи.

– Баз гъалаб ца анЪбукъ бетаурсири. Дила узи ГЪяппасли сунечил варх, кумеклис дуки укибсири... Дудешли хабар даимбариб.

Дила биалли хЪулби нургъба дицЪиб, гЪур цалра гъай хЪебакъира.

\* \* \*

Школалар каникулти садаибхЪели, нуша дебали разили гъунидаира. Ду-цЪрум шилизиб дебали жагаси тЪабигЪят бирар. Шиниша дунъя, умуси гъава, ахъти вацЪурба кадуцибти дубурти, дяргЪиб шинна гЪинзурби, илгъуна жагадешличи нушала шилизиб къаршибикибти адамти ГЪяшикъбирули бирар.

Илгъуна жагадеш чебаэс нушачи шадиб бакЪиб шагъарлизибад дудешла рузи ва илала кЪел урши. Илдачил варх шадив вашира, тапла хЪяз бирули,

шилизирад, дубуртачирад къунздикІули, бархІехъ хІенкълизирад чардухъ-унти къял-къача хъули кес дашули замана буркІира. «ХІябилра гІяхІси замана лебри итхІели...»

Август ахирличи биркулри Дудешла рузи ХІяпсат нушаб мурбала ва хъ-умала хІянчилисра кумекбарили, дурхІни школализи букъес замана сабаайчи, хІядурбиахъес ца жумягІла гъалаб арбукиб.

Наб дебали анцІбулкълри, илди арбукибхІели.

Шилизир дугурби дугІярдиуб. Ца дуги нушачи дудешла узи ГІяппас вакІиб. Ну телевизорличи хІерикІули, мурт арякъунал хІисабра хІебарира

– ГІябдулла, жагІял жявли айзес чебиркур, дила урши! ГІяппас цунни хІейахъес, чумал дугилис, иличил варх дубуртази дуки укъес чебиркур, – иб дудешли.

Шилизирад гъарахъдикІулри нуша. ГІяппасли тупанг касили, нуни къакълличи хунжира гІелахъили, лагбяхІ ихъули дашулри. Дудешла узини лерилра мер-муса чедиахълри, хабурти дурулири. Илала хабуртачи наб мурталра лехІихъес дигусири.

– Вамсуррив, ГІябдулла? – иб ГІяппасли ва хъуцІарличибси тупангра кабихъили кайиб.

– Кайи, дила урши, кайи! Бамсриахъа!

Нуша кадибси музаличибад ши хъатван биштІали чебиулри.

– ГІяппас, хІукІун чуйнара вашули уири дуки, цагъачамалра бецІ къаршибикибу? – хъарбаира нуни.

– Вагъ! ГІябдулла! ХІябилра чедаира! Цацунара ахІи. Гъачам тупанглизибад игъубли кабикахъира.

– Илала рахли диштІати дурги къали, ГІяппас? – сабурхІебарили хъарбаира нуни.

– Нуни ил кабушибси хІейасри, лерил маза палакатдири илини, – иб дудешла узини, гъарахъли чебиуси шиличи хІерикІули.

– Гъа, – маслихІятиубра ну.

Нушала ихтилат бемжурли лебли, хапли ГІяппас лехІкахъиб ва гІелавяхІ къакълличи багълали кайхъун. Наб гъанбикиб ил бамсриахъес кайхъунси сай или. Амма иличи хІеръибхІели, ну шакикира, илис вайтІа кабизниличила. Ил хъанцІкайуб ва хълхълми дурадухъун къакларад.

– ГІяппас! ГІяппас! – чуйнара вявъира нуни. Жаваб аги сегъуналра. Ну дебали урухиубра. Се бирусил балули ахІенри.

Нуни кинолизиб чебаибси тяхІярли, михърличи някъби кадуцили гъаждирули, мухІиличи чейкили, гъава пушбирули уира. Амма илис сегъуналра барсдеш хІебиуб. ВецІал минутцадхІи уира, гІур гъанбикиб, ил вебКили сай или. Ну ахъиубли иличивад, дуцІли катхІел ватихъира. Дила уркІила тимхъла тІамали, гъатІи секІал бикъули ахІенри. Висусил, дуцІикІусил, се бирусил балули ахІенри. Наб илала хабурти ва насихІятуни гъандикили, хІулбазирад нургъби дашулри. Шилизи кайухІели, нургъбира душкили, пикриухъунра: «Чичи аркъуси? Чизи буруси?»- илди пикрумазив левли гумаила тІашизурси дудеш чейира.

– Дудеш! Дудеш! Гяппаслис вайтѧ кабизурли дубуртазив кѧев, хъанцѧкай-убли сай, урѧѧила тѧамара аги, – ира нуни, хѧилхѧи биса дурцули.

– Се бетаура? Кайкибу? Сен илис вайтѧа кабизурсив? – хъарбикѧулри цархѧилтира.

Нушала хъулрира, дудешла узила хъулрира мякълар сари. Хъули кайуси замана, ну дурабси къаркъаличи кайили, висивиира.

Бучили цархѧилти мурул адамтира, дудеш дуцѧли, Гяппас левси мерла арякъун. Шилизиб калунти биалли бурили хъунул адамтазира, мурѧа барес хъа гъала тѧашбизур.

Ну висули, пикрумазив сецадхѧи кайили уирал хѧебалас, амма цакамси заманала гѧергъи, мурул адамти бакѧиб. Къакъакад лябкъулри. Дила вархиб-дешли, нуни илдала ургав лявкъуси Гяппас чехѧеира.

– Гябдулла! Ва дила урши! Хѧера! Иш ну, вакѧилра! – иб малхѧямли Гяппасли.

Балли кабизурти адамтани биса тѧашаили, аѧкабяхъиб. Ну биалли, лебил дунѧя наб гибхѧеливан разивиубра ва дуцѧли Гяппас кѧапѧуцира.

Чили вявъили бакѧибал, тухтурти дакѧубиуб. Илдани ил ахтардивариб.

– Хѧела игъбар саби, Гяппас, хѧуни их урши варх укни! Иш уршили дарибти урѧѧила массажли, хѧу итил дунѧяличивад чарварилри, – иб тухтурли.

Гяппас больницализи арукиб. Ил анцѧбукълис гѧергъи, шилизибти адамти декѧарли хѧербикѧутири.

– Хѧу нушала игит сайри! – бикѧутири тухумти.

– Мицѧирси бецѧра чехѧебаира. Амма дудешла узи арали-гѧяхѧил чарухъни биур, – набзибра ари агарли гъайикѧули, директорла кабинетла гѧелав виѧ-ниличи гѧур шакикира.



## Библиография



**Сягидат ГЯБДУЛЛАБЕКОВА,**  
филологияла гилмуртала кандидат

### «МУСАХЪАЙ» ХАБАР

Сагид Нухкадиевич Гябдуллаев машгурси гялим, поэт ва прозаик сай. Дарган мезла учебникунала ва хрестоматиябала автор сайлинра даргантала рухла давлализи халаси пай кабахъиб илини. «Нешла цум-цумъала» назму ва «Фронтвикла далай» поэма авторла черикла произведениебазирад сари.

Ишбархи Сагид Гябдуллаев школала бучантас тяништи сай даргала литературный мезлис хулчи кабахъибси гялим сайлин. Илала хабурти «Канилис дарман», «Гъзи секъяйда учиб?»), «Гялисултгай секъяйда чебла сасиба?» дурхнас тяништи сари.

Автор жаглихелил литературализив узес веихъибсири. Сунела лерилра къайгъни Совет хукумат чедикибмад сагаси ибси гапбирули, гямру делшес диргалабулхуси мискъиладибирули узиб. Сагаси дунъяла политикала тлабуни хясибли динна адамти Совет хукуматла гямру делшахъес диргалабулхутили уббухун, ва Сагидра, ит заманала цархилти лукланти къайдали, динна агълуличи къаршити произведениеби луклес веихъиб. «Дарган» газетализир илала аргъаибти произведениеби дурадулхъесдиб. Хера, ил газетализибад бехибхъиб Сагидла литературализи гъунира.

Гядатлибули, авторла сатирала произведениеби ил газетала бяхяназир дурадулхъунти. Гъайгъай, ишаб бурес вирар Сагид Гябдуллаев Гязиз Иминагаевличил варх даргала литературализив сатиралис хулчи кабахъибтазивад ца сай или.

«Маллубала шикаят» (1925 д.), «Супила дард» (1927 д.), «Вякълякъи, киш» (1929 д.), «Аманту» (1930 д.) учаннис тяништи сатирала произведениеби сари. Сагидла дудеш динна халаси гялим вирусире, амма автор Совет хукуматла сагадешуни гердурцули луклусире. Илди сатирала назмурта хукуматла бетуц белгибирули саби. Динчибала макру, диру-далцути, халкъ чеббаллахъес авара далтули сай.

Халаси мер бурцули саби авторла творчестволизиб дургъбала темали. Гъаланачи авторли граждан дургъбачила луклули сай, гур биалли Чебахъиси Вагъа дергъла тяхяр-къяйда сипатдирули сай. Сагид – фронтвик сайри. Дергъла янсава-хярхя, гаши ва лерилра къяндешуни чекасибси адам сайри, биалра илар чедаибгачила авторли жагали бурули сай «Фронтвикла далай» поэмализиб, «Вагъан багъандан» повестьлизиб.

Сагид Гябдуллаева «Мусахъай» биклуси хабар дургъбала дусмачила делкунти гяхитигъунти хабуртазибад ца саби. Илизиб камти гямрула дурхна дургъбала замана дакударибти халати гъабзадешличила бурули саби. «Мусахъай» хабар «Вагъан багъандан» повестьлизибад ца бутла саби. Авторли ил произведениелизиб Гитлерла Германияличибад чедибдеш сархнилизи никла партизанти кабахъибси пайличила бурули сай.

Хабарла бекI герой Мусахъай бикIуси урши сай. Хабарлизиб I942 ибил дусла гIебшни сипатдарили сари. Илала нешра дудешра душманта кабушибтири, Мусахъайли советский бургъантас кумекбинули, челис-че душмайчи гъимили вирцIули, душмантас заралбарес се-дигара барес хIядурли сай. КIинайс никIа партизан «Гъабзадешла багъандан» медальличил шабагъатлавирули сай. Мусахъай кIиэсил орден сархес хъуликIули сай. Илис дигули сай сунечила Сталиннизи багъахъурли, илкъяйда белкIи дигули сай. Сен-сен илцад гъими акIубсира виштIал партизайзиб. Илис сабаб – неш-дудеш цIудара душмай кабушни. Мусахъай гIяхIцад гъабзадеш чедаахъили гIергъи, дергъла майдайчив гъабзала бекIали улхан. НикIа игитлис къадархIебиуб севан Советский гIяскарли душман къирварибал ва Чедибдеш сархибал чебаэс. Биалра Мусахъайли илизи халаси пай кабихъиб.

Хабар белши саби командир ГIялиевли бедибси хъарбаркъ таманбирниличиб. Шагъар душманта буцили саби, Мусахъайлис биалли командирли белкIунси кагъар шагъарлизибси советский бургъантас баахъес хIяжатли саби. Произведениелизир кадиркути лерилра анцIубкуьни командирла кагъар бухес вализурси Мусахъайличил дархдаси сари. Духуси ва гIяхIгъабза никIа партизан гIямру далуси халасиван вшикIули сай. Сунечи дакIибти къиян-жапали Мусахъайлизи чIумати гIямрула дебш касахъиб. Жура-журала аги-къяйдализив ил халасиван пикриикIули сай. Илис кумекбареси мякълав чилра агара.

Сагид ГIябдуллаевли никIа патизайс хъарбаркъ бедлугхIели биубси ихтилат саркъахъили сипатбарили саби. ГIялиевли Мусахъай хъарбаркъ таманбарес бажардииркниличилара балули сай. НикIа партизан илини махирули сай.

– Кагъар бухес вируду? – хъарбиули сай командирли.

– Сен хIейрусира? Гъанна гъала-гъала архули хIейишагу. Илдигъунти хъарбаркъуни нуни гъаларра тамандарибти сари.

Мусахъайли никIа виалра, халасилира таманбарес хIейэси чебла чекайсули сай. Гъарли-марли халаси гъунарла баркъуди саби илини бируси. Чумилра масъала акIуб илис ванзала духIнарти турбуникад нушала бургъантаси кагъар бухили аркъухIели. Командирла хъарбаркъ таманбаресра ункъли бажардииркули сай. Шагъарлизибси командир Кабаханничи ваэс багъандан илис кIел километла бухъяна турбала ухIнавад хъусли укъес чебуркъиб. ЧевулкIнила урехира лебри. Мусахъай тамашали духули пикриикIес балуси адам сай. Ил гIяхIгъабзадешличилра декIарулхъули сай. Турбала ухIнавад аркъухIели, илала бекIлизи дахъал пикруми дакIиб. Авторли дурхIяла тIабигIят ункъли балули сай. Турбала ухIнавад вашес гъамадли ахIенри, дахъал гъалабизуначи вахIягиб илав. Мусахъайлис турбализир чуйнарил сунела неш гъанрикиб, дурхIяла хIулбазирад нургъби булан гердугъун. Турбализиб хIяблабван цIяблири. НикIа партизай кагъар командирличи биахъули сай.

Къадар хIясибли произведение халаси хIебиаллира, илала темара, масъалара, мягIнара, идеяра лер. Игитли дурути авторли сунела пикрумачил чедирицахъули сай. Произведение илкъяйда белшни, гъайгъайра, авторла пагъмулис бикъридеш дируси лишан саби. Илгъуна тIахIар пайдалабарнили бекI игитла аргъайзиб дунъя гъаргъарахъес имкан лугули саби. Сагид ГIябдуллаевли бекI игит сунени гапирули ахIен, илизирти игитдеш устадешличил чедаахъили сай. Дубурланна хIял-тIабигIятлизирти бекIлидиубти къиликъуни – гъабзадеш ва гапхIейкIни чедиахъули сай.

Произведениела сюжет бархибси ахIен. Хабар убла заманализиб саби буруси. Замана сипатбирнила имкантира авторли сунес бурес дигуси мурад сархнилис устадешличил пайдаладарили сай. Алавчарти гIямрулизир кадиркути анцIубкуьни бекI игитла бухIнадунъяла тIабигIят гъаргъарнилис дузахъули сай.

Произведение таманбирули саби Мусахъай дергъла майдайчив алхниличибли. НикIа игит ца махъла галгала уди хIяриирхъули сай ва илала хIурматлис авал залп иргъули сари. Мусахъайлара ГIялиевлара сипатуни советский бургъантала хIял-тIабигIят чедиахъути суратуни дархдяхъибтиван гили сари.

Дергълизиб алхунти бекIаагартти саби, ил бучIантани хъумхIерту. ХIера илизиб саби произведениела тIягIямра.

## Фольклор



Къади  
ГЯЛИСУЛТАНОВ

### ХАЛКЪЛА ДАЛУЙТИ

*ЖявхІейчибад бехІбихъили, шибархІиличи бикайчи фольклорла произведениебани Дагъиста литературализиб хасси мер бурули саби. Илдала хълчиличир сари акІубтири декІар-декІарти поэзияла ва прозала жураби, даргала цархІилти шималаван, Цугнила шилара дебали давлачебси фольклор лебси саби. Илис бикъридеши дирули сари, гъарил дула манзилличи хаста далуйтани, чІиллуйтани, гардла далуйтани ва дахъал цархІилтани. Хушаб гъаладихъес дигулра Цугнила шилизир хІерриуси МяхІяммадова Майсаратли дурули делкІунти хІякубти.*

\* \* \*

ХІеб дакІиб, вавни дакІиб,  
ХІу чинаррив, жан юлдаш?  
ХІерургуд ванзаличир,  
Рургудра хІу зубрачир.

Наб салам кадухибтас  
Ардухая дилара,  
Урхъу дублар бялихъван  
Язихъли херри или.

\* \* \*

Диркъаличир улелъа,  
Хъуммартаба, жан юлдаш,  
ХІу нунира хІертури –  
Къарлизир жанай вава.

Саламтачи чихълира,  
ХІечивад гъарахълира,  
ЦахІнар деркІибти гІямру  
Мурталра гъандуршулра.

\* \* \*

Арцури аркъул лачин  
Духа дилара хабар,  
ЦиркІли духъун цІуэри, –  
Духа дилара салам.

Эрманила тукейзир  
Мургъи кІерни багъурра,  
Цугнила дай шилизив  
ХІу левни хІебагъурра.

\* \* \*

Губдалунт шадиб башар  
Буйнакъла къадурбази,  
Гъай аман нура ракъес  
Ца хІу левси мерличи.

\* \* \*

Виасри мегъла уста  
Барили нуни умхъу,  
Ибхъаси хІела уркІи,  
Дигай лерал хІеризес.



\* \* \*

Урхуличиб дягІ саби,  
Гами бургъули саби,  
Рургъесвара хІела неш,  
БақІалли дила кагъар?

\* \* \*

Дила дигай мас ахІен,  
ХІу вачурта риркъахъес,  
Я дигай вавни ахІен,  
Гъар даим гъала дурцес.

\* \* \*

Вай дила иганайли  
Дигай ахъили вара,  
Хъябуртачиб бецІливан  
БекІ гІяшбуцилигу.

\* \* \*

Галгаличир къябкъури  
Ца-цали тІутІудиаб,  
Дунъя дицІиб шалал бац  
Дилара тІутІулину.

\* \* \*

Далай севан рикІиша  
УркІи къакъали биалли,  
Уркилис къабул гъалмагъ  
Дила гъарахълихІели.

\* \* \*

Гъуни гъарахъли или  
Вари ну хъуммартаба,  
Кагъар хІеделқІадлира,  
УркІила вакІахъаба.

\* \* \*

Арц дахъал Узбекистан,  
Дахъ гъарахъ Таджикистан,  
Жагал рурсбала мягІдан  
Ну акІуб Цугнила ши.

\* \* \*

Дарман дила юлдашли  
Юлдаш раргили уру,  
Давла бедаб сунесну  
БерхІи адухъараши.

\* \* \*

УркІи игути цІалис  
Дарман къалли даргиша,  
ХІечи диихъиб дигайлис  
Сабаб севан даргиша?

Гъай аман ахъри диги  
ЧевяхІахъес закличи,  
Закла ахъдешличивад  
Даим хІерикІес хІечи.

\* \* \*

Ишди дигай хІехъили,  
Карерхасли ну хІяри,  
Дикили дигайла цІа  
Игугу хІябри цІали.

\* \* \*

Ишди карцІай хІехъили  
Руцасли ну гІянжили,  
Духъи карцІайла бурям,  
ГъятІаэсгу цІелдуби.

#### ДАЛУЙТИ

ХІунтІен мургъи Москвавлар,  
Пачала арц – Ростовлед,  
Вахъ виккан дила юлдаш –  
СирхІяла дубуртазив.

Шишим-шишим рикІули,  
Шин арули чархра леб,

ХІечила пикрумазир  
ДицІули хамхара леб.

ГІялам шала биркъани  
ВецІну шура шалал бац,  
Ну шалали рихІяни  
Бац хІулбар сирхІян дурхІя.

\* \* \*  
Гялам берхИличиван  
БархИлис хЕчи хЕрли,  
Гулвавначи мирхъиван  
Ху цархИйчи гИярли.

Абали виркъухЕли  
Наб къадарли варкъибил,  
Къадурти дуртГухЕли  
УрхИлис насибвиубил.

\* \* \*  
Дагъистайзиб хала хЕркI  
Амъурти шинна Самур,  
Марли ху чарухъайчи  
Бирусив нуни сабур?

\* \* \*  
Дигай гъарилла дирар,  
Мурадли камли диур,  
Виадли ху гИяхИгъабза,  
ДиэхЕ мурадличи.

\* \* \*  
Даргазир дару лерли,  
Марли раргудахъулрав,  
Дагъистайзив ху левли  
ЦархИйзи рурцахъулрав?

\* \* \*  
ХЕд хИядурдариб дугъби  
Нуни чизи дуриша,

Ху вигул дила уркИ  
Севан паргъатбариша?

\* \* \*  
Алжан дигул чатГалис  
Мадаркъаб алжан къадар,  
Алжанван игул юлдаш  
ХЕваркъибну наб къадар.

\* \* \*  
Диндаличир хИябал ги  
ДучI селис дучIар вара,  
Мурадли хЕбаибти  
Се изай бубкIар вара.

\* \* \*  
Хъярбукила ши духИнар  
Шиниш къарла диркъурби,  
ХЕлра дилра ши-ургар  
Амъур шарабла гИиниз.

\* \* \*  
ГИяручIла муръил гъанкIра,  
Савлила муэртира,  
Дарх дургъути дигайра,  
Нушала гъарахъдешра

\* \* \*  
Муръил бирар авруша,  
ХЕла хЕва шиниша,  
Вигули се вариши  
Леврину вахъ алаша.



## Очерк

Патимат  
ВЯХИДОВА



### ДАГЪРИЛИЗИБ КАВЛАН...

*Дариудеш сархиб нушаб  
Тупчиба, танкистуна,  
Морякуна, саперта  
Ва гЯдатла бургъанта...*

Ардашули сари бурхИни ва дусми, хъумкартурли сари цацадехI анцIбукъуни, амма ЧебяхIси ВагIа дергъла дусмазир нушала халкъли дяхIяурти гIязабти се заманалра хъумхIерту. Нушала халкълис дергъ дебали дурхъали кабизур. ВагIа ва халкъла азаддеш багъандан бургъули, жан кърбандарибти гIяхIгъубзнала халаси хIурмат бирули дирехIе нушани. ИлданикIун нуша багъандан жан кърбандарибтири. Дявила авлахъличиб хIярихIебихъибти сецад калунал! Чарбухъунтира, дяхъурби хIянсадердили, жявли гIямрулизибад арбяхъун...

Къел-хIерзи агарли бетяхъибти сецад лебри! Амма илдас илкьяйда викIес асухIебирар. Поэт Роберт Рождественскийли белкIунсири:

**Лебил гъанбуршехIе уми хIясибли,  
Ил алхунтасван ахIи,  
МицIиртас хIяжатсину...  
Нушала уркIбачил гъанбиркахъехIе.**

Дусличи дус Чедибдеш нушачибад гъарахъбиркули саби, камкабикIули саби ил сархибти игитунира. Илдала асилти баркъудлума чеалкIути наслу-басра гIибратунили калахъес чебиркур.

ЧебяхIси ВагIа дергъличила илцадра дахъал дурили ва делкIи сари, хIятта селра гIелаб калунси хIебургар или гъанбикесли саби, амма ишбархIира, дергъ таманбиубхIейчирад 78 дус дикибхIелира, иличила сагати баянти дагъардирули сари.

ЧебяхIси Чедибдешла хабар бурили таманбирули ахIен.

Дебали дурхъали кабизур нушаб азаддеш, амма ишбархIи хIебла жагаде-

шличи хІердикІухІели, ил батахъес се- дигара барес асубири ибси пикрира алкІули саби.

Нушала биштІаси ДейбукІла шилизибадра даршлим ца гІяхІгъабза дергълизи арбякунтири. Илдазибад 71 чархІебухъун. Илди зубри юргъан дарили, ванзлизиб калун. ЧехІебаиб илдани чула биштІати дурхІни. ЦабехІ нешанала канилаб лебалти, цабехІ – шел-урегал базцун биубти. «Атта» или дугъабизес къадархІебиубти. Дергълизиб алхун хъайчикабиэс, мукъри дарес къадархІебиубтира.

...Даршлим цализибад хІябцІали гІяхІгъабза шилизи чарбухъун. Илдала лебталалра къисмат цагъунари аллира хатІахІеркур. Лебилра илдас хасбирулра иш макъалара. Илдани дахъал-деклар гІямру хІедеркІиб, дявтазир диубти дяхъурбира, чедаибти къиян-жапара къел-хІерзи агарли кахІелун.

ХІябцІайзивад ца – ГІябдуряхІманов ГІябдулкъадир нуни имцІали валусири, ил дила нешла рузи Муъминатла мурул сайри. Иличила имцІали белкІес хъулрухъунра, сенкІун илини (бунагъ хатІа урдуцли) набзи дахъал хабурти дурибтири. Дурсри тамандиубхІели, камси заманалис биалра, илдачи гъаррикІаси, ва халаси иштяхІличил нуша, дила узбикъуртира рузбикъуртира лерилра илала хабуртачи лехІихъули дирехІери. Зизи Муъминатли биалли берклуми дири. Илисра дигахъи сунела мура хабуртачи лехІихъес. Гергъила бархІи биалли, дила ученикунази нунира илди хабурти дураси.

... Мурул-хъунул ГІябдулкъадир ва Муъминат хъаллабиубли бахъхІи биубли ахІенри. ДехІдихъиб балагъла дургъби. Цаибти бурхІназивал ил душмантачил ургъес арбякун. Мирзала рурси ПатІимат ца дусалра риубли ахІенри.

Зизи Муъминатра, сунела зилантиван колхозла хІянчурбачи раши. Хъунул адамтачи лерилра хІянчи хъардикиб. Дугурбазиб биалли чула муйли, узби, уршби ва цархІилти бургъанти мицІирли чарбухъахъес Къудратла вегІлизи булгутири, фронтлизи дархъес балала динди ва някъликунни думхутири. Шилизи чи-биалра алхниличила балахъуси «цІудара хІябмузан» бакІалри, лебилра цалабиркутири ва халаси яс бирусири...

Дургъби тамандиуб, хІябцІали гІяхІгъабза шилизи чарбухъун. Илдала лугІилизив ГІябдулкъадир азира. Чуйнара ил дяхъи-хъаслизи викибсири, дяхъурби сагъдиубхІели, сагадан дергълизи ватиусири. Сецад къиян-жапа чедаибал илини...

ЧебяхІси Чедибдешла бархІи – майла 9 личиб нушани бургъули калунти гІяхІгъубзнази гъанбиркахъули дирехІе. ГІябдулкъадир ащини ва ва цархІилтан дурибти хабурти нушала хІулбала гъалар къалабали дарсдикІули дирар, хІятта кинолизирван сари или гъанбикесли бирар.

ГІябдулкъадир азини бурибси ца анцІбукъличила бурес дигулра:

– ДяхІили кІапІбарибси дубагарси авлахъ сабри, илаб душмайчилси дергъ бетурхулри, – вехІихъиб хабар бурес ил. – Гъужумличи дурадухъири. Камси заманала бухІнаб бахъал кабушибти биуб кІелра шайчибад. Амма нуша чедидикира, мицІирли калунти душманти гъаббухъун, «уррала» тІамаличил нушала бургъанти илдас гергъибухъири. ДекІли вяхъибси ну аргъайзивад ухъунра. Сецад замана арбякунал хІебалас, нуни хІулби абхъибхІели, нушала бяхъибти солдатунас кумекбарес итара-ишара дуцІбикІути санитаркаби гъа-

рахълабван хІисаббарра. Ну къяшлизивадра вяхъилри. Чакма хІили биціили сабри. ЦархІилти дяхъурбира лерри. Нушазибад бахъли ца-кІел гъай сарри урус мезла далути. «Помогите!» или тІамадарира ва гІурра аргъайзивад ухъунра...

– КІинайс чеваргъибхІели, сегъунтилра тІама-гъама дикъули ахІенри. ДяхІила авлахъра цІударбиубсигъунари, илцадра бахъал солдатунни алхири... Илдачи уркІи къакъабакІибси ну цІумухъунра. Дила мякълаб цІумла тІама аргъира. ХІерикІулра, немец. Ил алавси мер лебилра хІили беркилри, дебали декІли вяхъилри. Ил набчи хІерикІулри. Илини набзи сунечи гъами-ахъес лишанбариб, амма ну гъамхІейубра. ГІурра тиладибариб. Се бирусил хІебалули, нуни дяхІи касира ва дяхІ суркдарира. Илини балуй някъ ца бара ахъбуциб ва сунечибад циила тядиси тапанча сунези бедахъес лишанбариб. Ил вяхъесалра вирули ахІенри. Гъайгъай, ну ил секІал барес хъулхІевхъунра. Наб гъанбикиб ну кавшес дигули ургар или.

– Ил виштІаси дурхІяван висивииб, зякибхІ хІеръиб, се сабрил шипІбариб... Дила уркІецІидухъун, душман виаллира. Ну иличи гъамиубра. Мякълаб биштІаси флягара лебри, букІуси кагъарлизи бергурси секІалра. Илини набзи касахъес лишанбариб. Нуни фляга абхъира ва илизи бедира. Ну хупІикахъес лишанбариб, нуни ил секІал хІебарира ва сунези бедира. Бергарагра абхъира, илаб кІантІиси къацІ лебри. КІибайбарили, ца бутІа илис гъабуцира. КъацІра беркун, флягализира хупІикун...

– Се дигара биаб или, нуни тапанчара илизи бедира. Баркалла багъахъесван ил набчи малхІямли хІеризур ва, тапанча сунела лихІишкІайчи чебуцили пІянкъасахъиб...

– Ил сурат чебаибси ну сагадан аргъайзивад ухъунра. Госпитальлизив чевсаргъира. Сен-сен ну варгирал, се бетаурал наб гъанхІебиркур. КІел базра-сера илав кали гІергъи, сагадан дявилизи арякъунра...

ГІябдулкъадир-ази ва Муъминат-рузи гъанна нушала мякълаб агара (чула бунагъ хІатІа урдуцарти). Леб илдала пергер дурхІни: ГІябдуряхІман, ГІяйшат, СагІидат, МухІяммад-Имин ва Зайнаб – дудешра нешраван уркІигъаргти, шантачил балгунти, цархІилтас гІяхІдеш барес гъалакти.

Лебилра илди бузери дигути хІялал-залалти адамти саби.

Нунира илдас духъянти, арати, талихІчерти гІямру дулгулра!

*ДейбукІла шилизивадси поэт РабаданхІяжи Юсуповли бургъантас багъишлабарибси назмура журнал бучІантас гъалабирхъулра.*



РабданхІяжи  
ЮСУПОВ

**ДАРШЛИМ ЦА ГЪАБЗА!**

АрбякъунхІели даршлим  
Ца гъабза шилизибад,  
Ца хІябцІали мицІирли  
Чарбухъун илдазибад.

ВерхІцІанну цара гъабза  
Къяраибгу дургъбани.  
ВерхІцІанну цара гамъа  
ХІянбариб шишимтани.

Агъ, вегІебшла душмандеш  
Агъ, хІушала жяргадеш,  
Шимала шагъуртала  
Цуръадеш, палакатдеш.

Нешана чекасибти  
Агри-гаша, биса-симкъ  
Гъандикалли гъанара  
ДецІ ва анцІкъи диркур ибкъ.

Арбякъунтири даршлим  
Ца гъабза шилизибад,  
Дурхъал ВатІан батахъес  
Дибягъ душмантазибад.

Ит Чедибдешла бархІи  
ДецІ-дукелцІи гъудурси,  
Я гъабза гъабза ахІен  
Ил тарих хъумартурси.



# ТабигІят

БяхІяммад  
ХІЯЖИЕВ



## ХІУНИРА ГАЛГА УБАТИ

ТабигІятли лугуси давла кьиматлабарес хІейэсцад халаси саби. Иличи дигичевси адам сунела хІял-табигІятлизив, хасиятлизив кьяркьсили, виэс хІейрар – левгІев малхІямси вирар.

Гьарил мицІирдешлис: мицІираглис, духълумас, арцантас ургубалис шин – жан сари. Эгер шин агарти диалри, дунъяличир мицІирдешра хІедири.

Нуша лебтанилра балулдра галгуби шинниси ванза заяхебирахъес кьараулти сари. Илдани шин пайдаладирули диалра, дуцІарти бурхІназиб гІянжила кьат бурьахъули ахІен, ванзала кьат дягІлизибад уцахъу. Чула дяхІцилиуб мурталра камхебируси тяхІудешли, гІянжилизиб хІябцдеш камхебирахъу.

ГІялимтани бурули кьяйда, кІапІрани бяхъибси ца галгали ванзалис авал тонна шинна, ца адамлис баари кьадарла кислород лугуси саби. Кислород агарлира мицІирдеш бируси ахІен. Галгуби агардиалли гІинзурбазир шин камдирар.

Галгуби тухтурти сари. Масала, дугІла гІинцла галгала вавни канила излумас, мяхІяули – уркІила, биризла камлис – урцецунас дарман дирар. Махъла кІинчІби дягІла изайс, хурла ва цархІилти галгубала вавни декІар-декІарти излусмас сабабдирути сари

Галгуби ургар «талхъунти» галгубира лерниличила балутира камли хІебургар. Илдани чус барибси гІяхІдешлис лайикъси жаваб чарбиру.

Нушала шилизиб «ХІябкъада» бикІуси мерличиб дурхъаси галга леб, заб дарахъес ила булгес башутири. Булгес бякьунхІели, забра дирутири. Чидил някьби хъусли ил кабяхъибал, илала гІергъи адамти ила булгес башулихъар, чумал дус заб хІедирули калун. Галгуби кадирхъули машгьурдиэс бажардихІедикили, илди удалтули, чедалтули, ванзаличир хІушала кьел-хІерзи гІяхІси баркьудиличил калахъес пикридикІеная!

Галга кабирхъухІели, илав цугикибсила уркІецІи хІедухъес хІедиарар. Кабиркуси галгала тІамаличи лехІахъалли, уркІи кІантІибирар. Бардала кьутІлис руржути кІапІри, тирхъти кьялуби, бялчуси галгала чІяр – илгъуна агиличи уркІецІихІедухъахъес вирару?

Даршани дусмала урgab ургуба жагабируси, чумилра гъункья дяхЦи-  
лиу хъурабируси, сунела бизити цедешли лявбируси, ца вайнукия адамла  
баркъудили агарбариб. Илдигъунти адамти, сецад хейгеси биалра, чилилра  
жавабличи битИкИули ахIен. Илис ахIенара вайнукиябира бахъбикИути.

Сен адамтани чус ва чула чебалкIуси наслулис баркъуди гIелаб калахъес,  
тIабигIят жагабарес пикрихIебулхъутив? Шимази газ бакIили гIергъи галгуби  
кадирхъути камбиубли биалра, илди чедалтнила, удалтнила хIянчи хIярхIли  
бузахъули саби. ЦацабехIтани чула участокличи цедешла галгуби удалтни  
гапхIебарес хIейрар.

Дубуртазир гIежакъяй дихIухIели цабехI адамтас гIяхIдеш бетарули  
биалра, бахълис вайдеш бетарули чебиули саби. ГIежакъяйли, галгаличи  
адацIили, кумри умчIахъули сари.

Дубуртазир гъар журала цедешла галгуби яра овощуни хIедашар или,  
бурибсилочи лехIхIехъили, хъулрала мякля тIутIила галга убатурра. Илаб  
ца кIатIала мурхъдешличил гIянжи биалра, гъар дус диштIати диалра цедеш  
лугули бухъули саби. Илала гIергъи шилизир тIутIила галгуби удалтули сари.  
Ишар янила замана кIапIдирути галгуби ляркъян.

Гъалабла халкъли бурули бири, хивла галга убатурси ил сунела хъябван  
буршубаалли убкIар или. Ил халкъла буралаличи лехIахъили шилизиб хив  
убатес урухкIутири. Ил багъандан совет хIукумат бакIайчи КИшала шила  
авлахъличиб хивла галга дакIубухъунси ахIенри. Гъанна бусягIят биалли  
илди имцIадикIули сари. Багъесли саби вегIли ухIебатурси селра бакIес  
бируси ахIен.

Ишар цацадехI дусмазир помидорти, хиярти, хIятта харбузуни дашар,  
амма дилкъули ахIен.

Бамсриахъес, шадиб-гъуни барес вацIализи укьясли, илар деркунти цедешла къуми, галгуби агарси, чIянкIси мерличи удалтули вирус. Белики, илдазирад дакIибти къадубала цедешлира нушала дурхIни разибарес?

Адамтас сецад гIяхIдешуни дарадалра, гIелаб акIубти наслули хъумуртуси ахIен. Илдала уркIбазиб хIушани чус гIелаб батурси жагадеш муртлисалра баркалличил гъанбушули кавлуси саби.





## Поэзия

МяхИяммад  
СЯГИДОВ



### НЕСЛИЧИЛА ПИКРУМИ

ДяхИла цIуба пусли  
Гьадирхъули гьаладахI,  
КIухбикIули саби дягI  
Ушкули авлахъла дяхI.

ДяхИ шахли балкIахъун  
Хъа гьалабси бухъна махъ,  
Махлиуб къухIбизурси  
Гьанаур, неш, хIела къакъ.

МиьбаргIибси дякъличиб  
Тякбухъесгу или къяш,

КъакъабакIили уркIи  
Вирулра ну декIла гIяш.

Сукъурла хIули къяйда  
Бегъуб бургар гIинизра,  
ДягIли чIянкIубарили  
БаргIиб бургар биризра.

Цунбухъунси анкъилар  
Рургуд рикIули шишим,  
Унра рурси Минайли  
ХIехесвара или шин.

### ХIЕЛА ХIЕР

ХIела хIер камХIебирар  
Наб гIелабад башули,  
Къакъадаешра анцIкъира  
УркIилизир дилшули.

Адамти урgab бирар  
ЛасбикIули ну-алав,  
Хъяшара гьимукIахъес  
УрузкIус сунна гьалав.

БархъдешгIевли кайзахъес  
ЖибикIар няхъ буцили,

БалкIдешличил ургъахъес  
Викура ахъуцили.

ЧеввалкIасли чарварес  
Набчи ил музабулхъан,  
Дардлизи викибХIели  
Дарманван дакIубулхъан.

ХIела хIерли, дила неш,  
Чуйнара шадварира,  
Чилала дугурбазив  
Даим ванавирира.

## АРУКАБА ШИЛИЗИ

ГягІадли вашухІели  
Делкунти хъа унабурхІ,  
ХІура рухънараили  
ДалкІи сари бикІар урхІ.

БегІ гъалаб ахъибсира  
Ил сабри, нуни, ахъдеш,  
Илабри бекІ чегибси  
ХъумартурхІели сахъдеш.

Цай къяшма ганзбарибси  
Нушала шила къакъа,  
Гъанарули гъанкІелизиб  
БикІаргу уркІи къакъа.

Ил къакъалавад сайри  
ВакІибси хІябкъяйличи,  
ХІябцІали дус гъаннара  
ВархъхІелзули дякъличи.

ВиштІахІели къяйдали  
БитІакІану, неш, лихІи,  
Арукаба шилизи –  
Шалали булхъна берхІи.

ДурхІяхІели хъулирван  
КункХІейрарал пикруми,  
Арцес муэртазирван  
ЛерхІякъянал дуклуми.

## НЕСЛА ДИГАЙ

ХІела дигай гъар бархІи  
ЛасдикІули ну-алав,  
ЦаххІейахъес цакъ луга  
Ну хІейгутала гъалав.

Вайбаркъла мезлис илди  
ХІярхІубасван гъадилзан,  
Мезлукъли бихуси децІ  
Агарсиван уббилзан.

Гъалмагъла баркъудили  
ДекІли бяхъялли уркІи,  
МалхІямли билгъа дяхъи,  
Дархъли сабабти делкІи.

Дила чедиб илдала  
КамХІебирар дукала,  
Къукъу-лямцІ черардукес  
Дирар гъаман багала.

## ГАРДЛА ДАЛАЙ

Тилади сабину, неш,  
БелчІенгу гардла далай,  
Гъандикили дурхІядеш  
ХІебирарал чарх къулай.

ДурхІяхІели чуйнара  
Далайла дуклумачив,  
Урцаси сирилавад  
Дунъяла дубаначи.

ДецІелизи бикибхІели  
Дила биштІаси уркІи,

Аргъибмад хІела тІама  
ГІяжаибли хІулбуркІи.

Дай уркІилизиб дунъя  
ЦумбикІули хІелтулра,  
Инсан децІли уцалли  
ТалихІли вархъвалтулра.

Гардличил дарх дучІути  
ДелчІен хІела саринти,  
Дунъяла дарданасра  
ХІедирарал сабабти.

# Навруз



ISSN 0235 - 0149

Индекс годовой 31176  
Индекс полугодовой 73892

